

मर्कुसडेऱ साप्पऱआ

सुसमाचार

The Scriptures:

© Yamphu Translation Committee, July 2017.

मर्कुसडेऱ साप्पऱआ

सुसमाचार

साप्चिरामि परिचय

मर्कुस लुःमे याऱमि चाहि येसुमि एप्पा चोडसा पत्रुसमि नुबा लाडगाम लेटे ॥ पत्रुसडेऱ मर्कुस पत्रुसमि साप्चिराबेऱ काडमि पसा लुःनुड लुःटुए (? पत्रुस ५:१३) ॥ पत्रुस बारनाबासमि टाडबाड मोबा एप्पा चोडसा पावलमि योम्बोक लेऱमाराप्खुबासो लेटे (प्रेरित १२: २५) ॥

मर्कुस येसुमि एप्पा चोडसागो मेलेटा तर येसुमि टुम्बेहा खा पत्रुसबाड नुरोऱ सिखा चिम्बेऱआ लेटे ॥ पत्रुसडेऱ मर्कुस लुःबेऱपऱआ खानोऱ खोमि साप्चिरा मर्कुसबेऱ साप्पिटुहा ॥ मर्कुसडेऱ इगो साप्चिरा रोम सहरबेऱ साप्पऱआ लुःनुड बाइबलमि टुम्बेऱ लेघुबा बेऱलो निवादाडबाजिडेऱ लुःन्दुजे ॥ मर्कुसडेऱ चाहि इगो साप्चिरा रोमि याऱमिजिमि लागि साप्पऱआ लुःन्दुजे ॥ सुसमाचारमि रिउम साप्चिराबेऱ मर्कुस चाहि चोप्पा याऱलो साप्पऱआ साप्चिरा लेटे ॥ इगो साप्चिरा इ. स. ५५-५६ मि रुम्बेऱए बेलाबेऱ अथवा येसु सिघेऱपऱआ ३० निड एक्साड साप्पऱआ लेटे ॥

इगो साप्चिराबेऱ येसुडेऱ लेऱपऱआ योम्बोकनुड खोमि अधिकारमि टुम्बेऱ नुरोऱ साप्पऱआ लेये ॥ खो अधिकारनुडमा लुःमे खा खोमि योम्बोकबेऱ खाडडोकइये ॥ इगोबेऱ एक्साड एक्साड येसुमि एप्पा चोडसाजिडेऱ भना नुरोऱ लेबोक्पऱआ तर खोमि बिरोध लेऱखुबाजि चाहि भना बिरोधि

लिबऱआ खा ढुहा ॥ चोप्पा ँकसाड चाहि येसु काप्सिडबेऱ सिघेऱनुड
हिडबोकपऱआ मोबा थाड सिरि ठेऱपोक्खेऱपऱआ खा ढुहा ॥

बिसयमि सुचि

१. सुसमाचार साप्पा तरिक्पऱआ १:१-१३
२. येशूडेऱ गालिलबेऱ लेऱऱपऱआ योम्बोक १:१४-६:५०
३. गालिलबाड यरूशलेमठोक १०:१-५२
४. यरूशलेमबेऱ पेम्बऱआ ँकसाडे साता ११:१-१५:४७
५. येसु सिघेऱनुड हिडबोकपऱआ १६:१-८
६. सिघेऱनुड ँकसाड प्रभु खाडमुबऱआनुड थाडसिरिऱटु खेऱपऱआ
१६:९-२०

बप्तिस्मा पिःघुबा युहन्नाडेः प्रचार लेःऱपऱआ
(मत्ति ३:१-१२; लुका ३:१-१८; युहन्ना १:१६-२८)

१ निवाहाडमि पसा येसु (मुक्ति पिःखुबा हाडबा ख्रिस्टमि) टुम्बेऱ सुसमाचार इडोः तरिकपुइये ॥ २ अगमबक्ता यसैयामि साप्चिराबेऱ साप्पऱआडोः- “खाक्से, हेनेऱ राम टोडमामि केऱ दुत हेनेऱ पोम्बेऱ पाडऱनुडे ॥ ३ खेप्सानुमे, (रेऱरेक्मा ठाउबेऱ)इक्को बेऱए सेम्लाडेऱ इडोः लुःमेऱनिडसिये, “प्रभु लेडइये राम टोक्सानुमे, खो रामढाम रामयुऱवा सोभो टोक्सानुमे ॥” ४ याऱमिजि बप्तिस्मा पिःसाड युहन्ना रेऱरेक्मा ठाउबेऱ खाडमुसा ॥ खोसेऱ याऱमिजि इडोः लुःसाड प्रचार लेःऱटुजि, “हेनिड पाप लेःऱमा लेऱनुड बप्तिस्मा लासानुमे ॥ मोबा हेनिडहा चोप पाप निवाहाडडेऱ आम्लाड पिःये ॥ ५ यहुदिया देसनुड यरुसलेम सहरबिऱहा चोप याऱमिजि युहन्नाबेऱ लेस्सामि ॥ खोजिडेऱ टाडबा टाडबामि पापि योम्बोक लेऱनुड युहन्नाबाड यर्दन यिःवाबेऱ बप्तिस्मा लासुजि ॥ ६ युहन्नाडेऱ उटमि भुत्लाबाड आक्पऱआ चेऱ चाक्सुहा ॥ सुम्मारिकपेऱ साउकमि थोडमाइ हिगुएनुड खोसेऱ सिगिऱडोऱमा सलहनुड याऱवमामि खुदो चोसुहा ॥ ७ खोसेऱ याऱमिजि इडोः लुःसु, “काबाड एक्साड लेडइये काबाड बेऱलो सक्तिदाडबा लेये ॥ का खोमि सराडबेऱ उःक्युनुड खोमि राडसुपमि तुना हेम्मरोमासोड लेःऱडानि ॥ ८ केऱ हेनिड योडाडेऱ बप्तिस्मा पिःनिम, तर खोसेऱको हेनिड पबित्र होडनिवाडेऱ बप्तिस्मा पिःये ॥

येसुडेऱ बप्तिस्मा लाबऱआ

(मत्ति ३:१३-४:११; लुका ३:२१-२२; ४:१-१३)

९ युहन्नाडेऱ इडोः प्रचार लेःऱमेऱनिडसिमाबेऱ येसु गालिलमि नासरत सहरबाड मोबेऱ लेस्सा ॥ मोबा येसुडेऱसो मोडोक्पेऱनोऱ युहन्नामि हुकबाड यर्दन यिःवाबेऱ बप्तिस्मा लासु ॥ १० मोडोक्पे येसु योडाबाड पाखाबेऱ आप्मासोरोऱ थाडसिरि हेम्बोक्नुड पबित्र होडनिवा उख्रिऱवाडोऱमा

खोसोकपे उडबऱआ खोसेऱ खाडडोक्टु ॥ ^{११} मोबा थाडसिरिबाड इडोऱ लुःबऱआ खेम्मुसा, “इगो केए नाम्नाम लेःऱपऱआ पसा लेये, हेननुड का बेऱलो साप्याडइटिडे ॥” ^{१२} मोबाडसोरोऱनोऱ पबित्र होडनिवाडेऱ येसु रेऱरेकमा ठाउबेऱ चिक्खेऱटु ॥ ^{१३} खो सैतानडेऱ रिक्बोड याकठोऱ पापबेऱ रेम्एम्मा योगु ॥ मोबेऱ खो नाम्भुडलाबेऱहा जन्तुजिनुड पेना मोडोकपेऱ थाडसिरिदुतजि लेन्नुड येसुमि सेवा लेःटुजि ॥

येसुडेऱ रिबाड डा सेऱखुबाजि केःऱपऱआ

(मति ४:१२-२२; लुका ४:१४-१५; ५:१-११)

^{१४} एक्साड युहन्ना तिरोडगा खिमबेऱ सिऱपऱआ बेला येसुडेऱ निवाहाडमि सुसमाचार याऱमिजि खेम्मेऱसाड गालिलबेऱ खडा ॥ ^{१५} खोसेऱ लुःसु, “हागो बेला लेम्बेऱ, निवाहाडमि राज्य केक्पेऱनोऱ लेडइटे ॥ हागो टाडबामि पाप लेःऱमा लेऱनुड सुसमाचारबेऱ बिस्वास लेःऱटानुमे ॥”

^{१६} गालिल वाबोकलामि केक्पेऱ वाइजामे निडसिमाबेऱ येसुडेऱ सिमोननुड खोमि निसा अन्द्रियास डा सेऱमामि जाल राप्पेऱनिडसिबऱआ खाडडोक्टु ॥ मोजि डा सेऱखुबाजि लेःऱटामे ॥ ^{१७} मोबा येसुडेऱ माहाजि लुःसुजि, “कानुड राप्सानिडे, केऱ हेनिड याऱमिजि येसुमिबेऱ लाप्खुबा टोडइने ॥” ^{१८} खोजिडेऱ इगो खा खेम्मा सोरोक याडखामा मोबेऱनोऱ याःऱयानुड येसुनुड राम्बोगमि ॥

^{१९} फेरि एडेऱ पोम्बेऱ येसु रामघेऱमाबेऱ जब्दियामि निप्पाड पसाजि याकुबनुड युहन्ना योडाखोडबेऱ खाडडोक्टु ॥ खोजि मोबेऱ पेन्नुड नाःक्खेऱपऱआ जाल ठिःमेनिडसिडामे ॥ ^{२०} मोबासोरोऱनोऱ येसुडेऱ खोजिसोड केडुजि ॥ मोबा माहाजिडेऱसो खोजिमि पाबा योडाखोडबेऱनोऱ योम्बोक लेःऱखुबाजिनुड याःऱयानुड येसुनुड खडामि ॥

माडेऱमा चाबेऱ राःऱपऱआ इक्को याऱमि येसुडेऱ नुबोक्पऱआ

(लुका ४:३१-३७)

२१ येसु माहा चोडसाजिनुड कफर्नहुम लुःमे सहरबेऱ रुक्मासोरोऱनोऱ नाजामे याक्पेऱ खो यहुदिजि सुमढाम खिमबेऱ पेखेऱनुड याऱमिजि सिक्छे पिःबोगुजि ॥ २२ मोबेऱ येसुमि सिक्छे खेम्नुड याऱमिजि खरि मिनामि इन्ढोडहोड खोसेऱ यहुदि धार्मिक खा इःऱखुबाजिडेऱ इःप्पऱआडोऱ नेऱनि तर बेऱए अधिकारनुड सिक्छे पिःसु ॥ २३ मोडोक्पेऱनोऱ यहुदिजि सुमढाम खिमबेऱहाजिबेऱ माडेऱमा चाबेऱ राःप्पऱआ इक्को याऱमि तुसे, मो वोसा, २४ “हे नासरतबिऱए येसु, हेनेऱ कानिड इमाडडे लेःऱमा योइये? इमा हेड कानिड नासि लेःऱसिऱ लेडइटे? हेड निवाहाडडेऱ पाडबऱआ पबिऱत्र याऱमि लेये लुःनुड केऱ लेनुडे ॥” २५ येसुडेऱ मो माडेऱमा चाप योप्नुड लुःसु, “योड उगे, मोबा आक्को याऱमिबाड खेप्पेसे ॥” २६ मोडोक्पेऱनोऱ मो याऱमि टेन्डिऱखेऱनुड माडेऱमा चाप बेऱए सेम्लाडेऱ वोसाड खेप्पेसा ॥ २७ इघा चोप खा खाडघुबा याऱमिजि खरि मिन्नुड काबोगामि, “नेऱनि इगो गो इमाडडे? इगो गो चोड खाले सिच्छेरे ले ॥ इगो याऱमिडेऱ अधिकारनुड माडेऱमा चापजि खेऱपेसे लुःन्डुजे मोबा माहाजिडेऱ इगोसेऱ लुःबऱआडोऱ खेऱपेम्मे ॥ २८ मोबा येसुमि इडोऱमा योम्बोकमि खा गालिलनुड मोमि किऱयुमिऱयु मुगा ॥

येसुडेऱ बेऱलो टुक्खुबाजि नुबोक्पऱआ

(मत्ति ८:१४-१७; लुका ४:३८-४१)

२९ मोबा येसु यहुदिजि सुमढाम खिमबाड खेऱमासोरोऱ याकुबनुड युहन्ना सोरि चिक्मानुड ओडलाम सिमोननुड आन्दिऱयसमि खिमबेऱ खडामि ॥ ३० मो याक सिमोनमि नाम्मा एचेऱमे लुडघाक्पेऱ इम्गिगा ॥ येसु लेम्मासोरोक खिमबेऱहा याऱमिजिडेऱ खो इगो खा खेम्मेऱटुजि ॥ ३१ येसुडेऱ केक्पेऱ खेऱनुड मो सिमोनमि नाम्मा हुकपेऱ राःप्नुड येःऱपोगमा राप्पु, मोबा खो एचेऱमेऱ लेडु ॥ मोबा खोसेऱ चाबाडजि चामा उडमा चुडनुड हिक्सुजि ॥

^{३२} मो युडा नाम आघेऱनुड ँक्साड याऱमिजिडेऱ चोप खालहा टुकखुबा, माडेऱमा चाबेऱ राःप्पऱआजि येसुबेऱ लाजेडुजि ॥ ^{३३} मोबा मो सहरबेऱहा बेऱलो याऱमिजि खिममि सोऱलुडबेऱ सुप्सामि ॥ ^{३४} येसुडेऱ बेऱलो खालहा टुकखुबाजि नुबोगुजि मोबा बेऱलो याऱमिजिबाड माडेऱमा चापजि यिऱहाक्सुजि ॥ येसु असा लेये लुःनुड माहा माडेऱमा चापजिडेऱ लेसुजे ॥ मोडोगेऱ येसुडेऱ माहा माडेऱहा चापजि मेऱामुमेऱटुजि ॥

येसुडेऱ गालिलबेऱ सिच्छे पिःबऱआ

(लुका ४:४२-४४)

^{३५} वगियाराम माक्मि नाम टेऱमा याऱलोनोऱ येसु पुऱकेऱनुड साडगासुमा ठाउबेऱ खेऱनुड प्रार्थना लेःटु ॥ ^{३६} मोबा सिमोननुड खोमि लाडगामजि येसु योक्सिऱ खडामि ॥ ^{३७} खोजिडेऱ येसु चुप्नुड लुःसुजि, “चोबेऱ हेड योक्मेऱनिडसिम्मे ॥” ^{३८} इगो खा खेम्नुड येसुडेऱ इडोऱ लुःसुजि, “हागो आबानिडे, कानिड केऱयोडमेऱड टुहा हाइखा खिमडेमबेऱ खेऱमा, मोबेऱहा याऱमिजिसो केऱ सुसमाचार खेम्मेऱमा खेये इन्ढोडहोड इगो योम्बोकमि लागिनोऱ का लेडइटिडे ॥” ^{३९} मोबा येसु गालिलबेऱहा चोप यहुदिजि सुमढाम खिमराजि प्रचार लेऱसाडनुड माडेहा चापजि याऱमिजिबाड यिक्साड वाइसा ॥

सुकटुबाडेऱ सुक्पऱआ याऱमि नुबोक्पऱआ

(मत्ति ८:१-४; लुका ५:१२-१६)

^{४०} सुकटुबाडेऱ राःप्पऱआ इक्को याऱमि येसुबेऱ लेन्नुड खोमि सराडबेऱ ओप्युनुड लुःसु, “हेनेऱ का नुबोक्मा मिऱडाहोड का चोखो टोडहेये ॥” ^{४१} इडोऱमा खा खेम्नुड येसुमि निवा नामनावेऱ टिबु ॥ मोबा मो याऱमिसोक्पेऱ हुक युडनुड लुःसु, “केऱ मिडनुडे हेड चोखो लिसे ॥” ^{४२} मोडोक्पेऱनोऱ मो सुकटुबाडे लेऱनुड चोखो लिसा ॥ ^{४३} मोबा सोरोऱनोऱ येसुडेऱ मो याऱमि नुरोऱ आग्या पिःनुड खो इडोऱ लुःसु, ॥ ^{४४} “खाक्से, इगो खा असासो ँऱलुःमेयो!

तर आमदाडबा जाच लेःमामि लागि याडाडबाबे खेःनुड खाडजिमुसे ॥ मोबा हेड सुद्ध लिबःआ खा यात्रमिजि खाडमुमामि लागि मोसाडेः पिःबःआ आग्याडेः लुःडिडोः मन्दिरबेः भोग पिःसे ॥”

४५ तर मो यात्रमि मोबाड खेःनुड टाडबा नुबोक्पःआ खा चोप यात्रमिजि खेम्मेःटुजि ॥ इडोः लिबःआसेः येसु फेरि सहरराजि खेःनुड प्रचार मेलेःहेसु ॥ मोडोगेः येसु साडगासुमा ठाउराजि खेःनुड पेम्बोगा तर मोबेःसो यात्रमिजि किर्यु मिःयुराम खोबेः लेस्सामि ॥

सोगुबा यात्रमि नुबोक्पःआ

(मत्ति ६:१-८; लुका ५:१७-२६)

२ ^१ इःयाक नियाक एकसाड येसु कफर्नहुम सहर टेघडा ॥ मोबा यात्रमिजिडेः येसु खिमबेःनोः टुये लुःमे खा खेप्सुजि ॥ ^२ मोबा बेःलो यात्रमिजि येसुबेः लेस्सामि मोडोगेः खिम होडसिःयुनुड पाखेःयु पेन्ढाम ठाउनोः माःआडा ॥ मोडोक्पेः येसुडेः यात्रमिजि निवाहाडमि बचन खेम्मेःनिडसिडुजि ॥

^३ मोडोक्पेःनोः रिबाडेः इक्को सोगुबा यात्रमि खिमानुड मोबेः लेस्सामि ॥ ^४ यात्रमिजि बेःलो सुम्बःआसेः माहाजिडेः मो सोगुबा येसुमि केक्पेः मलाघेःहेसुजि ॥ मोडोगेः माहाजिडेः येसु पेम्बःआ सिधा मिःटु छाना टेनुड मो सोगुबा इम्ढाम रुडघाक्नुडनोः येसुमि पोम्बेः ताःम हेःएन्डुजि ॥ ^५ माहाजिमि बिस्वास खाडनुड येसुडेः मो सोगुबा यात्रमि लुःसु, “होउ नानि, हेनेहा चोप पापमि आम्लाड लिसा ॥”

^६ इगो खा खेम्नुड मोबेः सुम्बःआ यहुदि धार्मिक खा इःखुबाजि निवेःर्यु कासामि, “इगो यात्रमिडेः इन्ढोड इडोःमा खा इःमेःनिडसिन्डुए?

^७ इगोसेःको, निवाहाडरे सिःक्चोन्डु ॥ निवाहाडबाड हाइको असेः पापमि आमलाड पिःहेन्डुए?” ^८ तर मोडोक्पेःनोः येसुडेः माहाजिमि निवामि खा लेडोक्पेसु मोबा माहाजि लुःसुजि, “हेनिडेः इन्ढोड इडोः मिःइन्डानुमे?

^९ इगो सोगुबा यात्रमि ‘हेनेहा पाप आम्लाड लिसा लुःमा नेक्चा’ लेःएन्डे

‘हेनेए रुडघाक खिमानुड राप्से लुःमा नेक्चा लेये’ लो लुःघाक्सानुमे? ^{१०} तर खेप्सानुमे, इगो माक्खाम्डेमबेफ का यात्रमिमि पसेफ यात्रमिजिमि पापमि आम्लाड पिःमे अधिकार टुये लुःमे खामि प्रमान हेनिड पिःनिम्नि॥” मोबा येसुडेफ मो सोगुबा यात्रमि लुःसु, ^{११} “केफ हेड लुःन्ने, हागो पुकेफनुड आम्मि रुडघाक खिमानुड खिम खडे॥” ^{१२} चोबेफ खाडमा खाडमाबेफनोफ मो यात्रमि सुवाक्टोफ पुःकाडा मोबा रुडघाक् खिनुड खेफपेसा॥ यात्रमिजि खरि मिन्साड निवाहाडमि ओहाड लेःफसाड इडोफ काबोगामि, “इडोफमागो इन्डोफपेफसो माडखाडडिफ॥”

येसुडेफ तिरो यिःक्खुबा खोम चोडसा टोडबफआ

(मत्ति ६:६-१३; लुका ५:२७-३२)

^{१३} येसु फेरि गालिल वाबोक्लामि केक्पेफ खडा॥ मोबेफ बेफलो यात्रमिजि खोबेफ सुप्सामि मोबा येसुडेफ माहाजि सिक्छे पिःसुजि॥ ^{१४} मोबाड येसु खेफटिडमाबेफ इक्को तिरो यिक्खुबा यात्रमि तिरो यिःक्मेफनिडसिबफआ येसुडेफ खाडडोक्कुटु॥ मो यात्रमि अलफयसमि पसा लेटे॥ मोबा येसुडेफ मो इडोफ लुःसु, “कानुड राप्से” इडोफ लुःबफआ खेम्नुड येःपुगा मोबा खो मि एडगुवा एडगुवा खडा॥

^{१५} येसु मो तिरो यिःक्खुबामि खिमबेफ चाबाड लिनुड खडा मोबा खोम चोडसाजिनुड सोरि चासिफ पेडयुसा॥ मोबेफ बेफलो हाइखा तिरो यिःक्खुबा पापि यात्रमिजिसो येसुनुड सोरि टुसामे॥ ^{१६} फरिसि लुःमे हुलबेफहा बेफहा सास्त्रिजिडेफ येसु तिरो यिःक्खुबानुड हाइखा पापि यात्रमिजिनुड सोरि पेन्नुड चाबफआ खाडडोक्कुड येसुमि चोडसिजि लुःसुजि, “खोसेफ इन्ढोड तिरो यिःक्खुबा पापि यात्रमिजिनुड सोरि पेन्नुड चाये?” ^{१७} माहाजिमि खा खेम्नुड येसुडेफ इडोफ लुःसुजि, “सिडा लेःफखुबागो मेन्टुक्खुबाजि नेफनि टुक्खुबाजिगोरे पाप्मिये॥ मोडोफनोफ का धर्मिजिमि लागि नेफनि तर पापिजि हिडमेफसिफ लेडइटिडे॥”

सक्मेन्जा पेम्मेटुम्बेऱ खा

(मत्ति ६:१४-१७; लुका ५:३३-३६)

^{१८} कोहि याऱमिजिडेऱ बप्तिस्मा पिःघुबा युहन्नामि नुड फरिसि लुःमे हुलबेऱहा याऱमिजि सक्मेन्जा पेम्बऱआ बेलाबेऱ येसुबेऱ लेन्नुड सिप्सुजि, “बप्तिस्मा पिःघुबा युहन्नामि चोडसाजिनुड फरिसि लुःमे हुलबेऱहा याऱमिजि सक्मेन्जा पेडइम्मि, तर इन्ढोड हेनेहा चोडसाजि चाहि सक्मेन्जा पेम्मिने?” ^{१९} येसुडेऱ माहाजि लुःसुजि, “फुडसयाबेऱ केऱपऱआ जन्तिजिनुड सोरि लेम्बऱआ याऱमिजि मेन्चारेऱ खेएम्मे? नायोडबानुड सोरि टुमाबेऱको असासो साक्मेन्जा पेम्मिने॥” ^{२०} तर इऱयाक मोडोऱहा याकसो लेडइहा, इन्डोकपेऱ नायोडबा खोजिबाड हाघेऱमा सिऱइये, मोबा माहाजि सक्मेन्जा पेडइम्मे॥

^{२१} “फेरि पुरानो चेऱ असेऱसो चोडमि टुक्रडेऱ रेबुजिने॥ रेबुहोडसो चोड चेऱमि टुक्र सुम्घेये मोबा नाःक्खेये मोडोगेऱ भना बेऱए होवाये लिये॥

^{२२} “मोबा असेऱ चोड अडगुरमि खेवा पुरानो साउकमि सुप्बेऱ युडइन्डुजे? युक्सुजिहोडसो मो सुप् नाःक्खेये मोबा अडगुरमि खेवा ओप्खेहा॥ मोडोगेऱ चोड अडगुरमि खेवा चोड सुप्पेऱनोऱ युडमा खेये॥

नाजामे याकमि टुम्बेऱ खा

(मत्ति १२:१-८; लुका ६:१-५)

^{२३} नाजामे यिडेऱ येसु गहु सोवारमि राम लिसाड खेऱमेऱनिडसिडे॥ इडोऱ खेऱटिडमाबेऱ येसुमि चोडसाजिडेऱ गहुमि खाऱवा युप्पुगुजि॥ ^{२४} इगो खा खाडडोक्नुड फरिसि हुलबेऱहा याऱमिजिडेऱ येसु लुःसु, “खाक्से न! नाजामे याकपेऱ यहुदि धार्मिक नियमबेऱ एलेऱमे लुःबऱआ योम्बोकनोऱ हेनेहा चोडसाजिडेऱ इन्ढोड लेऱमेऱनिडसिन्डुजे?” ^{२५} येसुडेऱ माहाजि इडोऱ लुःसुजि, “हाडबा दाउदनुड खोमि लाडगामजि सक् लुःमाबेऱ चामामि लागि इमाडसो मेन्चुप्नुड दाउदडेऱ इमाड लेटुए? हेनिडेऱ मेनेडानुमे? ^{२६} अबियाथार लुःमे चोप्पा एप्पा याडाडबामि पालोबेऱ निवाहाडमि खिमबेऱ

पेऱखेऱनुड दाउदडेऱ निवाहाड चेऱटिबऱआ चारेपा खोसेऱ रिक्आप्नुड लाडगामजिनुड हाजोसु ॥ कानिडमि यहुदि धार्मिक नियमबेऱ याडाडबाबाड हाइखा असेऱसो माहा चारेपा चामा मेम्फेने लुःबऱआ लेये ॥ तर हाडबा दाउदडेऱ ताडबेऱरेऱ नेऱनि खोमि लाडगामजिसो चामामि पिःसुजि ॥”

^{२७} येसुडेऱ खायेऱसाड लुःसु, “याऱमिजिगोनाजामे याकमि लागि टोडबऱआ नेऱनि, तर याऱमिमि लागि चाहि नाजामे याक टोडबऱआ लेये ॥ ^{२८} मोडोगेऱ का याऱमिमि पसा चाहि नाजामे याकपिसो मालिक लेडे ॥”

हुक हेघेऱपऱआ याऱमिमि हुक नुघेऱपऱआ

(मत्ति १२:६-१४; लुका ६:६-११)

३ ^१ हाइके खेप येसु यहुदिजि सुम्हाम खिमबेऱ खेऱमाबेऱ मोबेऱ हुक हेघेऱपऱआ इक्को याऱमि टुसा ॥ ^२ नाजामे यिडेऱसो येसुडेऱ मो टुक्खुबा याऱमिजि नुबोकइन्डुजेडे लुःनुड दोस टिमामि वाःप्खुबा याऱमिजिसो मोबेऱ टुसामे ॥ ^३ येसुडेऱ हुक हेघेऱपऱआ मो याऱमि केऱनुड लुःसु, “पुकेऱनुड पोम्बेऱ आबे ॥” ^४ मोबा येसुडेऱ मोबेऱहा याऱमिजि सिप्सुज, “लो लुःसानुमे, कानिडमि यहुदि धार्मिक नियमडेऱ नाजामे याकपेऱ इमा लेऱमे लुःटेऱ? भलाइमि योम्बोकडे नासि लेऱमे योक्बोक? सेऱनेमा लुःयेन्डे हिडमेऱमा?” तर याऱमिजिडेऱ इमाडसो मेलुःसुजि ॥ ^५ मोडोगेऱ येसुडेऱ सुरकेऱपऱआ डाजिकडेऱ माहाजि चोप वाःबुजि ॥ माहाजिमि रुडगुवाडोऱ छाऱइये निवा खाडनुड सारोनोऱ येसुमि निवा टुगा ॥ मोबा मो याऱमि लुःसु, “हेनेए हुक खिक्से!” खोसेऱ हुक खिक्सु मोबा खोमि हुक नुखडा ॥

^६ मोबा फरिसि लुःमे धार्मिक हुलबेऱहा याऱमिजि चाहि यहुदिजि सुम्हाम खिमबाड खेऱनुड सोरोक हाडबा हेरोदमि याऱमिजिनुड येसु इन्डोऱ सेऱमे लुःनुड मोत्ता लेऱऱपुगुमि ॥

^७ मोबा एक्साड येसु खोम चोडसाजिनुड गालिल लुःमे वाबोक्लामि केक्पेऱ खडा ॥ मोबेऱ बेऱलो याऱमिजि खो टिडसाड आबामि ॥ ^८ येसुडेऱ लेऱपऱआ खरिहा योम्बोकमि टुम्बेऱ खेम्नुड गालिल, यहुदियानुड यरुसलेम

सहर, इदुमिआ छेत्रनुड यर्दन होडमामि मेरएरेड मोबा टुरोसनुड सिदोन सहरमि किरयुमिरयुबाडसो बेरलो यात्रमिजि लेस्सामि ॥ ^६इगो खाडनुड बेरलो यात्रमिजिमि घुइचोडेण टाडबा सिइम्मे लुःनुड येसुडेण खोम चोडसाजि इक्को योडाखोड लाप्पेणटुजि ॥

^{१०}येसुडेण बेरलो यात्रमिजि नुबोक्पणआ लेःटे ॥ मोडोगेण टुक्खुबाजिडेण खो केक्मामि चोक्खुसेण चुसामे ॥ ^{११}माडेणमा चापडेण चुप्पणआजि येसु खाडडोक्मासोरोण खोमि पोम्बेण उःक्युनुड वोसाड लुःसुजि, “हेडगो निवाहाडमि पसा लेये!” ^{१२}तर येसुडेण “का असा लेडे लुःमे खा यात्रमिजि एणलुःमे” लुःनुड माहा माडेणमा चापजि वोःप्नुड आग्या पिःसुजि ॥

येसुडेण बाराजना एप्पा चोडसाजि सेन्बणआ

(मत्ति १०:१-४; लुका ६:१२-१६)

^{१३}येसु इक्को टोक्कोक्मेणटु साडनुड खोसेण मिणपणआ खोबेण केःडुजि ॥ माहाजि येसुबेण लेस्सामि ॥ ^{१४}खोनुड सोरि पेम्मामि मोबा सुसमाचार खेम्मेणसिण पाडमामि बारो चोडसा सेणुजि ॥ खोसेण माहाजि एप्पा चोडसा निड पिःसुजि ॥ ^{१५}मोबा माहाजि माडेहा चापजि यिक्के अधिकारसो पिःसुजि ॥ ^{१६}येसुडेण सेन्बणआ बारा जना चोडसाजि इघाजिनोण लेःटामे-सिमोन, खोमि निड येसुडेण पत्रुस युडबेणटु ॥ ^{१७}जब्दिया पसाजि याकुबनुड युहन्ना लेटे ॥ मोजिमि निड येसुडेण “बोअनर्गेस” युडबेणटुजि मो लुःबणआ गर्जनमि पसा लेये ॥ ^{१८}मोबा अन्द्रियास, फिलिप, बारथोलोमा, मत्ति, थोमा, अल्फायसमि पसा याकुब, थेदियसनुड देसभक्त लुःमे सिमोन ^{१९}मोबा यहुदा इस्करियोत, इगोसेणनोण येसु यात्रमिजिमि हुकबेण राःप्पेणटु ॥

यहुदि धार्मिक नियम इःण्खुबाजिडेण येसु सडका लेःणपणआ

(मत्ति १२:२२-३२; लुका ११:१४-२३; १२:१०)

^{२०}मोबा एक्साड येसु इक्को खिमबेण खेणनुड होडसिणयु पेणना ॥ मोबेणसो बेरलो यात्रमिजि सुम्बणआसेण येसुनुड खोम चोडसाजिडेण चामासो

मेन्चाडोक्टुजि ॥ ^{२१} इगो खा खेम्नुड खोम खिमबेऱहाजि येसु चिक्सिऱ खडामि इन्ढोडहोड खो नाडबुइटे लुःसुजे ॥

^{२२} यरुसलेमबाड लेम्बऱआ यहुदि धार्मिक नियम इऱखुबा कोहिजिडेऱ चाहि “येसुबेऱ माडेऱमा चापमि हाडबा बालजिबुल पेःयुटे, मोमि सक्तिडेऱ इगोसेऱ माडेहा चाप यिइन्डुए” लुःसुजे ॥

^{२३} मोडोगेऱ येसुडेऱ माहा यहुदि धार्मिक नियम इऱखुबा केऱनुड खानवाबेऱ इडोऱ लुःसुजि, “सैतान खोम ताडबेऱ खोम टाडबा इन्डोऱटे यिक्हेन्डुए?” ^{२४} इक्को देसबेऱहा याऱमिजि खोजि टाडबानोऱ खिमिहोड, एक्साड मो देस नासि लिघेये ॥ ^{२५} फेरि इक्को खिमबेऱहा याऱमिजिसो खोजि टाडबा काक्खुसेऱ चुमिहोड माहाजिसो एक्साड नासि लिघेम्मे ॥ ^{२६} मोडोऱनोऱ सैतानमि राज्यबेऱसो खोजि टाडबा खिमिहोड खोजिटाडबानोऱ नासि लिम्मे ॥ ^{२७} असेऱसो छऱइये याऱमिमि खिमबेऱहा थोक नाप्खेऱमा याऱलो मो छऱइये याऱमि हिःक्मा खेये मोबाडरेऱ मो याऱमिबाड नाप्खेऱहेन्डुजे ॥

^{२८} “चैबानोऱ केऱ हेनिड लुःनिम्ने, याऱमिडेऱ लेऱऱपऱआ चोप पापनुड निवाहाड बिरोधबेऱ लेऱऱपऱआ पापमिसो आमलाड टोइये ॥ ^{२९} तर पबित्र होडनिवा सिःक्चाबऱआ पाप इन्डोऱपेऱसो आमलाड लिनिबा ॥ मो याऱमिमि पाप इन्डोऱपेऱसो आम्लाड लिनिबा ॥” ^{३०} येसुडेऱ इगो खानवा लुःसु, इन्ढोडहोड माहाजिडेऱ “येसुबेऱ माडेऱमा चाप टुये” लुःबऱआसेऱ खोसेऱ इगो खा लुःबऱआ लेटे ॥

येसुमि मामानुड निसाजि

(मत्ति १२:४६-५०; लुका ८:१६-२१)

^{३१} मोडोक्पेऱनोऱ येसुमि मामानुड निसा मोबेऱ लेस्सामि ॥ माहाजि पाखेऱयुनोऱ पेन्नुड येसु केऱऱसिऱ पाक्सुजि ॥

^{३२} येसुमि किरयुमिरयु बेऱलो याऱमिजि टुयामि ॥ मोबा माहाजिडेऱ येसु इडोऱ लुःसु, “गुरु, हेनेऱ मामानुड निसाजिडेऱ हेड पाखेऱयु

केःऱमेऱनिडसिम्मि ॥” ^{३३} येसुडेऱ लुःसु, “केए मामानुड निसाजि असाजिडे?”
^{३४} मोबा येसुडेऱ खोमि खिरिखिरि टुखुबाजि वाःप्नुड लुःसु, “केहा मामानुड
 निसा, नानुसाजि इघाजिनोऱ लेम्मे ^{३५} इन्ढोडहोड निवाहाडमि आग्याडेऱ
 लुःबऱआ खा खेम्नुड लेःऱखुबाजिनोऱ केहा मामानुड निसाजि लेम्मे ॥”

चरि टुप्पुबामि खानवा

(मत्ति १३:१-२३; लुका ८:४-१५)

४ ^१ येसुडेऱ फेरिसो गालिल वाबोक्लामि केक्पेऱ सिक्छे पिःबोक्पऱआ
 लेटे ॥ येसुमि किऱयु मिऱयु बेऱलो याऱमि सुम्बऱआसेऱ खो इक्को
 योडाखोडबेऱ साडनुड मो केक्बाड मेऱयोड खेऱनुड पेना ॥ सुम्बऱआ
 याऱमिजि चाहि वाबोक्कलामि केक्पेऱनोऱ पेनामि ॥ ^२ मोबा येसुडेऱ याऱमिजि
 बेऱलो खा खानवाबाड इःडुजि ॥ येसुडेऱ इडोऱ लुःसुजि, ^३ “खेप्सानुमे,
 इक्को याऱमि चरि टुप्सिऱ खडा ^४ चरि टुप्पाबेऱ कोहि चरि रामबेऱ सिऱटा
 मोबा इऱछोपेऱनोऱ सोडाजिडेऱ कुःप्चोबेसु ॥ ^५ कोहि चरि रुडगोऱवानुडमा
 भुमिबेऱ सिऱटा ॥ मोबेऱ आक्खामा माऱआडा चरिमि रिड केऱमागो चान्डोनोऱ
 कडा ^६ तर रिडमि सामडेऱ आक्खामा मेन्चुप्पऱआसेऱ नाम राःक्मासोरोऱ
 ओइला लिनुड हेघडा ॥ ^७ मोबा कोहि चरि चाहि चिजिडखाबेऱ सिऱटा,
 इऱयाक नियाक एक्साड चिजिड नाःपोक्नुड माहा केऱपऱआ डाड
 लिबऱआसेऱ चानोऱ मेकिक्सा ॥ ^८ तर कोहि चरि चाहि मोलनुडमा
 आक्खामाबेऱ सिऱनुड नुरोऱ कडानुड वाबोगा ॥ मोबा बिरुवाडेऱ तिस गुना,
 साठिगुनानुड सय गुना चा किक्सा ॥” ^९ मोबा येसुडेऱ लुःसु, “असा असामि
 नेएक, माहाजिडेऱ खेप्सानुमे ॥”

^{१०} येसु खोम दाडबा लिसेम्बाड येसुमि चोडसानुड खोजिमि
 लाडगामजिडेऱ येसुडेऱ लुःबऱआ खानवाडेऱ लुःमायोक्पऱआ खामि टुम्बेऱ
 सिप्सुजि ॥ ^{११} येसुडेऱ माहाजि लुःसुजि, “हेनिड चाहि निवाहाडमि राज्यमि
 टुम्बेऱहा खा लेमेऱपऱआ लेये ॥ तर पाखेऱयुहा याऱमिजि चाहि चोप खा
 खानवाबाड लुःमा खेम्मे ॥

^{१२} इन्ढोडहोड माहाजिडे? खाडगो खाडइन्दुजे तर खाडडोक्टुजिने, खेमगो खेमखाडइन्दुजे तर लेडोक्टुजिने॥” मोडो? लिमाहोड माहाजि टाडबामि पापि योम्बोक ले?नुड निवाहाडबे? लेस्सामि होला, मोबा निवाहाडडे? खोजिमि पापमि आम्लाड पि:सुजे होला॥”

^{१३} मोबा येसुडे? चोडसाजि सिप्सुजि, “इमा हेनिडे? इगो खानवाडे? लु:मा योक्प?आ मेलेसानुमे? मोडोहोडगो हाइखा खानवाडे? लु:मायोक्प?आ खा इन्डो?टे लेन्डानुमे? ^{१४} चरि टुप्खुबा लु:ब?आ निवाहाडमि बचन प्रचार ले:खुबा॥ ^{१५} इन्डो? या?मिमि निवाबे? इगो बचन राम केक्पे? सि?प?आ चरिडो?नो? लिये॥ मो बचन खेममासोरो? सैतानडे? निवाबाड कु:प्पेन्डुए॥ ^{१६} मोबा इन्डो? जनामि निवाबे? इगो बचन रुडगो?वानुडमा भुमिबे? सि?प?आ चरिडो? लिये॥ माहाजिडे? निवाहाडमि बचन खेममासोरो? साप्थाडमानुड बिस्वास लेन्डुजे॥ ^{१७} तर माहाजिडे? मो बचन निवाहोडबे? मेयुडब?आसे? माहाजिडे? बिस्वासगो ले:न्डुजे तर आद्रे?वा खेनुड कस्टबे? बिस्वास ले?पेन्डुजे॥

^{१८} इन्डो? जना या?मिजिमि निवाबे? इगो बचन चिजिडखाबे? सि?प?आ चरिडो? लिये॥ ^{१९} मोबा माहाजिडे? निवाहाडमि सिक्छे खेमगो खेमइन्दुजे तर इगो माक्खाम्डेमबे?हा सुर्ता, साक्चाडमि नाम्नावाडे? मो बचन मिन्डेन्डुजे मोबा इक्कोसो चा किडनिबा॥ ^{२०} इन्डो? या?मिजिमि निवाबे? इगो बचन मोलनुडमा भुमिबे? सि?प?आ चरिडो? लिये॥ माहाजिडे? निवाहाडमि बचन खेमइन्डुजे मोबा तिस गुना, साठि गुनानुड सय गुना चुरोक चा किडइये॥”

कुप्पिमि खानवा

(लुका ८:१६-१८)

^{२१} येसुडे? लु:घे?टु, “कुप्पि उ:प्नुड असे?टे पाथिडे? ओप्डुए अथवा खाटहोडबे? युडइन्डुए? आक्टो? लेटुजिने, कुप्पि उ:प्नुडगो अग्लो ठाउबे?कोरे युडइन्डुजे॥ ^{२२} चुम्युडब?आ चोप थोक चोपमि पोम्बे? खाडमुहा, लेहेनिहा चोप खा लेहे॥ ^{२३} नेएक काप्खुबा चोबे? खेप्सानुमे!”

२४ मोबा येसुडेऱ इडोऱ लुःसुजि, “हेनिडेऱ खेम्बऱआ खाबेऱ नुरोऱ निवा टिसानुमे! हेनिडेऱ इन्डोऱ सिःक्नुड हाइखाजि पिःन्डानुम, मोसेऱनोऱ सिःक्नुड हेनिडसो पिःम्मे॥ आक्टोऱरेऱ नेऱनि मोबाडसो चुरोक पिःम्मे॥
२५ इन्ढोडहोड असानुड टुहा, मो भना बेऱलो पिःये, तर असानुड माऱआहा, खोसेऱ काप्मिन्डुहा अडेऱवासो नाप्खेहा॥”

चरिमि टुम्बेऱहा खा

२६ येसुडेऱ फेरि लुःसु, “निवाहाडमि राज्य लुःबऱआ इक्को याऱमिडेऱ सोवराबेऱ चरि टुप्पऱआडोऱनोऱ लेये॥

२७ मो याऱमि इम्होडसो, पुकेऱहोडसो सोवराबेऱ टुप्पऱआ चरि सेन्डा लेन्डा केऱनुड वाबोऱइहा॥ तर इडोऱ इन्डोऱ लिसे, लुःनुड खोसेऱ लेसुने॥

२८ आक्खामा खोमदाडबेऱ चरि केऱमेन्डुए मोबा चा किडइये टोडइन्डुए॥ इडोऱ याऱलो रिड केऱएये, ताम वाबोक्इये मोबा एक्साड खाऱवा केऱएये॥

२९ अन्न टुम्नुड एक्साड मो सोवरादाडबेऱ खोऱइडेऱ अन्न हेऱइन्डुए इन्ढोडहोड माहा अन्न हेक्मा बेला लिघेऱपऱआ लिये॥”

पारसाइमि चरि

(मत्ति १३:३१-३२, ३४; लुका १३:१८-१९)

३० फेरि येसुडेऱ लुःसु, “निवाहाडमि राज्य हाइखा इमाडडोऱ लेये लुःनुड लुःमे? अथवा हाम्बे खानवाबाड इगोमि टुम्बेऱ लुःमे? ३१ इगो इडोऱ लेये॥ पारसाइमि चरि माक्खाम्डेमबेऱ चोपबाड एडेऱमा चरि लेये॥ इक्को याऱमिडेऱ मो चरि सोवराबेऱ टुप्पऱइन्डुए॥ ३२ मो वाबोक्नुड बेऱए आऱवानुडमा डाड लिये॥ इगोमि बेऱहा बेऱहा हागा लिहा मोबेऱ सोडाडेऱ हाप टिनुड पेडइम्मे॥” ३३ याऱमिजिडेऱ निवाहाडमि सिक्छे लेसुमिरो लुःनुड इडोऱहा बेऱलो खानवा लुःबेऱटुजि॥ ३४ याऱमिजि सिक्छे पिःमाबेऱ खानवाबाडनोऱ इःडुजि॥ तर खोमि चोडसाजिरेऱ टुमाबेऱ चाहि खानवाडेऱ लुःमा योक्पऱआ खा इःबेऱटुजे॥

येसुडेङ वाडुम योड उःक्मेऱट्टु

(मत्ति ८:२३-२७; लुका ८:२२-२५)

^{३५} मो युडाराजि येसुडेङ खोम चोडसाजि लुःसुजि, “लो आबानिडे, हागो कानिड माहोडमामि मेऱएरेड खडि ॥” ^{३६} चोडसाजि मोबेऱ सुम्बऱआ बेऱलो याऱमिजि याःऱयानुड येसु साडबऱआ योडा जहाजबेऱ साक्सामि मोबा येसु चिक्नुड मेऱएरेड खेऱमामि पोरोगामि ॥ माहाजिनुड हाइखासो योडाखोड टुसाहा ॥ ^{३७} हाजोक्टोऱ वाबोक्लाबेऱ बेऱए फुइक्सुमा यिक्पोगा मोबा फेडलेवा राप्पोक्नुड योडा जहाज इऱठुप योडा चिप्सिऱपोरोगा ॥ ^{३८} येसु चाहि योडा जहाजमि एडगुवाराम खेऱनुड टेखोड कोडमानुड इम्मेऱनिडसिडे ॥ मोबा चोडसाजिडेऱ खो हुम्बोक्साड लुःसुजि, “गुरु, कानिडगो सिसिऱपोगिडमा, हेड लेऱखो माये?”

येसुडेङ फुइक्सुमानुड फेडलेवा वोप्पऱआ

^{३९} येसु नुड फुइक्सुमानुड फेडलेवा वोःप्साड लुःसु, “योड उगे!” मोडोक्पेऱनोऱ फुइक्सुमा एऱयुसा मोबा योड उगा ॥ ^{४०} येसुडेङ चोडसाजि लुःसुजि, “हेनिड इन्ढोन्डे किऱसिन्डानिडे? खोइडे हेनिडमि बिस्वास?” ^{४१} मोबा माहाजि खरि मिन्नुड किऱसिसाड खोजि टाडबा कासामि, “असाडे? खोसेऱ लुःबऱआ खागो फुइक्सुमानुड फेडलेवेऱसो खसिम्मे ले!”

माडेऱमा चाबेऱ चुप्पऱआ याऱमि

(मत्ति ८:२८-३४; लुका ८:२६-३६)

५ ^१ येसु खोम चोडसाजिनुड गालिल वाबोक्लामि मेऱएरेडलाम गेरासेनस ठाउबेऱ लेस्सा ॥ ^२ येसु योडाखोडबाड ओर्ललिमा सोरोऱ माडेऱमा चाबेऱ राःऱपऱआ इक्को याऱमि येऱमा खाबाड खो चुप्सिऱ लेस्सा ॥ ^३ मो याऱमि येऱमाखाबेऱ पेने ॥ मो याऱमि चेक्चिमि साडलाडेऱ हिःक्माबेऱसो मेऱहिःक्युडहेबऱआ लेटे ॥ ^४ बेऱलो खेप खो चेक्चिमि कोडडेऱ घिगुजि तर खोसेऱ माहा टेऱनुड चिःखडे ॥ असेऱसो खो मेऱेऱयुडहेसुजि ॥ ^५ खो

सानिडनोऱ टाडबामि हिडाबेऱ रुडगुवाडेऱ खिक्साड, येऱमाघाराजि वोसाड रामडुसे ॥

^६ खोसेऱ ओबाडनोऱ येसु खाडडोकमा सोरोक पिडसाड आप्नुड येसुमि पोम्बेऱ टुमुगेऱठोकनुड, ^७ वोसाड लुःसु, “हे येसु, बेऱए निवाहाडमि पसा, हेनेऱ का इमा लेऱऱमा योडटुए? निवाहाडमि निडबेऱ केऱ बिन्ति लेऱन्ने, का दुःख एऱपिःमा ॥” ^८ इन्ढोडहोड येसुडेऱ मो माडेऱमा चाप याऱमिबाड खेप्पेसे लुःबऱआ लेऱऱे ॥” ^९ मोबा येसुडेऱ सिप्सु, “हेनेऱ निड इमाडडे?” मो लुःसु, “केऱए निड फौज, इन्ढोडहोड कानिडगो बेऱलो टुन्डिडमा ॥” ^{१०} मोबा मो मडेऱमा चापडेऱ येसुनुड बिन्ति लेऱऱे, “कानिड इगो ठाउबाड एयिक्मायो ॥”

^{११} मो टोकटोकमामि एम्लेडबेऱ आक्मामि बगाल टुसामि ॥ ^{१२} मोबा माहा माडेऱमा चापजिडेऱ इडोऱमा बिन्ति लेऱऱे, “कानिड आक्खा आक्माजि होडसिऱयु पेखेऱमेऱमाना ॥”

^{१३} येसुडेऱ माहा माडेऱमा चापजि खेप्पेसानिडे लुःसुजि, मोबा माहाजि आक्माजिबेऱ पेखडामि ॥ माहा नि हजार (२०००) आक्माजि डाडसाड याक्फुबाड मिम्मु योडाबेऱ हुम्सिघडामि ॥

^{१४} इडोऱमा खा खाडनुड आक्मा गोठलाजि चिखेऱनुड खिमडेमनुड सहरबेऱहा याऱमिजि खेम्मेऱटुजि मोबा बेऱलो याऱमिजि खाडसिऱ येसु टुढामबेऱ लेस्सामि ॥ ^{१५} माहा लेडखुबा याऱमिजिडेऱ मो मडेऱमा चापडेऱ राःप्नुड नाडडुखुबा याऱमि नुबोकनुड येसुमि केक्पेऱ पेम्बऱआ खाडडोकटुजि ॥ मोबा खोजि बेऱलो खरि मिन्नुड किस्सिडामि ॥ ^{१६} इगो खा खाडखुबाजिडेऱ मो याऱमिनुड आक्माजिमि टुम्बेऱ लिबऱआ खा हाइखा याऱमिजिसो इःबेऱटुजि ॥ ^{१७} इडोऱमा खा खेम्नुड मोबेऱहा याऱमिजिडेऱ येसु हेड कानिडमि ठाउबाड खेऱप्पेसे लुःनुड बिन्ति लेऱऱे ॥

^{१८} येसु खेऱमामि योडाखोडबेऱ साडसिऱपोरोक्माबेऱ मडेऱमा चाबेऱ लेऱनुड नुबोकपऱआ मो याऱमिडेऱ “कासो हेडनुड सोरि चिक्खेऱमाना” लुःनुड बिन्ति लेऱऱे ॥ ^{१९} तर येसुडेऱ मो याऱमिखोनुड मेऱआप्पेऱसाड इडोऱ लुःसु, “हेड आम्मि खेऱनुड डेऱ हेनेऱए जिबनबेऱ लेऱऱपऱआ योम्बोक मोबा खोमि दयानुड

खा हेनेहा खिमबेहहाजिनुड चोप लाडगामजि लुःबेटाजे॥” २० मोबा मो यात्रमि मो ठाउबाड खोमि खिम खेऱनुड खोमि जिबनबेह लेऱपऱआ बेहए योम्बोकमि टुम्बेह डिकापोलिसबेहहा यात्रमिजि खेम्मेऱसाड राम्दुसा॥

याइरसमि मेऱनामि पसानुड इक्को टुक्खुबा मेऱनामि

(मत्ति ६:१८-२६; लुका ८:४०-५६)

२१ येसु फेरि माहोडमामि केऱरेडलाम टेआबा मोबेऱनोऱ बेऱलो यात्रमिजि खोमि किऱयुमिऱयु सुप्सामि॥ येसु चाहि माहोडमामि केक्पेऱनोऱ टुसे॥ २२ यहुदि सुम्ढाम खिमबेहहाजिबाड इक्को सासक याइरस निड लेऱऱखुबा यात्रमि लेन्नुड येसुमि पोम्बेह उःक्यु॥ २३ मोबा खोसेऱ येसु इडोऱ लुःसाड बिन्ति लेऱटु, केऱ एडेम्मा मेऱनामिपसा टुक्मेऱ सिंसिऱपोरोइटे॥ हेड लेन्नुड हेनेऱ हुगेऱ केक्नुड नुबोकपेऱमाना॥”

२४ मोबा येसु मो यात्रमिनुड सोरि खडा॥ बेऱलो यात्रमिजि खोमि एडगुवा एडगुवा खेऱनुड येसुमि किऱयु मिऱयु सोक्सि सोक्सि टुसामि॥ २५ माबेह इक्को मेऱनामिसो टुसे खो हरि खेऱमे टुक्मावेऱ राःप्पऱआ बारो निड लिघेऱपऱआ लेटे॥ २६ खोसेऱ बेऱलो खेऱ सिडा लेऱऱखुबाजिनुड खेऱनुड खोनुड टुहा चोप याड रुक्पेसु तर खो नुबुकमागो नेऱनि भना मेऱयोड लिबऱआ लेटे॥ २७ खोसेऱ हाइखा यात्रमिजिबाड येसुमि टुम्बेह खेम्बऱआ लेटे॥ मोडोगेऱ खोसो बेऱलो यात्रमिजि सुम्बऱआजिनुडनोऱ खेऱनुड येसुमि एडगुवारामबाड खोमि लाऱलिडमि फुर्का केगु॥ २८ इन्ढोडहोड “येसुमि चेऱरेऱ सुबुडहोडसो का नुघेडे” लुःनुड खोसेऱ बिस्वास लेऱटुए॥ २९ चैबानोऱ खोसेऱ येसुमि चेऱ सुऱमासोरोऱ खोमि हरि खेऱमा नुबुगा॥

३० मोडोकपेऱनोऱ येसुडेऱ खोमि हिडाबाड नुबोकमे बोल पेखेऱपऱआ लेडोकनुड एडगुवालाम हिघेऱनुड यात्रमिजि इडोऱ लुःसाड सिप्सुजि, “असेऱटे केऱ चेऱ सुबुए?”

३१ येसुमि चोडसाजिडेऱ खो लुःसुजि, इद्रेऱलो यात्रमिजि हेनेऱ खिरिखिरि टुम्मे, रोसो हेनेऱ लुःन्दुए ‘का असेऱ केगिडे?’”

^{३२} तरसो असेऱ सुबिडे लुःनुड येसुडेऱ किर्यु मिर्यु वाःप्पोगु ॥ ^{३३} मोबा मो मेऱनामि हिडाबेऱ लिबऱआ खा मिरनुड खो किरसिसाड येसुमि पोम्बेऱ टुम्रुगेऱ ठोःक्नुड चोप खा येसु लुःबेऱटु ॥ ^{३४} मोबा येसुडेऱ मो मेऱनामि लुःसु, “नानि, हेनेऱ बिस्वासडेऱ हेड नुबोइटे ॥ ढुक्क लिनुड खडे ॥ हागो हेड नुबोइटे

^{३५} येसुडेऱ इडोऱ लुःमेऱनिडसिमाबेऱ याइरसमि खिमबाड कोहि याऱमिजि इडोऱमा लाम्बावा लुःसिऱ लेन्नुड लुःसु, “मालिक, हेनेऱ मेऱनामि पसागो सिघडा ॥ हागो गुरु इन्ढोड दुःख पिःमे?” ^{३६} तर माहाजिडेऱ लुःडिडबऱआ खामि येसुडेऱ लेऱखो मेलेटुनुड याइरस लुःसु, “हेड ँक्किसिने, बिस्वासरेऱ लेटे ॥”

^{३७} मोबा येसुडेऱ पत्रुस, याकुबनुड याकुबमि निसा युहन्नारेऱ खोमि सोरि चिऱखेऱटुजि ॥ ^{३८} खोजि याइरसमि खिम रुक्माबेऱको याऱमिजि निवा टुःक्साड हाःप्मेऱनिडसिबऱआ येसुडेऱ खाडडोक्कु ॥ ^{३९} मोबा येसु खिमहोडसिर्यु पेऱन्नुड माहाजि लुःसुजि, “हेनिड इन्ढोड इडोऱ खायोक् मायोक् लेऱऱसाड हाःप्मिन्डानिडे? इगो पिऱछा मेऱन्सिघेऱटिऱ ॥”

^{४०} इगो खा खेम्नुड माहाजिडेऱ येसु यिटेगुजि ॥ तर येसुडेऱ चोप याऱमिजि पाखेऱयु पाक्सुजि ॥ मोबा मो पिऱछामि पाबानुड मामा येसुनुड सोरि खेऱखुबा सुम्बाड चोडसाजि चिक्मानुड पिऱछा टुढाम होडसिर्युए कोठाबेऱ खो खडा ॥ ^{४१} येसुडेऱ मो पिऱछामि हुक राःप्साड लुःसु, “तालिता कुमि” इगो लुःबऱआ “होउ नानि, पुकाडे!” ^{४२} मोबा मो मेऱनामि पिऱछा सुवाक्टोऱ पुकेऱनुड किर्यु मिर्यु रामबुगा ॥ इडोऱमा खा खाडनुड माहाजि खरि मिनामि ॥ [मो पिऱछा बारो निडमा लेटे] ^{४३} तर येसुडेऱ इगो खा असासो ँऱलुःमे लुःनुड आग्या पिःसुजि ॥ मोबा मो पिऱछा इमाड इमाड चामा पिःसानुमे लुःसुजि ॥

नासरतबेह्रा यात्रमिजिडेह्र येसु बिस्वास मेलेःत्रपत्रआ

(मत्ति १३:५३-५८; लुका ४:१६-३०)

१ मोबा येसु मो ठाउ लेप्पेनुड यात्रलो टाडबा हुर्कबा लिबत्रआ सहर
 ६ नासरतबेह्र खडा ॥ खोमि चोडसाजिसो खोनुडनोत्र खडामि ॥ २ नाजामे
 यिडेह्र येसुडेह्र यहुदिजि सुम्हाम खिमबेह्र खेत्रनुड इत्रपोगुजि ॥ खोसेत्र
 इःत्रपत्रआ खेमखुबा चोप यात्रमिजि खरि मिन्साड खोजि टाडबा इडोत्र
 काबोगामि, “इगो यात्रमिडेह्र इघा चोप खा हाम्बाड चुप्टुहा हा? इन्डोत्रटे
 इन्डोत्रमा निवाडे इगो पिःसुजे? इडोत्रहा बेह्रानुड खरिहा योम्बोक इगोमि
 हुगेत्र लेःत्रहेन्दुहा? ३ इगोगो मो मरियम लुःमे मेत्रनामिमि पसा सिडनुड
 रुडगोत्रवामि योम्बोक लेःत्रखुबा नेत्रनेन्डे? इमा इगो याकुब, योसेफ,
 यहुदानुड सिमोनमि वावा नेत्रनेन्डे? इगोमि सामसुवमा निसाजिसो इगोबेह्र
 कानिडनुडनोत्र टुम्मे!” इडोत्र लुःसाड येसुडेह्र लेःत्रपत्रआ योम्बोक खाडनुड
 बिस्वास मालेःटुजि ॥

४ मोबा येसुडेह्र माहाजि लुःसुजि, “अगमबक्ता हाइखा ठाउबेह्रहा
 यात्रमिजिडेह्र आदर लेःन्दुजे तर खोमि खिमबेह्रहाजि, टाडबाडजि,
 माक्खमडेमबेह्रहा यात्रमिजिडेह्र चाहि खो आदर लेःटुजिने ॥” ५ मोबेह्र येसुडेह्र
 कोहि कोहि टुक्खुबाजिसोक्पेह्र हुकयुडनुड नुबोगुजि ॥ मोबाड हाइखा
 इमाडसो खरिहा योम्बोक मेलेःत्रहेसु ॥ ६ मोबा खोमि खिमडेमबेह्रहा यात्रमिजि
 बिस्वास मेत्रनिडहाजि टुबत्रआ खाडनुड येसु खरि मिना ॥

येसुडेह्र चोडसाजि प्रचार लेःत्रसिफ्र पाडबत्रआ

(मत्ति १०:५-१५; लुका ९:१-६)

॥ मोबा खो खिमडेमराजि सिक्छे इःत्रसाड खडा ॥ ७ खोसेत्र खोमि बारो
 जना चोडसाजि केडुजिनुड माडेहा चापसोक्पेह्र अधिकार लेःत्रमे बोल
 पिःनुड माहाजि निप्पाड निप्पाड पाक्सुजि ॥ ८ हेनिडेह्र रामबेह्र पाप्मिहा
 इक्को “टोडइराबाड हाइखा थोक चामाहा खा, सुप मोबा थोडमाइबेह्र याड

इमाडसो एक्खिमे ॥ ६ सराडबेह राडसुप चाक्सानुमे मोबा चाडबहआ चेहबाड हाइखा एक्खिसानुमे ॥”

१० येसुडेह माहा याहमिजि हागोसो लुःसुजि, “हेनिड खेहनुड याहलो हाम्बे खिमबेह पेखेन्डडानिड मो ठाउ म्लेप्पेरो मो खिमबेहनोह पेनानिडे ॥ ११ इडोह हेनिड खेहमाबेह मो ठाउबेहहा याहमिजिडेह हेनिड स्वागत म्लेःहमिहोड मोबा हेनिडमि खा मेखेप्सुजिहोड माहाजिमि खिमडेमबाड खेहमाबेह हेनिडमि साराड फेकबेहहा किःक्पहआ धुलोडेह खोजिमि बिरोधबेह गबाहि लागि पिःमामि मोबेहनोह फाप्यूडआमे ॥”

१२ मोबा एकसाड चोडसाजि खेहनुड याहमिजि “पापबाड निवाहाडलाम टेसानिडे” लुःसाड प्रचार लेटुजि ॥ १३ माहाजिडेह माडेहा चापजिडेह राःपहआ याहमिजिबाड माडेहा चापजि यिगुजि मोबा टुक्खुबाजि केवा सिःटिनुड नुबोगुजि ॥

बप्तिस्मा पिःघुबा युहन्ना सेहनेबहआ खा

(मत्ति १४:१-१२; लुका ९:७-९)

१४ हाडबा हेरोदडेहसो चोपराजि येसुमि निड मुक्पहआ खेम्डोक्टु ॥ इघा खा चोपराजि मुक्खडा इन्डोक जनाडेह इडोह लुःसुजि, “बप्तिस्मा पिःखुबा युहन्ना सिबहआबाड हिडबोइटा, मोडोगेहनोह खोबाड इडोहहा सक्तिनुडहा योम्बोक लिमेहनिडसिये ॥” १५ तर इन्डोह जनाडेह चाहि लुःसुजि, “इगो एलिया लेए” फेरि हाइखाजिडेह लुःसुजि, “इगो गो उहिलेहा अगमबक्ताडोहमा इक्को लेए ॥” १६ तर हेरोदडेह इगो खा खेम्नुड लुःसु, “इगोगो युहन्ना लेये, इगोमि निन्डावा केहनोह चेम्मेहपहआ, मोनोह हिडबोइटा ॥”

१७-१८ इन्ढोडहोड हेरोदडेह खोम्निसामि ठाहमा हेरोदियास लुःमे मेहनामि खोसेह फुडसया लेःहपहआ लेटे ॥ तर युहन्नाडेह हेरोद इडोह लुःबहआ लेटे, “आमनिसा फिलिपमि ठाहमा हेनेह युडमा नुबा लिनिबा ॥” मोडोगेह हेरोदडेह

हेरोदियासमि लागि युहन्ना यात्रमिजि राःप्मेनुड तिरोडगा खिमबेः सेक्पःआ लेटे ॥

^{१९}युहन्नाडेः मोडोः लुःबःआसेः खोनुड हेरोदियास सुरकेःपःआ लेटे ॥ खोसेः युहन्ना सेःनेमा मिःटुए तर मेःसेःहेबःआ लेटे ॥ ^{२०}इन्डोडहोड हेरोद युहन्नानुड किस्सिडेनुड खो मेःलेःःटुए ॥ खोसेः युहन्ना धर्मिनुड पबित्र यात्रमि लेये लुःनुड लेसुए ॥ हाडबा हेरोदडेः युहन्नामि खा खेम्माबेः खो बेःलो किःसिडे तरसो खोमि खा नुरोः निवा टिनुड खेःप्सुए ॥

^{२१}मोबा नुबा बेला लेस्सा इःयाक हाडबा हेरोदडेः टोकपःआ याकमि बेःए भतेर टिसु ॥ मो भतेरबेः बेःहा बेःहा सासकजि, येरिडजिमि एप्पाजि मोबा गालिलमि बेःहा बेःहा यात्रमिजि केःपःआ लेटामे ॥ हेरोदियासडेः खोमि खा हेरोदनुड लुःडोक्टु ॥

^{२२}हेरोदियासमि इक्को मेःनामि पसा टुसे ॥ मो भतेरबेः मो पसा हेरोदनुड खोमि चाबाडजिमि लागि सिम्आसा ॥ मोसेः सिम्आबःआ हेरोदडेः सारो नेन्जानुड लुःसु, “लुःसे, आयु हेनेः कानुड इमाड थोक डागुहोडसो केः हेड पिन्ने ॥” ^{२३}फेरिसो हाडबा हेरोदडेः हेन्जुड हेन्साड इडोः लुःसु, “हेनेः कानुड केःए राज्यमि हेक डागुहोडसो पिःन्ने ॥”

^{२४}मोबा मो पिच्छाडेः खोम्माबेः लेन्नुड सिप्सु, “मामा, आयु केः इमाड डाःकमे?” खोम्मेः लुःसु, “बप्तिस्मा पिःखुबा युहन्नामि निन्डावा डागे!”

^{२५}मोबा सोरोःनोः मो पिच्छा हाडबा हेरोदबेः टेजानुड इडोः लुःसु, का हागोनोः बप्तिस्मा पिःखुबा युहन्नामि निन्डावा थालाबेः युडनुड पिःमा ॥”

^{२६}इगो खा खेम्नुड हाडबा हेरोद बेःए सोकबेः सिट्टा ॥ मोदेःलो चाबाडजिमि पोम्बेः पिःन्ने लुःनुड हेन्जुड हेम्बःआसेः आक्कोगो पिःनानि मेःलुःहेसु ॥

^{२७}मोडोक्पेःनोः हाडबेः खोमि येरिड लुःसु, “खेःनुड युहन्नामि निन्डावा चेडआप्टे ॥” मोबा मो येरिड तिरोडगा खिमबेः खेःनुड युहन्नामि निन्डावा चेनु ॥ ^{२८}मोबा थालाबेः युडनुड युहन्नामि निन्डावा लाजेःनुड मो पिच्छा पिःसु ॥ मो पिच्छाडेः चाहि लाघेःनुड खोम्मा पिःसु ॥

^{२६} इगो खा खेम्नुड युहन्नामि चोडसाजि तिरोडगा खिमबे लेन्नुड खोमि सिजिक् लाघेऱनुड येऱमाबे युक्सुजि ॥

येसुडेऱ डाउम हजार याऱमिजि हिडबऱआ

(मत्ति १४:१३-२१; लुका ९:१०-१७; युहन्ना ६:१-१४)

^{३०} मोबा बारो जना चोडसाजि येसु टुढामबे टेजानुड खोजिडेऱ लेऱपऱआ चोप योम्बोकमि टुम्बे खो खेम्मेऱटुजि ॥ ^{३१} मोबा येसुडेऱ माहा चोडसाजि लुःसुजि, “कानिड सडगसुमा ठाउबे खेऱनुड इऱछोऱ नाजामा ॥” इन्ढोडहोड मोबे बेऱलो याऱमिजि लेस्सामेनुड खडामेसेऱ येसुनुड चोडसाजिडेऱ चामासो मेन्चाडोक्पऱआ लेटे ॥

^{३२} मोडोगेऱ खोजि योडाखोडबे साडनुड खुस्त्रिडमु सडगासुमा ठाउबे खडामि ॥ ^{३३} येसुनुड खोमि चोडसाजि खेऱमेऱनिडसिबऱआ हाइखा याऱमिजिडेऱ खाडडोक्नुड खोजि खेऱमेऱनिडसिबऱआ ठाउ चोबे लेडोक्टुजि ॥ मोबा चोप सहरबाड बेऱलो याऱमिजि पिःन्साड खेऱनुड खोजिबाडसो याऱलो मो ठाउबे रुक्टुजि ॥ ^{३४} येसु मो ठाउबे रुक्नुड योडाखोडबाड ओर्लबालिमाबे बेऱलो याऱमिजि गोठला मेऱनिडहा सामुजिडोऱ मोबे सुम्बऱआ खाडडोक्नुड खोमि निवा नामनावेऱ टिबु ॥ मोबा येसुडेऱ माहाजि बेऱलो खामि टुम्बे इःडुजि ॥

^{३५} युडा लिसिऱपोरोक्पऱआ खाडनुड चोडसाजिडेऱ येसु इडोऱ लुःसुजि, “इगो ठाउसो साडगासुमा लेये हागोगो युडा लिसिऱपोरोइटा ॥ ^{३६} इघा याऱमिजि बिदा पिःसाजे ॥ खोजि दाडबा किऱयुमिऱयु खेऱनुड इमा इमा इन्जामिरो ॥”

^{३७} येसुडेऱ माहाजि लुःसुजि, “हेनिडेऱनोऱ खोजि चामा पिःसानुमे ॥” चोडसाजिडेऱ येसु लुःसुजि, “इमा कानिडेऱ निच्चि सय सिसेडमि याडेऱ चारेपा इन्जेऱनुड इघा याऱमिजि हिडमाहाजि?” ^{३८} येसुडेऱ माहाजि सिप्सुजि, “हेनिडनुड इन्डोक गोटा चारेपा टुहा? खाडखाक्सानुमे!” चोडसाजिडेऱ खाडनुड येसु लुःसुजि, “डाउम गोटा चरेपानुड निच्चि डा टुउ!”

३६ मोबा एक्साड येसुडेण याणमिजि डेड डेड फिरिरिमा चउरबेण पेम्मेण्टानुमे लुःनुड चोडसाजि लुःसुजि ॥ ४० चोडसाजिडेण याणमिजि सये सयेनुड डाक्पोड डाक्पोड जना डेड डेड पेम्मेण्टुजि ४१ मोबा येसुडेण माहा डाउम चारेपानुड निच्चि डा याडमानुड थाडसिरिण्टु खाडसाड निवाहाडडनुड आसिस डाःगु मोबा चरेपा टुक्रा टुक्रा एणुड चोडसाजि हामेण्टुजि ॥ मोडोणनोण खोसेण माहा निणचि डासो हामेण्टुजि ॥ ४२ मोबा चोबेण उक्खारो चोसुजि ॥ ४३ मोबा चोडसाजिडेण एम्बणआ चरेपानुड डामि टुक्रा सुम्माबेणको बारो डालो लिसा ॥ ४४ मोबेण चाघुबाजि वाडाडपसाजिरेणनोण डाउम हजारडोक टुसामि ॥

येसु योडासोक्पेण राम्बणआ

(मत्ति १४:२२-३६; युहन्ना ६:१५-२१)

४५ मोबासोरोण येसुडेण खोमि चोडसाजि योडाखोडबेण साडनुड मेणएरेड बेथसेदा लुःमे ठाउबेण खोबाड याणलो पाक्सुजि ॥ मोबा खोसेण चाहि सुम्बणआ याणमिजि बिदा लेःणसिण मोबेण पेडयागा ॥ ४६ माहाजिनुड बिदा लिनुड एक्साड येसु चाहि टोक्टोक्मेण्टु प्रार्थना लेःणसिण सक्सा ॥ ४७ युडारोसो येसु खोमदाडबा माहोडमि केक्पेणनोण टुसे ॥ मोडोक्पेण चोडसाजि साडबणआ योडाखोड चाहि माहोडमामि रुम्बेण रुक्खेणपणआ लेटे ॥ ४८ येसुडेण खाडमाबेण चोडसाजि योडाखोड खिःक्मा सारो सिणपणआ खाडडोक्टु ॥ इण्ढोडहोड खोजिमि योडाखोडमि हाइकेलामबाड हिणवाबा लेम्मेणनिडसिडे माक्मिमि सुम्बोड काबणआ लेटे येसु चोडसाजिबेण योडासोक्पेण राम्साड खेणनुड खोजिबाड पोम्बेण येडघेणमा योगा ४९ चोडसाजिडेण येसु योडासोक्पेण राम्मेणनिडसिबणआ खाडडोक्नुड “सिरावा लेण!” लुःनुड वोबुगामि ॥ ५० इण्ढोडहोड माहाजि मो खाडनुड सारोणोण किस्सिबणआ लेटामे ॥ मोबा सोरोक्नोण येसुडेण माहाजि लुःसुजि, “एक्किसिसानिडे, का ये, आट लेटानिडे!” ५१ मोबा एक्साड येसु चोडसा टुबणआ योडाखोडबेण साक्सा हिणवाबासोड एण्युसा ॥ इडोणमा खाडनुड

चोडसाजि भना खरि मिनामि ॥ ^{५२} इन्ढोडहोड चारेपामि टुम्बे लुःबऱआ खा चोडसाजिडेऱ मालेबऱआ लेटे ॥ इन्ढोडहोड खोजिमि निवा रुडगोऱवाडोऱ छाकटुवाक लिबऱआ लेटा ॥

^{५३} मोबा येसु खोजिनुड माहोडमा मेऱएरेड गनेसरेत लुःमे ठाउबेऱ रुक्नुड चोडसाजिडेऱ योडाखोड माहोडमामि केक्पेऱ युक्सुजि ॥ ^{५४} येसुनुड खोम चोडसाजि योडाखोडबाड पाखेऱयु आऱमासोरोऱ याऱमिजिडेऱ येसु लुःनुड लेबेसुजि ॥ ^{५५} मोबा माहा याऱमिजिडेऱ येसु लेम्बऱआ खा चोप याऱमिजि लुःबेऱटुजि ॥ मोबा हाम्बेऱ हाम्बेऱ येसु टुउ लुःनुड खेप्सुजे मोबेऱ मोबेऱ याऱमिजिडेऱ खोजिमि टुक्खुबाजि लुडघाक्नुडनोऱ खिजेऱपोगुजि ॥ ^{५६} इडोऱ येसु हाम्बे हाम्बे खिमडेमनुड, सहरराजि खडे मोबेऱ याऱमिजिडेऱ खोमि राम केक्पेऱ टुक्खुबाजि युडबेऱटुजे ॥ “मो याऱमिजिडेऱ येसुमि चेऱरेऱनोहोडसो केक्नुड नुबोकमामि लागि केक्मा पिःमा” लुःनुड खोनुड बिन्ति लेःटुजि ॥ मोबा खोमि चेऱरेऱ केक्खुबाजिसो चोप नुबोगामि ॥

रितिथितिमि टुम्बेऱ सिक्छे

(मत्ति १५:१-९)

^१ यरुसलेम सहरबाड लेम्बऱआ फरिसिनुड यहुदि धार्मिक खा **७** लेघुबाजि येसुमि खिरिखिरि सुप्सामि ॥ ^२ मोबा येसुमि कोहि चोडसाजिडेऱ हुक मेवसोकलेऱ चामेऱनिडसिबऱआ माहाजिडेऱ खाडडोक्टुजि ॥ ^३ इन्ढोडहोड यहुदि फरिसिजिनुड हाइखा यहुदिजि खोजिमि टुबालाबाजिमि पालोबाड लेःऱचेऱपऱआ चलनडोऱ नुरोऱ हुक मेवसोकलेऱ चोसुजिनि ॥ ^४ खोजि हाटाबाड लेन्नुड नुबाबा मेऱलिरेऱ चामिने ॥ इडोक्रेऱनोऱ नेऱनि, खोजिडेऱ इडोऱहा बेऱलो चलन लेन्डुजे अथवा खोरियानुड खोडखोरिया कासे खोडखोरिया चोखो लेःऱनुडरेऱ चोन्डुजे ॥

^५ मोबा फारिसिनुड सास्त्रिजिडेऱ येसु सिप्सुजि, “हेनेहा चोडसाजि टुबा पाबाजिडेऱ लेःऱपऱआ चलनडेऱ लुःबऱआडोऱ असुद्ध हुक सुद्ध मेन्टोडलेऱ चाम्मे?”

६ मोबा येसुडेऱ माहाजि लुःसुजि, “अगमबक्ता यसैयाडेऱ हेनिड कप्टिजिमि टुम्बेऱ ठिकै साप्मिटुए ‘इघा याऱमिजिडेऱ याबुगेऱरेऱ का आदर लेःम्मे, तर खोजिमि निवा चाहि काबाड ओः तुहा ॥ ७ इघाजिडेऱ मेऱनोऱ काडमि ओहाड लेःन्दुजे इन्ढोडहोड इघाजिडेऱ इःऱमाबेऱ याऱमिजिडेऱ टोडबऱआ नियमरेऱनोऱ इन्दुजे ॥ ८ हेनिड निवाहाडडेऱ पिःबऱआ आग्या चाहि लेःटानुमनि, याऱमिजिडेऱ इःऱपऱआ नियम चाहि पानला लेःन्डानुमे ॥”

६ येसुडेऱ फेरिसो लुःसुजि, “हेनिड इन्डोक चेन्दुबा लेःन्डानिडे टाडबामि रिति थिति लेःऱमामि लागि निवाहाडडेऱ पिःबऱआ आग्या मेऱयोड सेन्डानुमे ॥ १० मोसाडेऱ इडोऱ लुःटे, ‘टाडबामि पाबा मामामि आदर लेःऱमे ॥’ मोबा ‘असेऱसो पाबा मामामि टुम्बेऱ माडेहा खा लुःन्दुए मो याऱमि चैबानोऱ सेऱनेमा खेये ॥’ ११ तर हेनिड फेरिसिजि कोहि याऱमिडेऱ टाडबामि पाबा मामाजि इडोऱ लुःसु, ‘केऱ हेनिड इमा इमा लेःऱमा खडे मो कुर्बान लेये ‘अथबा निवाहाड पिःबेसुड’ लुःन्डानुम ॥ १२ इडोऱ हेनिडेऱ याऱमिजि खोजिमि पाबा मामामि लागि इमाडसो लेःऱमेऱटानुमनि ॥ १३ इडोऱ ताडबेऱ टोडबऱआ याऱलोहा रिति थिति चलन याऱमिजि लेःऱमेऱनुड निवाहाडडेऱ पिःबऱआ आग्या चाहि लेप्पेन्डानुम ॥ मोबा हाइखा नेऱनिहा योम्बोकरेऱनोऱ हेनिड लेन्डानिडे ॥”

येसुडेऱ असुद्ध खा टुम्बेऱ इःऱपऱआ

(मत्ति १५:१०-२०)

१४ येसुडेऱ फेरि चोप याऱमिजि केऱनुड लुःसुजि, “लो, चोबेऱ केहा खा नुरोऱ निवा टिनुड खेप्सानुमेनुड लेयागनुमे ॥ १५ पाखेऱयुराम हिडा होडसिऱयु पेखेऱहा इमाड खाडेऱसो याऱमि निवाहाडमि पोम्बेऱ असुद्ध टोडहेसुनिबा तर याऱमिबाड पाखेऱयु आप्मिहा खाडेऱ चाहि याऱमि असुद्ध टोडइये ॥ १६ इगो खा नेऱक काप्खुबा चोबेऱ निवा टिनुड खेप्सुमिरोनुड लेसुमिरो ॥

१७ मोबा येसु माहा याऱमिजि याऱन्यानुड खिम होडसिऱयु पेखेऱमाबेऱ खोमि चोडसाजिडेऱ खानवाडेऱ लुःबऱआ इमाडडे लुःनुड सिम्बोगुजि ॥ १८ येसुडेऱ

चोडसाजि लुःसुजि, “इमा हेनिडेऱसो केऱ लुःबऱआ खा मेलेसानुमे? चाबऱआ चामायाडेऱ याऱमि असुद्ध टोडनिबा लुःनुड हेनिडेऱसो लेसानुम्ने? ^{१६} इन्ढोडहोड माहा खागो याऱमिमि निवाहोडसिऱयु खेऱनिहा तर रुडमाबेऱ खेऱहा मोबाड पाखेऱयु खेऱपेहा ॥” (इडोऱ येसुडेऱ चोप चामाया खा चोखो लेये लुःनुड नुरोऱ इःबेऱटुजि ॥)

^{२०} येसुडेऱ हागोसो लुःसुजि, “याऱमि होडसिऱयुराम पाखेऱयु आप्मिहा खाडेऱ चाहि याऱमि असुद्ध टोडइये ^{२१} इन्ढोडहोड चोप खालहा माडेहा खा निवाहोडसिऱयुरामनोऱ लेडइहा मोबा मोसेऱ याऱमि माडेहा योम्बोक लेऱऱमेये, माडेहा योम्बोक लुःबऱआ- फुडसया याऱलोए बेभिचार, याऱमि सेऱमे, ^{२२} खिक्तुबाड, दुस्ट, रेम्डेऱमा, टाडबाखुसि लेऱऱमे, फुडसया एकसाड बेभिचार, आरिसे, सिःचामे, काडायोडबा कामा, दोस टिमे, ^{२३} इघा चोप खा याऱमिमि निवाहोडसिऱयुराम लेडइहा इघासेऱनोऱ याऱमि असुद्ध टोडइये ॥”

सामारि जाति मेऱनामिमि बिस्वास

(मत्ति १५:२१-२८)

^{२४} मोबा येसु टुरोसनुड सिदोन सहरमि चेन्जुमलाम खडा ॥ मोबेऱ रुक्नुड इक्को याऱमि खिमहोडसिऱयु पेखडा ॥ इन्ढोडहोड खो मोबेऱ लेडइटे लुःमे खा असेऱसो मेलेडोक्टुमिरो लुःनुड खोसेऱ मिऱटुए ॥ तर खो बेऱलो मेडकुमहेसा ॥ ^{२५} मोडोक्पेऱनोऱ इक्को मेऱनाऱमिडेऱ येसुमि टुम्बेऱ खेम्नुड खोबेऱ लेस्सा मोबा सराडबेऱ पोप्युसा ॥ मो मेऱनाऱमिमि सामसुवमा पसा माडेऱमा चाबेऱ राःप्पऱआ लेटा ॥ ^{२६} मो मेऱनामि सिरियामि फोनिके ठाउबेऱए हाइको जातिमि ग्रिक खाप्पा यामुसे ॥ मोबा खोसेऱ “केऱ सामसुवमा पसाबाड माडेऱमा चाप यिक्पेबेऱमा लुःनुड” येसु बिन्ति लेटु ॥ ^{२७} येसुडेऱ मो मेऱनाऱमि लुःसु, “याऱलो पसाजि हिडमा खेम्मे, खोजिमि चामा हुऱवाजि पिःमा फेन्निबा!”

^{२८} मोबा मो मेऱनाऱमिडेऱ इडोऱ लुःसु, “इहिर गुरु, खागो आक्टोऱनोऱ! तर हुऱवाडेऱसोड पिऱछाजिडेऱ सुःक्पऱआ चामागो कुःप्योडोइन्डुहा गो!”

^{२६} मेरनामिमि इडोऱमा खा खेम्नुड येसुडेऱ मो लुःसु, “हेनेऱ लुःबऱआसेऱ हुक्का लिनुड खिम खडे, हेनेऱ सामसुवमा पसाबाड मडेऱमा चाप खेऱपेटे ॥”
^{३०} मोबा खो खिमबेऱ रुक्माबेऱको खोमि पसा रुडघाक्पेऱ नुरोऱ इमडिडबऱआ चुप्टु ॥ चैबानोऱ खोम पसा माडेऱमा चाबेऱ लेप्पेबऱआ लेटा ॥

येसुडेऱ कुबा नुबोक्पऱआ

^{३१} येसु टुरोस सहरबाड रामबोक्नुड सिदोन सहर लिसाड डेकापोलिसमि चेन्जुममि रुम्बाड गालिल माहोडमाबेऱ खडा ॥ ^{३२} मोबेऱहा याऱमिजिडेऱ नेऱक मेखेम्खुबा इक्को कुबा येसुबेऱ चिक्चेडुजि ॥ मोबा ‘मोसोक्पेऱ हुक् युडबेऱमाना’ लुःनुड येसु बिन्ति लेःटुजि ॥ ^{३३} मोबा येसुडेऱ मो याऱमि मोबेऱ सुम्बऱआ याऱमिजिबाड मेऱयोड चिक्खेऱनुड मोमि नेऱकपेऱ येसुमि हुक्खेऱवासि टिसु ॥ मोबा हुक्खेऱवासिबेऱ चेऱमा टिनुड मोमि रेम सुबु ॥ ^{३४} मोबा एक्साड थाडसिरिटु खाडनुड सोःक्मा सासाड येसुडेऱ इडोऱ लुःसु, “इफफाता” लुःबऱआ “हेम्बोगे” लेये ॥ ^{३५} मोडोक्पेऱनोऱ मोमि नेऱक खेम्बोगा, रेम हेम्बोक्नुड खो नुरोऱ यामुबुगा ॥

^{३६} येसुडेऱ मोबेऱ टुघुबा चोप लुःसुजि “इगो खा असासो एऱलुःमे,” लुःनुड माहाजि आग्या पिःसुजि ॥ तर खोसेऱ याऱमिजि इन्डोऱ “इगो खा एऱलुःसानुमे लुःसुजे” मोडोक्नोऱ बेऱलो खोजिडेऱ माहा खा लुःसाड राप्सामे ॥ ^{३७} इगो खा खेम्खुबा चोबेऱ खरि मिननुड लुःसुजि, “खोसेऱ चोप योम्बोक नुरोऱ लेन्डुए ॥ खोसेऱ नेऱक मेखेम्खुबाजि खेम्मेऱहेन्डुजेनुड कुबाजि यामुमेऱहेन्डुजे ॥”

येसुडेऱ रिक्पोड हजार याऱमिजि हिडबऱआ

(मत्ति १५:३२-३६)

८ ^१ इऱयाक फेरि बेऱलो याऱमिजि येसुबेऱ सुम्बऱआ लेःटामे ॥ चामामि लागि माहाजिनुड इमाडसो माआडसेऱ येसुडेऱ खोमि चोडसाजि खोबेऱ केऱनुड इडोऱ लुःसुजि, ^२ “इघा याऱमिजि खाडमाबेऱ केऱ निवेऱ सारो नाम्नावा मिऱटुड ॥ इघाजि कानुड पेम्बऱआ आयु सुमयाक याक्खेऱटे,

चामामि लागि इघाजिनुड इमाडसो माऱआ ॥ ^३ खाक्सानुमे, इघाजिबेऱ कोहि कोहि बेऱलोनोऱ ओःबाड इगोबेऱ लेडइटामे ॥ हागो इघाजि साक्मेन्जानोऱ पाडमाजिहोड रामबेऱनोऱ सागेऱ टेन्डिखेम्मि ॥” ^४ खोमि चोडसाजिडेऱ इडोऱ लुःसुजि, “खोइ, इगो इमाड चामासो चुप्पिण्णै ठाउबेऱ इढेऱलोहा याऱमिजि हामबाड चामाया लाजेऱनुड हिडमाहाजि?” ^५ मोबा येसुडेऱ माहाजि सिप्सुजि, “हेनिडनुड इन्डोक्गोटा चरेपा टुहा?” चोडसाजिडेऱ लुःसुजि, “इगोबेऱको एच्चि गोटा चरेपा टुहा ॥”

^६ मोबा येसुडेऱ याऱमिजि चउरबेऱ पेम्मेऱटुजि ॥ मोबा एक्साड खोसेऱ एच्चिगोटा चरेपा हुकपेऱ याडमानुड निवाहाड ओहाक पिःनुड चरेपा एऱनुड खोम चोडसाजि हामेऱटुजि मोबा चोडसाजिडेऱ याऱमिजि हाबेऱटुजि ॥ ^७ खोजिनुड एडेऱवा एद्रिहा डासो टुसा येसुडेऱ माहामि लागिसो निवाहाड ओहाक पिःसु मोबा माहासो चोडसाजि हामेऱटुजि ॥ ^८ चोप याऱमिजिडेऱ उक्खारो चोसेऱनुड एम्बऱआ टुक्का सुम्माबेऱ एच्चि डालो इऱठुप् टुसा ॥ ^९ मोबेऱ चाघुबा याऱमिजि रिउम हजारडोक् टुसामे ॥ मोबा येसुडेऱ माहाजि बिदा पिःसुजि ॥ ^{१०} मोबासोरोऱनोऱ खो चोडसाजिनुड योडाखोडबेऱ साडनुड दलमनुथा सहरलाम खडा ॥

फरिसिजिडेऱ चिडगा डाःक्पऱआ

(मत्ति १६:१-४)

^{११} कोहि फरिसिजि येसुबेऱ लेन्नुड खोनुड वोबुगाजि ॥ माहाजिडेऱ येसु जाच लेःऱसाड थाडसिऱिबाडए इक्को चिडगा खाडमेऱमा लुःसुजि ॥ ^{१२} इगो खा खेम्नुड येसुडेऱ किएम्मा सोःक्मा सासाड लुःसु, “आयुहा याऱमिजिडेऱ इन्ढोड चिडगा खाडमा योऱइन्डुजे? चैबानोऱ केऱ हेनिड लुःनिमने, इडोऱहा याऱमिजिडेऱ इमाडसो चिडगा खाडडोक्टुजिनिबा ॥” ^{१३} इडोऱ लुःआनुड माहाजि मोबेऱनोऱ याःऱयानुड खो योडाखोडबेऱ साडनुड फेरि मेऱएरेडलाम खडा ॥

फरिसिनुड हेरोदमि माडेहा खाबाड ओ पेम्मे सिक्छे

(मत्ति १६:५-१२)

१४ खोजि केऱलो चरेपा खिमा मिन्डेटुजि ॥ खोजिनुड योडाखोडबेऱ इक्को चरेपारेऱ टुसा ॥ १५ मोबा येसुडेऱ खोमि चोडसाजि लुःसुजि, “फरिसिनुड हाडबा हेरोदमि खा सोडा लेहा, मोबाड हेनिड होसियार लेःटानिडे ॥” १६ “कानिडनुड चरेपा माऱआऱबासेऱ येसुडेऱ कानिड इडोऱ लुःबऱआडे लुःनुड चोडसाजि खोजिदाडबा काबोगामि ॥ १७ चोडसाजिडेऱ इःबऱआ खा येसुडेऱ लेडोक्नुड खोजि इडोऱ लुःसुजि, “हेनिडनुड चरेपा माऱआहा लुःनुड इन्ढोड आक्टोऱ कान्डानिडे? इमा हेनिडेऱ हागोसो मेडखाक्सानुमे? इन्ढोड हेनिडमि निवेऱ इमासो लेहेसुनिहा? हेनिडमि निवा हागोसो छाऱइये? १८ हेनिडमि मिक काप्पिडानुम तर मिक एडानिडनि? नेएक काप्पिडानुम तर खेप्सानुमने ॥ हेनिडमि मिडानुमने? १९ केऱ डाउम चरेपा एऱनुड माहा डाउम हजार याऱमिजि हिडमाबेऱ इन्डोक् डालो टुक्रा एम्बऱआ लेःटाहा मिन्डेडानुमे?” चोडसाजिडेऱ येसु लुःसुजि, “बारो डालो!” २० येसुडेऱ फेरि माहाजि सिप्सुजि, “मोबा एच्चिगोटा चरेपाडेऱ रिउम हजार याऱमिजि हिडमाबेऱ इन्डोऱ डालो टुक्रा एम्बऱआ लेःटाहा?” चोडसाजिडेऱ लुःसुजि, “एचिच डालो टुक्रा इगुडमा!” २१ मोबा येसुडेऱ माहा चोडसाजि लुःसुजि, “इमा हेनिडेऱ हागोसो मेलेसानुमे?”

येसुडेऱ मिक मेएऱखुबा याऱमि नुबोक्पऱआ

२२ येसु चोडसाजिनुड सोरि बेथसेदा लुःमे खिमडेमबेऱ लेस्सा ॥ मोबेऱ याऱमिजिडेऱ मिक मेएऱखुबा इक्को याऱमि खोबेऱ चिक्चेऱनुड “इगो केक्नुड नुबोक्पेऱमा” लुःनुड बिन्ति लेःटुजि ॥ २३ येसु मो मिक मेएऱखुबा याऱमि मो खिमडेमबाड पाखेऱयु चिऱखेऱटु ॥ मोबा मोमि मिकपेऱ चेऱनुड येसुमि हुक मो मिक मेएऱखुबाबेऱ युडनुड सिप्सु, “हेनेऱ इमाड खाक्सुए?” २४ खोसेऱ फेरि खाडसाड लुःसु, “केऱ याऱमिजि खाडमागो खाडडोक्टु तर सिडभु रामडिडोऱ खाडडोक्टुड ॥” २५ मोबा येसुडेऱ फेरि मोमि मिकपेऱ हुक

युडबेटु, मोबा नुरोः खाडमाबेः खोसेः छेडगेः खाडहेसु ॥ ^{२६} मोबा एकसाड येसुडेः खो खिम पाडसाड लुःसु, “हेड खिमडेमबेः मेम्पेखेःरे ओडलाम खिम खडे ॥”

येसु असा लेये

(मत्ति १६:१३-२०; लुका ६:१८-२१)

^{२७} मोबा येसु खोमि चोडसाजिनुड कैसरिया फिलिप्पि सहरराजि खडामि ॥ खोजि रामबेः खेःमेःनिडसिमाबेः येसुडेः खोमि चोडसाजि सिप्सुजि, “याःमिजिडेः का असाडे लुःम्मे?” ^{२८} खोमि चोडसाजिडेः खो लुःसुजि, “कोहिजिडेः हेड बप्तिस्मा पिःखुबा युहन्ना लुःम्मे, हाइखाजिडेः एलिया लुःम्मे मोबा इन्डोः जनाजिडेः चाहि याःलोहा अगमबक्ताजिबाड इक्को लेडइटा लुःम्मे ॥” ^{२९} येसुडेः माहाजि फेरि सिप्सुजि, “हेनिडेः चाहि का असाडे मिइन्डानिडेः?” पत्रुसडेः लुःसु, “हेड मुक्ति पिःखुबा ख्रिस्ट लेये ॥” ^{३०} मोबा येसुडेः माहा खोमि चोडसाजि इगो खा हाइखाजि असासो अडिः एःलुःमाहाजि यो लुःनुड चेतावनि पिःसुजि ॥

येसु खोमताडबेः आडमे खेनुड सिमामि टुम्बेः इःबःआ

(मत्ति १६:२१-२३; लुका ६:२२)

^{३१} मोबा एकसाड येसुडेः खोमिटुम्बेः चोडसाजि इःबेटुजि, “का याःमिमि पसाडेः बेःलो खेनुड कस्ट आडमा खेये ॥ मोबा यहुदि सासकजि, एप्पा याडाडबाजिनुड यहुदि धार्मिक खा इःखुबाजिडेः खो मुक्तिदाडबा लुःनुड सिःचाम्मे मोबा सेःनेम्मे ॥ तर फेरि सुमयाक एकसाड हिडपुइडे ॥” ^{३२} इडोः येसुडेः खोमिटुम्बेःहा खा खोम चोडसाजि नुरोः इःबेटुजि ॥ मोबा पत्रुसडेः येसु मेःयोड चिक्खेःनुड योबु ॥ ^{३३} तर सोरोःनोः येसु पत्रसुलाम हिडघेःनुड इडोः लुःसाड वोबु, “हेड सैतान, काडमि केक्बाड ओः खेःपेसे, “इगो निवा निवाहाडबाड नेःनि तर याःमिमि निवाबाडए लेये ॥”

चोडसाजिडेऱ लेऱमानोऱ खेये योम्बोक

(मत्ति १६:२४-२८; लुका ६:२३-२७)

^{३४} मोबा येसुडेऱ खोमि चोडसाजिनुड हाइखा याऱमिजि केऱनुड लुःसुजि, “खेप्सानुमे, असा केऱ चोडसा लिमा मिडडानिडहोड खोसेऱ खोमदाडबा मिन्डेऱमा खेयेनुड सिमा सिऱसोड सिमा खेये मोबा टाडबामि काप्सिड खिमानुड कानुड राम्मा खेए ॥ ^{३५} इन्ढोडहोड असेऱ खोमि सोःक्मा जोगबा लेःन्डुए, मोसेऱ मो मेचोबेन्डुए, तर काडमि लागिनुड सुसमाचारमि लागि खोमि सोःक्मा पिःघुबेऱ मो चुप्डन्डुए ॥ ^{३६} इन्ढोडहोड याऱमिडेऱ इगो माक्खम्डेममि चोप थोक चुप्नुड खोमि सोःक्मा चाहि मेचोबेसुहोड खो इमाड फाइदा लिये? ^{३७} खोमि मेखेऱपऱआ सोःक्मा फेरि हाम्बाड चुऱमे? ^{३८} मोबा इघा बिस्वास मेऱनिहानुड पापिनुड बेबिचारि पुस्ताबेऱहा याऱमिजि असा असेऱ का मोबा केऱ बचनबेऱ बिस्वास लेऱमा डेसिम्मे, एक्साड का याऱमिमि पसासोड निवाहाड पाबामि महिमानुड थाडसिरिदुत्जिनुड लेम्माबेऱ माहा याऱमिनुड डेसिडे ॥”

१ मोबा येसुडेऱ हागोसो लुःसु, “चैबानोऱ, केऱ हेनिड लुःनिमना, ६ निवाहाडमि राज्य बेऱए सक्तिबेऱ लेम्बऱआ मेडखाडलो इगोबेऱहा इन्डोक् जनाजि सिमिने ॥”

येसुमि रुप फेम्बऱआ

(मत्ति १७:१-१३; लुका ६:२८-३६)

^२ चुक्चि याक एक्साड येसुडेऱ पत्रुस, याकुबनुड युहन्नारेऱ सोरि चिक्मानुड इक्को आग्लो टोक्टोक्मेऱटु खडामि ॥ मोबेऱ असासो माऱआडमि ॥ मोबा चोडसाजिडेऱ खाडये खाडयेऱनोऱ येसुमि फेडखडा ॥ ^३ खोमि चेऱ मिगेऱ खाडनोऱ मडखाडहेरो उथ्रिऱमा लिसा आक्ठेऱलो उथ्रिको चेऱ इडोक् वासोःक्माबेऱसो लिनिबा ॥

^४ मोडोऱपेऱनोऱ मोसानुड एलियासो खाडमुसाजि मोबा येसुनुड यामुबुगाजि ॥ ^५ इगो खाडनुड पत्रुसडेऱ येसु लुःसु, “कानिड इगोबेऱ टुबऱआ

सारो नुबा लिसा ॥ कानिडेऱ इगोबेऱ सुम्जि पुडसुऱवा टोडमा यो, इक्को हेनेए लागि, इक्को मोसामि लागि, मोबा इक्को एलियामि लागि ॥” ६ माहाजि किऱसिबऱआसेऱ पत्रुसडेऱ इमाड लुःमे लुःनुड निवेऱ मेमिऱहेसु ॥ ७ मोबेऱ खिमिऱवानुड मोमि लावाडेऱ खोजि देगुजि ॥ मोबा मो खिमिऱवा होडसिऱयुरा इडोऱ काबऱआ खेम्मुसा, “इगो केए नाम्नाम लेऱऱपऱआ लेये, खोसेऱ लुःबऱआ नुरोऱ खेप्सानुमे!” ८ इडोऱ काबाऱ खेम्नुड चोडसाजिडेऱ किऱयु मिऱयु खाडमाबेऱ येसुबाड हाइखा असासो मेडखाडडोक्टुजि ॥

९ येसुनुड खोमि सुमबाड चोडसाजि मो टोक्टोक्माबाड मेऱनिडसिमाबेऱ येसुडेऱ खोम चोडसाजि लुःसुजि, आयु हेनिडेऱ खाडबऱआ खा, याऱमिमि पसा सिबऱआबाड हिडबोक्मा याऱलो असासो एऱलुःमे लुःनुड कडा आग्या पिःसुजि ॥

१० माहाजिडेऱसो मो खा खोजिमि निवेयुनोऱ युक्सुजि ॥ तर सिबऱआबाड हिडबोक्मे लुःबऱआ खा चाहि इमाडडे लुःनुड खोजिदाडबा काबोगामि ॥ ११ मोबा माहा चोडसाजिडेऱ येसु इडोऱ लुःनुड सिप्सुजि, “सास्त्रिजिडेऱ इन्ढोड याऱलो एलिया लेम्मा खेये लुःनुड लुन्डुजे?”

१२ येसुडेऱ माहाजि लुःसुजि, “चैबानोऱ एलिया याऱलो लेडइये, मोबा चोप खामि ब्यवस्था लेन्डुए ॥ तर याऱमिमि पसाडेऱ बेऱलो खे आडनुड चोपजिबाड हेला लिमा खेये लुःमे खा धार्मिक साप्चिराबेऱ इन्ढोड साप्पऱआ होला? १३ खाक्सानुमे, हेनिड लुःनिमने, एलियागो लेम्बेदे ॥ खोमि टुम्बेऱ धार्मिक साप्चिराबेऱ इमाड सप्पऱआ लेटा मोडोऱनोऱ याऱमिजिडेऱ खो इमाडगो इमाड लेःटुजि ॥”

चाबेऱ चुप्पऱआ याऱमि नुबोक्पऱआ

(मत्ति १७:१४-२१; लुका ६:३७-४३)

१४ खोजि हाइखा चोडसाजिबेऱ लेम्माबेऱको बेऱलो याऱमिजिडेऱ यिजुम्नुड खोजिनुड सस्त्रिजि छलफल लेऱऱमेऱनिडसिबऱआ येसुडेऱ खाडडोक्टु ॥

१५ येसु मोबेऱ रुक्मासोरोक माहा चोप याऱमिजिडेऱ खो खाडडोक्नुड खोजि

खरि मिनामि मोबा येसु लेःऱसिऱ खोबेऱ पिघडामि ॥ ^{१६} मोबा येसुडेऱ खोमि चोडसाजि सिप्सुजि, “इमाड खामि टुम्बेऱ हेनिड खोजिनुड खा इःमेऱनिडसिन्डानिडे?” ^{१७} माहा बेऱलो याऱमिजिबेऱ इक्को याऱमिडेऱ येसुनुड बिन्ति लेःटु, “गुरु, माडेऱमा चाबेऱ केऱ पसा कुबा टोडइटुए मो पसा हेनेऱम्बेऱ चिक्चेटुडे ॥ ^{१८} केऱ पसा मो माडेऱमा चाबे राःमाबेऱ मोसेऱ खो भुइबेऱ चेप्नुड याबुकुबाड चेऱमा ठेऱन्डुए मोबा केड इःक्मानुड टेन्डिऱ खेये ॥ इगो खा हेनेऱहा चोडसाजिनुड युक्सुड तर खोजिडेऱ मेहेसुजि ॥ ^{१९} मोबा येसुडेऱ माहाजि वोबुजि, “होउ बिस्वास मेऱनिडहा याऱमिजि, का इन्डोक्लो हेनिडनुड पेडइडे? हेनिड इडोक्लो केऱ आडमे? खोइ आक्को पिऱछा काबेऱ चिआप्टानुमे ॥” ^{२०} माहाजिडेऱ मो पिऱछा येसुमि पोम्बेऱ चिक्चेडुजि ॥ मोसेऱ येसु खाडमासोरोक माडेऱमा चाबेऱ भुइबेऱ चेप्नुड टेन्डिऱ खडा मोबा याबुकुबाड चेऱमा ठेऱसाड किऱयु मिऱयु काडडुबोगा ॥ ^{२१} मोबा येसुडेऱ मो पिऱछामि पाबा सिप्सु, “इगो माडेऱमा चाबेऱ इनामबाड राःप्पऱआ?” खोम्बाडेऱ लुःसु, “ओडेकबाडनोऱ राःप्पऱआ” ॥ ^{२२} “माडेऱमा चाबेऱ घरि घरि मिनुड योडाबेऱ राप्नुड सेऱनेमा योइन्डुए ॥ हेनेऱ नुबोक्हेन्डुहोड कानिड सोक्पेऱ दया लेःऱनुड इगो माडेऱमा चाप यिक्पेबेऱमाना ॥” ^{२३} येसुडेऱ मो याऱमि लुःसु, “इन्ढोड हेन्डुएहोड लुःन्डुए? विस्वास लेःऱखुबामि लागि चोपनोऱ योम्बोक लिहेहा ॥” ^{२४} इडोऱमा खा खेम्मासोरोक मो पिऱछामि पाबाडेऱ लुःसु, “केऱ विस्वास् लेःन्ने, तर हागोसो बेऱलो विस्वास लेःऱमा सहायता लेःऱमा ॥”

^{२५} मोबा येसुडेऱ बेऱलो याऱमिजि खोबेऱ पिडआप्पऱआ खाडडोक्नुड खोसेऱ मडेऱमा चाप योप्साड लुःसु, “हेड कुबानुड नेएक मेडःखेम्खुबा टोडःखुबा मडेऱमा, इगो पिऱछाबाड खेऱपेसे मोबा हागोएम्बाड आक्कोबेऱ इन्डोपेऱसो एऱलेन्डे ॥” ^{२६} मोबा मो मडेऱमा चाप विजिऱवा वोसाड मो पिऱछा चेप्पऱनुड खेप्पेसा ॥ मो पिऱछा चाहि टेन्डिऱखेऱनुड सिघेऱपऱआडोऱनोऱ लिसा ॥ मोडोगेऱ कोहिजिडेऱको सिघडा लुःसुजि ॥ ^{२७} तर येसुडेऱ मो पिऱछामि हुक राःप्नुड येपोक्माराप्टु मोबा खो येःपोगा ॥

^{२८} मोबा येसु खिमहोडसिऱयु पेखडा मोबेऱ खोमि चोडसाजिडेऱ खो सिप्सुजि, “कानिडेऱ चाहि इन्ढोड मो मडेऱमा चाप मेयिक्हेबऱआ?”
^{२९} येसुडेऱ माहाजि लुःसुजि, “इडोऱमा मडेऱमा चाप प्रार्थना लेःऱनुडरेऱनोऱ यिक्हेम्मे ॥”

येसुडेऱ फेरि खो सिमे खामिटुम्बेऱ इःबऱआ

(मत्ति १७:२२-२३; लुका ६:४३-४५)

^{३०} मो ठाउबाड येसु खोम चोडसाजिनुड गालिलमि राम लिसाड हाइके ठाउ खडामि ॥ इगो खा असेऱसो मेलेसुजिरो लुःनुड येसुडेऱ मिऱटुए ॥
^{३१} इन्ढोडहोड येसुडेऱ खोमि चोडसिजि इऱमेऱनिडसिडुए ॥ खोसेऱ माहाजि लुःसुजि, “याऱमिमि पसा हागो राःपूनुड मडेहा याऱमिजिमि हुकपेऱ पिःन्दुजे, मोबा माहाजिडेऱ खो सेऱनेन्दुजे तर खो सुमयाक एक्साड फेरि हिडबोइये ॥”
^{३२} तर चोडसाजिडेऱ येसुडेऱ असामि टुम्बेऱ इःबऱआ होला लुःनुड मेलेसुजि, मोबा फेरि येसुनुड सिम्सो मेसिम्हेसुजि ॥

बेऱए असाडे?

(मत्ति १८:१-५; १०:४२; लुका ६:४६-५०)

^{३३} खोजि कफर्नहुम सहरबेऱ लेन्नुड, खिमहोडसिऱयु पेखेऱनुड, येसुडेऱ खोमि चोडसाजि सिप्सुजि, “असिऱ रामबेऱ आप्मेऱनिडसिमाबेऱ इमाड खाडे हेनिडेऱ इःमेऱनिडसिडानिडेऱ?”
^{३४} तर चोडसाजिडेऱ इमाडसो मेलुःसुजि, इन्ढोडहोड मोडोक्पेऱ “खोजिबेऱ असा चाहि बेऱएम्मा” लुःनुड खा इःबऱआ लेटे ॥
^{३५} मोबा येसु पेडयुनुड खोमि बारो चोडसाजि केऱनुड लुःसुजि, “असा चोपबाड बेऱएम्मा लिमा योऱइये मोसेऱ चोपबाड एडेम्मा लिनुड चोपमि सेवा लेःऱमा खेये ॥”
^{३६} मोबा एक्साड येसुडेऱ इक्को एडेऱमा पिऱछा माहा चोडसाजिमि पोम्बेऱ चिआपूनुड खोसेऱ खिसाड चोडसाजि लुःसुजि,
^{३७} “असेऱ काडमि निडबेऱ इडोऱहा ओडेकजि स्वागत लेःन्दुए मोसेऱ

कानोः स्वागत लेये, का स्वागत लेःःखुबेः का पाडखुबा पाबानोः स्वागत लेःःन्दुए ॥”

^{३८} युहन्नाडेः येसु लुःसु, “गुरु, इक्को याःमिडेः हेनेःए निडबेः मडेःमा चापजि टुक्खुबा याःमिजिबाड यिक्मेःनिडसिबःआ कानिडेः खाडडोक्कुडमा ॥ मोबा कानिडेः खो मोडोः मेलेःःमेःटुडमा, इन्ढोडहोड खो कानिडमि याःमि मेलेःःटा ॥” ^{३९} येसुडेः माहाजि लुःसुजि, “खो एःसेगानुमे, इन्ढोडहोड केःए निडबेः खरिहा योम्बोक लेःःखुबाजिडेः चान्डोनोः काडमि बिरोध लेःःहेसुनिबा ॥ ^{४०} कानिडमि बिरोध मेलेःःखुबाजि कानिडमि लाडगामजिनोः मिःमा खेम्मे ॥ ^{४१} चैबानोः केः हेनिड लुःनिमने, असेः केःए निडबेः नुबा निवेः हेनिड इक्खोरिया योडा पिःमिहोड मोसेः मोमि इनाम चुण्डन्दुए ॥”

पाप योम्बोकबाड इन्डोः ओः पेम्मे?

(मत्ति १८:६-९; लुका १७:१-२)

^{४२} तर असेः काबेः विस्वास लेःःखुबा एडेःमा पिरछामि निवा फेन्नुड पाप लेःःमेन्दुए, मोमि बेःलाबेः लाघे किडएडबेःनुड माहोडमाबेः राप्हेडमा नुये ॥ ^{४३} हेनेःए इक्को हुगेः पाप लेःःमेयेहोड मो हुक चेन्नुड राप्पेसे, ओक्को हुगेः लेःःमे खेःलोकबेः खेःमा सिःहोडगो इक्को हुक मेःनिड थाडसिरिटु खेःमानोः चुये ॥ ^{४४} मो खेःलोकबेःको इक्को फिबासो सिघेःनिबा, मोबेःए मिसो सिमिनिबा ॥ ^{४५} हेनेःए इक्को सराडेः पाप लेःःमेयेहोड मो सराड चेन्नुड राप्पेसे, इन्ढोडहोड सराड मेःनिडनोः एःसिमे जुनिबेः चुप्मानोः चुये ॥ ^{४६} मो खेःलोकबेःको इक्को फिबासो सिघेःनिबा मोबेःए इन्डोःपेःसो सिमिनिबा ॥ ^{४७} मोबा आक्टोःनोः हेनेःए मिगेः हेड पाप लेःःमेयेहोड मो मिक् रिक्नुड राप्पेसे इक्कोरेःनोः मिक्नुड हेड निवाहाडमि राज्यबेः खेःमा चुये ॥ ^{४८} मो खेःलोकबेःको इन्डोःपेःसो मिसो सिघेःने मोबेःहा फिबाजिसो सिघेःमिने ॥

५६ युमडेऱ चोप बलिदान सुद्ध टोडडिडोऱ, चोप याऱमिजि खेःमि मिडेऱ सुद्ध टोडइये ॥ ५० युम चोप याऱमि पाप्मिये खा लेये, तर युममि युम लुयेनोऱ मेऱखेऱहोड फेरि इन्डोऱटे मो युम लुये टोडमे? मोडोऱनोऱ हेनिड टाडबानुड टुहा युमडोऱहा नुबा खासो एमेपेसानुमेनुड चोप याऱमिजिनुड नुरोऱ टोडजासानिडे ॥”

फुडसया टेप्पेबऱआ

(मति १६:१-१२; लुका १६:१८)

१० १ येसु मो ठाडबाड यर्दन यिवामि मेऱएरेड यहुदिया छेत्रबेऱ खडा ॥ फेरि मोबेऱसो बेऱलो याऱमिजि सुप्सामि मोबाड येसुडेऱ याऱलोएन्डोऱनोऱ सिक्छे पिःबोगुजि ॥ २ फेरिसिजि लेन्नुड येसु रेम्पमामि इडोऱ लुःऱनुड खो सिप्सुजि, “कानिड लुःमा, यहुदि धार्मिक नियमडोऱ कोहि वाडाडपसेऱ खोमि खिमदाडमा लेप्पेमा नुयेन्डे फेन्निबा? ३ येसुडेऱ माहाजि सिप्सुजि, “मोसाडेऱ हेनिड इमाड आग्या पिःटे?” ४ माहाजिडेऱ लुःसुजि, “मोसाडेऱको लेऱपेमा याऱलो लेःऱपऱआ पत्र साप्नुड लेप्पेमासो नुये लुःटे ॥” ५ येसुडेऱ माहाजि लुःसुजि, “मोडोऱ आग्यागो खोसेऱ हेनिड लुःमाबेऱ मेडखसिबऱआसेऱ लुःबऱआ लेटे ॥ ६ तर निवाहाडडेऱ याऱमि टोडमाबेऱ वाडाडपसानुड मेऱनाऱमि निप्पाडनोऱ टोडबऱआ लेटा ॥ ७ ‘मोडोगेऱ वाडाडपसेऱ फुडसया लेःऱनुड एक्सड पाबा मामा याःऱयानुड खोजि टाडबा टोडइन्जे ॥ ८ मोबा मोजि निप्पाड इक्को लिन्जे’ हागो खोजि निप्पाड नेऱनि इक्कोनोऱ हिडा लिबेऱचे ॥ ९ मोडोगेऱ निवाहाडडेऱ इक्को टोडबऱआजि याऱमिडेऱ फाक्मा फेन्निबा ॥” १० मोबा येसुनुड खोम चोडसाजि खिमबेऱ टेजानुड चोडसाजिडेऱ इगो खामि टुम्बेऱ खो सिप्सुजि ॥ ११ येसुडेऱ माहाजि लुःसुजि, “टाडबामि ठाऱमा लेऱपेनुड, हाइको मेऱनाऱमिनुड फुडसया लेन्डुहोड मोसेऱ खोमि याऱलोए ठाऱमामि बिरोधबेऱ बेबिचार लेन्डुए ॥ १२ मोडोऱनोऱ टाडबामि ठाऱपा लेप्पेनुड हाइको

वाडाडपसानुड फुडसया लेःखुबा मेःनाःमिडेःसो बिरोधबेः बेभिचार लेःन्दुए ॥”

येसुडेः पिःछाजि आसिस पिःबःआ

(मत्ति १६:१३-१५; लुका १८:१५-१७)

१३ बेःलो याःमिजिडेः खोजिमि पिःछाजि येसुडेः हुक युडनुड आसिस पिःरो लुःनुड लाजेःडुजि, तर खोमि चोडसाजिडेः माहाजि वोबुजि ॥ १४ मोबा येसुडेः मो खाडडोक्नुड चोडसाजि वोप्साड लुःसुजि, “पिःछाजि काबेः आप्मेःटानुमे, खोजि एःसेगानुमे, इन्ढोडहोड निवाहाडमि राज्यगो इडोःहा पिःछाजिमि लागिनोः लेये ॥ १५ चैबानोः हेनिड लुःनिमने निवाहाडमि राज्य इक्को एडेःमा पिःछाडेःडोः मेःमिःटुहोड खो मोबेः पेःखेःहेनिबा ॥ १६ मोबा येसुडेः माहा पिःछाजि खोमि पोमबेः खिनुड माहाजिसोक्पेः हुक युडसाड आसिस पिःसुजि ॥

टाडायोडबा याःमि

(मत्ति १६:१६-३०; लुका १८:१८-३०)

१७ येसु मोठाउबाड खेःपेसिःपोरोक्माबेः इक्को याःमि पिःन्जानुड खोमि सराडबेः ओप्युसाड इडोः लुःसु, “हे नुबा गुरु, एःस्सिमे जिबन टोक्मामि लागि केः इमाड लेःःमा खेये?” १८ येसुडेः मो याःमि लुःसु, “हेनेः का इन्ढोड नुबा लुःडे? निवाहाडबाड असासो नुबा लेःःमिने ॥ १९ हेनेः बेःए आग्यागो नुरोःनोः लेःन्दुहा, याःमि एःसेःमे, बेभिचार एःलेःःमे, एःखुमे, नेःनिहा साक्छि एःपिःमे मोबा पाबा मामामि खा खेम्मे ॥” २० मो याःमिडेः येसु लुःसु, “गुरु ज्यु, अक्खा चोप खालहा योम्बोकको केः पिःछाबाडनोः लेःःआप्पटुडहा ॥” २१ येसुडेः मो याःमिलाम हिडघेःनुड नाम्नामेः खाडसाड लुःसु, “हागोसो हेनेः इक्को योम्बोक लेःःमा खेये, हेड खडे हेडनुड इमाड इमाड टुहा माहा चोप इन्जानुड इमाड मेःडकाप्खुबाजि हाबेःटाजे, मोबा हेनेः थाडसिरिःटु बेःलो चुप्पिन्दुहा ॥ मोबा आप्नुड कानुड राप्से ॥” २२ इगो

खा खेम्नुड मो यात्रमिडेऱ डाजिक सुम्नुड दुःखि लिसाड खेऱपेसा, इन्ढोडहोड खोनुड बेऱलो याडसरावा टुसहा ॥

^{२३} मोबा येसुडेऱ किऱयु मिऱयु खाडनुड चोडसाजि इडोऱ लुःसुजि, “काडायोडबा यात्रमिजि निवाहाडमि राज्यबेऱ पेऱम्मा सारोनोऱ छाऱइये ॥”

^{२४} येसुमि मो खा खेम्नुड चोडसाजि खरि मिनामि तर येसुडेऱ फेरिसो हाइखा खा इःघेऱटु ॥ “पिऱछाज्यो, निवाहाडमि राज्यबेऱ पेऱम्मा सारो छाऱइ ॥

^{२५} ॥ सामिकमि नाश्रिबाड उट रेम्मा छाक्किटडोऱनोऱ, टाडायोडबा निवाहाडमि राज्यबेऱ पेऱम्मा छाऱइये ॥” ^{२६} इगो खा खेम्नुड चोडसाजि भना खरि मिन्नुड, “मोडोऱहोड असेऱ चाहि मुक्ति चुण्डन्डुए?” ^{२७} येसुडेऱ चोडसाजिलाम खाडनुड लुःसुजि, “इघा योम्बोक यात्रमिजिबाडगो लिनोऱ लिहेनिहा तर निवाहाडबाड चाहि लिहेहा इन्ढोडहोड, निवाहाडडेऱ चोप खा लेऱऱहेन्डुहा ॥

^{२८} मोबा पत्रुसडेऱ येसु लुःसु, “खाक्से प्रभु, कानिडेऱको चोप थोक लेऱपेनुड हेन्नुड रामइटिडमे ॥” ^{२९} येसुडेऱ लुःसुजि, “चैबानोऱ हेनिड लुःनिमने, कानुड सुसमाचारमि लागि टाडबामि पाबा मामा, पासाजि, वावा निसाजि, खिम जग्गा जमिन् चोप लेप्पेखुबेऱ ^{३०} सय गुना बेऱलो चुप्मिन्डुए ॥ खेनुड चुडजामा खेरेऱ नेऱनि खोसेऱ पाबा मामा, पसाजि, वावा निसाजि, नानाजिनुड खिम जग्गा इगो जुनिबेऱनोऱ चुप्मिन्डुए मोबा एक्साडए एस्सिमे जुनिसो चुण्डन्डुए ॥ ^{३१} तर आयु पोम्बेऱ टुःघुबाजि एक्साड सिडम्मेनुड आयु एक्साड टुःघुबाजि पोम्बेऱ सिडम्मे ॥”

येसुडेऱ खो सिमे खा सुमखेऱ इःबऱआ

(मत्ति २०:१७-१९; लुका १८:३१-३४)

^{३२} येसु खोम चोडसाजिनुड रामबेऱ टुसामे खोजि यरुसलेमबेऱटु खेऱमेऱनिडसिडामे मोडोकबेऱ येसु चाहि पोम्बेऱ रामेऱनिडसिडा ॥ चोडसाजि खरि मिनामि मोबा हाइखा यात्रमिजि चाहि एडगुवा एडगुवा रामेऱनिडसिडामेनुड माहाजि किस्सिबऱआ लेऱटामे ॥ फेरि येसुडेऱ खोमि

बारो जना चोडसाजि इक्केडबे चिखेनुड खोसोक्पे लेडइये खामि टुम्बे लुःबेटुजि ॥ ^{३३} “खेप्सानुमे, हागो कानिड यरुसलेमबेटु खेमेनेडसिन्डिडमा ॥ मोबे रुक्नुड यात्रमिमि पसा राःप्नुड एप्पा याडाडबाजिनुड यहुदि धार्मिक नियम इःखुबाजिमि हुकपे जिम्मा पिःम्मे ॥ मोबा खो सेनेमा खेये लुःनुड हाडखा जातिहा यात्रमिजिमि हुकपे जिम्मा पिःन्दुजे ॥ ^{३४} मोबा खोजिडे खो सिःक्चोन्दुजे, चेन्दुजे, पडाक्डोरेमा कोरडे मोइन्दुजेनुड एक्साड सेनेन्दुजे ॥ तर सुमयाक एक्साड खो सिघेपरेआबाड हिडबोइये ॥”

याकुबनुड युहन्नामि बिनति

(मत्ति २०:२०-२८)

^{३५} मोबा एक्साड जब्दियामि निप्पाड वाडाडपसाजि याकुबनुड युहन्ना येसुबे लेन्दु लुःसाजु, “गुरुज्यु, कानिडमि निवाडे मिरेपरेआ खा पिःमाना लुःनुड बिनति लेःरेसिरे काजिड लेडइरेचिडे ॥” ^{३६} येसुडेरे माहाजि सिप्सुजि, “हेनिडमि लागि केरे इमाड लेःरेपरेमा मिडइन्दानिडे?” ^{३७} मोजिडेरे येसु लुःसुजि, “गुरु, हेड महिमाबेरे लेम्माबेरे काजिड सानुडउजि हेनेए चुप्थिडलामनुड एडसिडलाम पेन्डोक्मा ॥” ^{३८} तर येसुडेरे मोजि लुःसुजि, “हेन्जिडेरे इमाड डाःक्मेनेडसिन्डानुमे, हेन्जिडेरे लेसाजुनि ॥ इमा केरे उडबरेआ खोरियाबाड हेन्जिडेरे उडहेन्जुए? इमा केरे लाबरेआ बप्तिस्मा हेन्जिडेरे लाहेन्जुए?” ^{३९} मोजिडेरे लुःसाजु ॥ मोबा येसुडेरे माहाजि लुःसुजि, “हेन्जिडेरेसो केरे लाबरेआ बप्तिस्मा हेन्जिडेरे लान्जुए ॥” ^{४०} तर खेप्साजे, काडमि चुप्थिडलामनुड एडसिडलाम पेम्मेरेमे अधिकार कानुड मारेआये ॥ खोसेरे असामि लागि मो पेन्ढाम पोरुइटुए मोसेरेरे पेन्डोइन्दुए ॥”

^{४१} इघा खा खेम्नुड हाडखा इक्पोड जना चोडसाजि चाहि याकुबनुड युहन्नानुड सुर्कडामि ॥ ^{४२} मोबा येसुडेरे खोसेहा चोप चोडसाजि केरेनुड लुःसुजि, “हेनिडेरे लेन्दानुम इगो माक्खाम्डेमबेरेहा राज्य लेःखुबाजिडेरे जनताजिसोक्पेरे खोमि खुसि सासन लेःन्दुजे ॥ मोबा बेरेहा यात्रमिजिडेरे

हाइखा यात्रजि अधिन लेःन्दुजे ॥ ^{४३} तर हेनिडेह चाहि आक्टोक् लेःरमा फेन्निबा ॥ हेनिडगो असा बेहएम्मा लिमा मिडइन्डानिड खोसेह सेउते लिनुड योम्बोक लेःरमा खेये ॥ ^{४४} चोपबाड बेहएम्मा लिमा मिडखुबेह चोपमि सेउते लिमा खेये ॥ ^{४५} इन्होडहोड यात्रमिमि पसासो हाइखाजिबाड सेवा चुप्सिह लेमबहआ नेहनि तर हाइखाजिमि सेवा लेःहसिह मोबा सोःक्मा भोग पिःसिह लेस्सा ॥”

मिक मेएहखुबा बारतिमै लुःमे यात्रमि

(मति २०:२६-३४; लुका १८:३५-४३)

^{४६} मोबा एक्साड येसुनुड खोमि चोडसाजि यरिहो सहरबेह आबामि ॥ खो बेहलो यात्रमिजिनुड यरिहोबाड खेहमेहनिडेसिमाबेह तिमैमि पसा मिक मेएहखुबा नाक्चाखु राम् केक्पेह पेन्सिडा ॥ ^{४७} मोसेह नासरतबेहए येसु मोरामबाडनोह आप्पेनिडसिये लुःमे खा लेडोक्नुड खो वोबुगा, “हे येसु, दाउदमि पसा, का दया लेःरमा ॥”

^{४८} मोबेहहा बेहलो यात्रमिजिडेह खो योड उक्मेहमामि योबुजि ॥ तर खो भना बेहए सेम्लेह वोबुगा, “हे दाउदमि पसा का दया लेःरमाना ॥” ^{४९} येसुडेह मो यात्रमि वोबहआ खेम्नुड येःपुनुड लुःसु, “आक्को यात्रमि इगिहयु केडानुमे ॥” मोबा खोमि चोडसाजिडेह मो मिक मेएहखुबा यात्रमि इडोह लुःनुड लुःसुजि, “साप्थाक्से, गुरुडेह हेड केहमेहनिडसिये, चान्डो आबे ॥”

^{५०} मोबा मो यात्रमि खोमि खाम्जिरा राप्पेनुड येःपोगा मोबा येसुबेह खडा ॥ ^{५१} येसुडेह मो सिप्सु, “लो लुःसे, हेनेह लागि केह इमाड लेःरपेहमे?” मो यात्रमिडेह लुःसु, “गुरु, केह खाडहेडोक्मा ॥” ^{५२} येसुडेह मो यात्रमि लुःसु, “खडे, हेनेह बिस्वासडेह हागो हेनेह मिक एपुइटे ॥” मोडोक्पेहनोह मो यात्रमिडेह खाडहेपोगु मोबा खोसो येसुनुड सोरि रामपोगा ॥

यरुसलेमबेऱ येसु आदरनुड स्वागत लेऱऱपऱआ

(मति २१:१-११; लुका १९:२८-४०; युहन्ना १२:१२-१९)

११ १ येसुनुड खोमि चोडसाजि खेऱमेऱनिडसिमाबेऱ यरुसलेम केक्पेऱ सिऱइये जैतुन टोक्टोक्मामि केक्पेऱ बेथफागेनुड बेथानिया खिमडेम रुक्दुमि ॥ मो ठाउबाड येसुडेऱ निप्पाड चोडसाजि इडोऱ लुऱनुड पाक्सुजि, २ “आक्को मेऱयोड खाडमुये खिमडेमबेऱ खडाजे ॥ मोबेऱ खेऱमाबेऱ आयुरो असासो मेसाडबऱआ इक्को गधामि पसा हिःक्युडबऱआ चुप्डजुए ॥ मो हेडनुड हेन्जिडेऱ इगोबेऱ लाआप्टाजे ॥ ३ मोडोक्पेऱ हेनिड ‘इगो इमाड लेऱऱमेऱनिडसिन्जे लुऱनुड?’ सिम्मिहोड, ‘इगो गधामि पसा आयु प्रभुमि लागि पाप्डटे, खोसेऱ चान्डोनोऱ टेबेये’ लुऱसाजे ॥”

४ मोबा मोजि खेऱमाबेऱ, चैबानोऱ इक्को खिममि रामडेम पोम्बेऱ मो गधा पसा हिःक्युडबऱआ चुप्टाजु ॥ खोजिडेऱ मो हेडबोक्माबेऱ ५ मोबेऱ येप्टिडबऱआ याऱमिजिडेऱ खोजि लुऱसुजि, “आक्को गधा हेन्नुड इमाड लेऱऱमा योऱइचुए?” ६ खोजिडेऱ येसुडेऱ इऱऱपऱआडोऱनोऱ लुऱसाजु, मोबा माहाजिडेऱ मोजि मो लाघेऱमेऱटुजि ॥

७ चोडसाजिडेऱ मो गधा येसुबेऱ लाजेऱनुड मो सोक्पेऱ खोजिमि चेऱ रिऱएन्बेऱटुजि मोबा मो सोक्पेऱ येसु पेना ॥ ८ बेऱलो याऱमिजिडेऱ टाडबा टाडबामि चेऱ, ओप्ताड रामबेऱ रिऱएम्बेऱटुजिनुड हाइखा इन्डोक जनाजिडेऱ चाहि पाखाबाड सेउला एऱआप्नुड रिऱएम्बेऱटुजि ॥

९ येसुमि पोम्बेऱनुड एडगुवाबेऱ राम्खुबाजिडेऱ इडोऱ लुऱसाड ओहाड लेऱऱपोगुजि, “निवाहाडमि ओहाड लिरो! परमप्रभुमि निडबेऱ लेडखुबा ओसिसित लेये ॥ १० कानिडमि टुबा हाडबा दाउदमि लेडसिऱपोरोइटे राज्य आसिसित लिरो, थाडसिऱिऱटु पेडघुबा निवाहाडमि महिमा लिरो!”

११ इडोऱ येसुनुड खोमि चोडसाजि यरुसलेम रुक्दुजि मोबा येसु मन्दिरबेऱ खडा ॥ खोसेऱ मन्दिरमि पाखेऱयु किऱयुमिऱयु खाक्सु ॥ तर नाम किक्खेऱपऱआसेऱ खोम चोडसाजिनुड बेथानिया खिमडेमबेऱ खडा ॥

चा मेऱनिडमा वेऱलाऱफुमि डाड

(मत्ति २१:१८-१९)

^{१२} वागियाराम माक्मि येसु बेथनियाबाड यरुसलेम टेमेऱनिडसिमाबेऱ खो सगेऱ सिबऱआ लेटे ॥ ^{१३} येसुडेऱ आडेऱ मेऱयोड इक्को वेऱलाभुमि मुक्मुक्मा डाड खाडडोक्टु मोबाड मोबेऱ चा किडइटेन्डे मिऱनुड येसुडेऱ खेऱमाबेऱ आऱवारेऱनोऱ चुप्टु तर वेऱलाभुमि डाडबेऱ चा माऱआडा ॥ ^{१४} मोबा येसुडेऱ मो सिडभु डाड लुःसु, “हागोएम्बाड हेनबेऱ इन्डोऱपेऱसो चा मेऱकिडरो” येसुडेऱ इडोऱ लुःबऱआ खोमि चोडसाजिडेऱ खेप्सुजि ॥

येसु मन्दिरबेऱ खेऱपऱआ

(मत्ति २१:१२-१७; लुका १९:४५-४८; युहन्ना २:१३-२२)

^{१५} येसु खोमि चोडसाजिनुड यरुसलेम खेऱनुड मन्दिरबेऱ खडा ॥ खोसेऱ मोबेऱ बेपार लेऱखुबा चोप याऱमिजि यिक्सेडुजि ॥ याड लेन्ढामनुड सिरिऱवा इन्जाढाम टुजि मोबा हाइखा चोप इन्जाघुजिसो मोबाड यिक्हाक्सुजि ॥ ^{१६} मोबा येसुडेऱ मन्दिरमि सोऱलुडबेऱ इमाडसो मेऱन्जामेऱटुजि मोबा मो रामबाड इन्जामाहा खासो मेऱखिखेऱमेऱटुजि ॥ ^{१७} मोबा येसुडेऱ माहा याऱमिजि इडोऱ लुःसुजि, “धार्मिक साप्चिराबेऱ इडोऱ साप्पऱआ लेहा, ‘केए खिम चोप जातिहा याऱमिजिडेऱ प्रार्थना लेऱऱठाम ठाउ लिमा खेये’ तर हेनिडेऱको खुसुबाडजिमि रुममुक्रे टोक्सानुम ॥” ^{१८} येसुडेऱ लेऱपऱआ इडोऱमा खा एप्पा याडाडबाजिनुड यहुदि धार्मिक खा इऱखुबाजिडेऱ खेम्डोक्टुजि ॥ माहाजिडेऱ येसु सेऱमामि मोत्ता लेऱपोगुजि ॥ तर माहाजि खो सेऱमा किऱसिडामे इन्ढोडहोड बेऱलो याऱमिजि खोमि सिक्छे खेम्नुड खरि मिनामि ॥ ^{१९} युडा लिनुड येसु खोमि चोडसाजिनुड यरुसलेम सहरबाड खेप्पेसामि ॥

वेरलाभुमि डाडबाड सिक्छे पिःबऱआ

(मत्ति २१:२०-२२)

^{२०}वागियाराम माक्मि मो याऱलोएनोऱ रामबाड खेऱमाबेऱ येसुडेऱ मो वेऱलाभुमि डाड हेगेऱपऱआ खाडडोक्कु ॥ ^{२१}येसुडेऱ मो डाड लुःबऱआ खा पत्रुसडेऱ मिऱटोक्नुड लुःसु, “गुरु खाक्से, हेनेऱ चापहिबऱआ वेऱलाभुमि डाडगो हेसिघेऱ ॥” ^{२२}मोबा येसुडेऱ चोडसाजि लुःसुजि, “निवाहाडबेऱ बिस्वास लेःटानुमे ॥

^{२३}चैबानोऱ हेनिड लुःनिमने, असेऱसो खोमि निवाबाड आडेऱवासो सडक मेलेऱलेऱ ताडबेऱ लुःबऱआ खा पुरा लिये लुःनुड बिस्वास लेऱनुड इडो याक्फु ‘माहोडमाबेऱ हेडे’ लुःसुहोड मोडोऱनोऱ लिये ॥ ^{२४}मोडोगेऱ केऱ हेनिड लुःनिमने, हेनिडेऱ निवाहाडमि निडबेऱ इमाड डाइन्डानुमे, ‘केऱ चुप्पेटुडे’ लुःनुड बिस्वास लेःटानुमे मोबा हेनिडेऱ डाक्पऱआ खा चुप्पेन्डानुमे ॥ ^{२५}मोबा हेनिड प्रार्थना लेऱपोक्मा याऱलोनोऱ कोहिजिमि बिरोधबेऱ सुरिऱ टुहोड माहाजि याऱलो आम्लाड पिःबेसानुमे ॥ मोबाडरेऱ थाडसिरिबेऱ पेडखुबा हेनिडमि निवाहाड पाबेऱसो हेनिडमि पापमि आम्लाड पिःये ॥ ^{२६}[तर हेनिडेऱ हाइखाजि आम्लाड मेपिःसानुमहोडगो थाडसिरिबेऱटु पेडखुबा हेनिडमि निवाहाड पाबेऱसो हेनिडमि पापमि आम्लाड पिःनिबा ॥”]

येसुमि अधिकारमि खा

(मत्ति २१:२३-२७; लुका २०:१-८)

^{२७}येसुनुड खोमि चोडसाजि फेरिसो यरुसलेम टेआबामि ॥ मोबेऱ येसु मन्दिरमि ओम्फिराजि राम्दुमेऱनिडसिमाबेऱ एप्पा याडाडबाजि, यहुदि धार्मिक खा इऱखुबाजिनुड हाइखा बेऱहा याऱमिजि येसुमि केक्पेऱ लेन्नुड ॥ ^{२८}खोजिडेऱ येसु सिप्सुजि, “हेनेऱ हाम्बाड चुप्पऱआ अधिकारडेऱ इघा योम्बोक लेऱऱमेऱनिडसिन्डुए? असेऱ इगो अधिकार हेड पिःसे? ^{२९}मोबा येसुडेऱ माहाजि लुःसुजि, “केऱ हेनिड इक्को खा सिम्इनिम्ने, हेनिडेऱ मो खामि जवाफ पिःमाजे, मोबाड केऱ हाम्बाड इगो अधिकार चुप्पुड इघा

योम्बोक लेःऱमेऱनिडसिनुडे हेनिड लुःबेनिम्ने ॥ ^{३०} लो लुःमाजे युहन्नाडेऱ बप्तिस्मा पिःमे अधिकार थाडसिरिऱटुबाडए न याऱमिबाडए लेटे? ^{३१} इगो खा खेम्नुड माहाजि खोजि टाडबा इडोऱ काबोगाजि, “हागो ‘थाडसिरिबाड’ लुःमाहोड हेनिडेऱ खो इन्ढोड बिस्वास मेलेःटानुमे? लुःनुड सिम्बेये ॥ ^{३२} ‘याऱमिबाड लुःमा खोजि किस्सिडामि इन्ढोडहोड बेऱलो याऱमिजिडेऱ खो ‘अगमबक्ता’ लुःनुड मिऱटुजे?

^{३३} मोबा माहाजिडेऱ येसु लुःसुजि, “लेहा कानिडेऱ लेसुडमानि” मोबा येसुडेऱसो माहाजि इडोऱ लुःसुजि, “केऱसो इघा चोप योम्बोक हाम्बाडए अधिकारडेऱ लेःऱमेऱनिडसिनुडे हेनिड लुःनिम्नानि ॥”

अडगुरमि सोवरबेऱ योम्बोक टिडघुबाजिमि खानवा

(मत्ति २१:३३-४६; लुका २०:६-१६)

१२ ^१ येसुडेऱ माहाजि खानवाबाड इडोऱ लुःसु, “इक्को याऱमिडेऱ खोमि सोवरबेऱ अडगुरमि बालि टिसु ॥ मोमि खिरिखिरि गारो सोक्नुड बार इसु ॥ मो सोवरमि रुम्बेऱ खाडोलोम्बा टोनुड अडगुर यिम्हाम टोक्सु ॥ मोबा मो अडगुरमि सोवर हुडघुबा पेन्हाम याक्सासो टोडनुड मो सोवर अधिया लेःऱखुबा मोहिजि पिआनुड खो चाहि हाइको देसबेऱ खडा ॥

^२ “अडगुर टुम्येम्बाड खोसेऱ खोमि भागा लासिऱ इक्को सेउते पाक्सु ॥ ^३ तर माहा मोहिजिडेऱ मो सेउते राःप्नुड मोगुजि मोबा इमाडसो मेम्पिःरेऱ होप्रेऱवा पाक्सुजि ॥ ^४ मोबा एक्साड सोवरदाडबेऱ हाइको सेउते पाक्सु, तर मोसो माहा मोहिजिडेऱ बेजेत लेःऱनुड निन्डावानोऱ पोक्पेबेऱटुजि ॥

^५ सोवरदाडबेऱ फेरि हाइकोसो सेउते पाक्सु ॥ मोगो सेउतेगो भना माहाजिडेऱ सेऱनेसुजि ॥ इडोऱ सोवरदाडबेऱ पाडबऱआ बेऱलो सेउतेजि माहा मोहिजिडेऱ आढाजि मोगुजि आढाजि चाहि सेऱनेसुजि ॥

^६ “हागो चोप्पा एक्साड मो सोवरदाडबामि नाम्नाम लेःऱपऱआ इक्कोरेऱा पसा टुसा ॥ मो सोवर दाडबेऱ मिऱटु काडमि ‘पसागो मोहिजिडेऱ नुरोऱ लेन्डुजि’ मोबा खोसेऱ खोम पसा मोहिजिबेऱ पाक्सु ॥

७ तर माहा मोहिजिडेऱ सावरदाडबामि पसा लेडइटा लुःनुड लेडोकनुड इडोऱ कासामि, “इगोगो सोवरदाडबामि पसा लेए॥ आबानिडे इगो सेऱनेमा मोबा इगो अडगुर सोवर कानिडमिनोऱ लिये॥

८ इडोऱ लुःनुड माहाजिडेऱ खो सेऱनेनुड सोवरामि पाखेऱयु लाघेऱनुड राप्पेसुजि॥

९ “हागो मिऱखाकसानुमे, मो सोवर दाडबेऱ माहाजि इमाड लेःन्दुजि होला? चैबानोऱ खोनोऱ आप्नुड माहा माडेहा मोहिजि सेऱनेन्दुजे मोबा अडगुर टिबऱआ सोवर हाइखा याऱमिजि आधिया लेःचामा पिःन्दुजे॥

१० इमा हेनिडेऱ धार्मिक साप्चिराबेऱ साप्पऱआ इगो खा मेऱनेऱटिऱटानुमे? खिम आडखुबाजिडेऱ फेन्नि लुःनुड राप्पेबऱआ रुडगोऱवानोऱ खिममि चर युडमाबेऱ सुर रुडगोऱवा लिसा॥

११ इगो योम्बोक परमप्रभुडेऱ लेःएटुए मोबा कानिडमि लागि इगो खरिमा लये॥”

१२ इगो खा येसुडेऱ खोजिमिन्नोऱ बिरोधबेऱ लुःबऱआ लुःनुड यहुदि धार्मिक खा इःऱखुबाजिडेऱ लेडोकटुजि॥ मोडोगेऱ माहाजिडेऱ खो राःप्मा योगुजि तर मोबेऱ सुम्बऱआ याऱमिजिनुड किऱसिबऱआसेऱ खो याःऱयासुजि॥

तिरो यिक्मे टुम्बेऱए खा

(मत्ति २२:१५-२२; लुका २०:२०-२६)

१३ मोबा एक्साड यहुदि खा इःऱखुबाजिडेऱ कोहि फरिसिनुड हेरोदमि कोहि याऱमिजि येसुमि खाबाड रेम्पेम्मामि खोबेऱ पाक्सुजि॥

१४ माहाजि येसुबेऱ लेन्नुड इडोऱ लुःसुजि, “हे गुरु, कानिडेऱ लेन्दुडमे हेड रेम्देऱनिबा॥ याऱमिजिडेऱ इमाड लुःम्मि होला लुःनुड यामुनिबा॥ चोप खालहा याऱमिजिनुड इक्कोनोऱ बेबाहर लेःन्दुहा॥ निवाहाडमि चैबामा राममि टुम्बेऱ नुरोऱ इःऱये॥ मोडोगेऱ कानिड लुःमे यहुदि धार्मिक खाडोऱ कैसर तिरो फोडमा नुबा लेःयेन्डे लेःऱनिबा?

^{१५} कानिडे? तिरो फोडमेन्डे एफोडमे?” तर येसुडे? माहाजिडे? खो खाबाड रेम्मा योक्प?आ लुःनुड लेबेसु, मोबा माहाजि लुःसुजि, “इन्ढोड हेनिडे? का जाच लेःन्डानिडे? लाप्टानुमे इक्को ढेक के? खाडखाडमा ॥”

^{१६} माहाजिडे? इक्को ढेक लाप्टानुड येसु पिःसुजि ॥ मोबा खोसे? लुःसुजि, “इगोबे? असामि छापनुड लावा टुये?” माहाजिडे? लुःसुजि, “कैसरमि टुउ ॥”

^{१७} मोबा येसुडे? माहाजि इडो? लुःसुजि, “कैसरमि थोक कैसरनो? पिःसानुमे मोबा निवाहाडमि थोक निवाहाडनो? पिःसानुमे ॥” माहाजि येसुनुड खरि मिनामि ॥

सिघे?प?आबाड हिडपुक्मे टुम्बे?ए खा

(मत्ति २२:२३-३३; लुका २०:२७-४०)

^{१८} मोबे? इक्को निप्पाड सदुकिजि येसुबे? लेस्सामि ॥ इघाजिडे? सिघे?प?आ या?मिजि फेरि हिडबोडम्मे लुःमे खाबे? बिस्वास मेले?टुजे ॥ माहाजिडे? येसु सिप्सुजि, ^{१९} “हे गुरु, मोसाडे? पिःब?आ यहुदि धार्मिक खाडे? इडो? लुःटे? इक्को वावामि पसाजि मेलिरे? सिघे?होड मो वावामि लागि पसा लिरो लुःनुड निसाडे? खोमि कि?ना फुडसया लेः?मा खेये ॥

^{२०} इक्को खिमबे? “ए?चि जना सानुडउजि टुसामि ॥ टुम्मिडे? फुडसया लेः?टु, खोमि इक्को पसा मेलिरे? सिघडा ॥ ^{२१} मोबा सरुम्बाडे? खोम कि?ना फुडसया लेः?टु, खोबाडसो इक्को पसा मेलिरे? खो सिघडा ॥ इडो?नो? याडसरुम्बाडे? मो कि?ना फुडसया लेः?टु ॥ खोबाडसो इक्को पसा मेलिरे? खो सिघडा ॥ ^{२२} इडो? ए?चि सानुडउजिडे?नो? मो मे?नामि फुडसया लेः?टुजि तर इक्कोमिसो पसा मेलिरे? सिघडामि ॥ मोबा एक्साड मो मे?नामिसो सिघडा ॥

^{२३} हागो एक्साड माहाजि सिघे?प?आबाड हिडपोकमाबे? मो मे?नामि हाम्बे चाहिमि लिये ॥ इन्ढोडहोड मो मे?नामि माहा ए?चि जानडे?नो? फुडसया लेः?प?आ ले?टे ॥” ^{२४} येसुडे? माहाजि लुःसुजि, “हेनिड बे?ए

भुलबेऱ टुन्डानिड इन्ढोडहोड धार्मिक साप्चिरामि खाबेऱ लेसानुम्नि मोबा निवाहाडमि सक्तिसो लेसानुम्नि ॥

^{२५} सिघेऱपऱआबाड हिडपोक्पऱआ याऱमिजि फुडसया लेऱऱमिने ॥
माहाजिगो थाडसिरिदुत्जिडोऱ लिम्मे ॥

^{२६} सिघेऱपऱआबाड हिडपोक्मे टुम्बेऱहा खा मोसाडेऱ साप्पऱआ साप्चिराबेऱ हेनिडेऱ मेनेडानुमे? मोबेऱ पोश्रामि खानवाबेऱ लुःटुए, ‘कागो अब्राहाम, इसहाकनुड याकुबमि निवाहाड लेडे ॥’ ^{२७} मोडोगेऱ निवाहाडगो सिघेऱपऱआजिमि निवाहाड नेऱनिबा तर हिडरिक्जिमि निवाहाड लेये ॥ हेनिडगो सारोनोऱ भुलबेऱ सिऱपऱआ लेन्डानिड ॥”

चोप्पा बेऱए आग्या

(मत्ति २२:३४-४०; लुका १०:२५-२८)

^{२८} मोबा मोबेऱ इक्को यहुदि धार्मिक खा इऱखुबा याऱमिसो टुसे ॥ खोसेऱ मोबेऱ येसुडेऱ सदुकिजि नुरोऱ लुःबऱआ खेम्नुड खोसेऱसो येसु सिप्सु, “हे गुरु, निवाहाडमि आग्याबेऱ चोपबाड बेऱए आग्या चाहि हाम्बेन्डे?”

^{२९} येसुडेऱ लुःसु, “चोप्पा बेऱए आग्या चाहि इगोनोऱ लेये ॥ चोप इस्राएलिजिडेऱ खेप्सानुमे, कानिडमि परमप्रभु निवाहाड चाहि इक्कोरेऱ टुये ॥
^{३०} ‘हेनेऱ हेनेऱ निवाहाड आम्मि चोप होडनिवाडेऱ, चोप निवाडेऱ, चोप सोःक्माडेऱ मोबा चोप सक्तिडेऱ नाम्नाम लेटे’ ॥ ^{३१} मोबाड हाइको बेऱए आग्या चाहि ‘आम्मि खिम केक्पिए लाडगाम टाडबाडोनोऱ नाम्नाम लेःटे’ इघाबाड बेऱहा आग्या हाइखा माऱआहा ॥”

^{३२} इगो खा खेम्नुड मो यहुदि धार्मिक खा इऱखुबाडेऱ येसु लुःसु, “चैबानोऱ हेनेऱ नुरोऱ इःजोरेसु, हेनेऱ लुःबऱआडोनोऱ निवाहाडगो इक्कोरे टुये, खोबाड हाइको असासो माऱमाये ॥ ^{३३} मोडोगेऱ याऱमिडेऱ निवाहाड चोप निवाडेऱ, चोप सक्तिडेऱनुड चोप सोःक्माडेऱ नाम्नाम लेऱऱमा खेये मोबा टाडबामि खिम केक्पिए लाडगाम टाडबाडोनोऱ नाम्नाम लेऱऱमा खेये ॥ चोप खालहा भोगनुड होम भोगबाडसो इघा आग्या पालन लेऱऱमा चुये ॥” ^{३४} मो

यात्रमि निवादाडबा लिनुड लुःबऱआ खा खेम्नुड येसुडेऱ मो लुःसु, “हेड निवाहाडमि राज्यमि केक्पेऱनोऱ टुये॥” मोबाड एक्साड असेऱसो येसु इमाड खासो मेसिम्हेसुजि ॥

मुक्ति पिःघुबा हाडबा ख्रिस्टमिदुम्बेऱ खा

(मत्ति २२:४१-४६; २३:१-३६; लुका २०:४१-४७)

^{३५} येसुडेऱ मन्दिरबेऱ सिक्छे पिःमाबेऱ इडोऱ लुःसु, “यहुदि धार्मिक खा इःऱखुबाजिडेऱ इन्डोऱटे ख्रिस्ट, दाउदमि पसा लुःन्डुजे? ^{३६} पबित्र होडनिवाडेऱ हाडबा दाउद खोम टाडबानोऱ इडोऱ लुःमेऱपऱआ लेटे-परमप्रभुडेऱ केए प्रभु लुःसु, ‘केऱ हेनेए सत्रुजि आम्मि सराडफेक्माहोडबेऱ मेयुडलो हेड केए चुप्थिडलाम पेने॥’

^{३७} दाउद खोम ताडबेऱ ख्रिस्ट ‘प्रभु’ लुःन्डुए मोबा फेरि इन्डोऱटे ख्रिस्ट दाउदमि पसा लिहेये?” येसुमि खा यात्रमिजिडेऱ निवा टिनुड खेम्मेऱनिडसिडुजे॥ ^{३८} येसुडेऱ सिक्छे पिःसाड इडोऱ लुःसुजि, यहुदि धार्मिक खा इःऱखुबाजिबाड होसियार लेःटानिडे॥ आक्खाजि किण्डहानुड नुबा नुबा चेऱ चाडनुड वाइजामा मिडइम्मे॥ मोबा हाटाराजि यात्रमिजिडेऱ खोजि सेवा मुनुड आदर लेःऱपऱआ नेन्जोन्डुजे॥ ^{३९} मोबा यहुदिजि सुम्हाम खिमबेऱनुड भत्तेरबेऱ बेऱहा यात्रमिजि पेन्हाम ठाउबेऱ पेम्मा योऱइम्मे॥ ^{४०} मोहाजिडेऱ राडमिऱमाजि रेम्नुड खोजिमि खिम सोडरा डाप्पेबेन्डुजे॥ मोबा माहाजिडेऱनोऱ बेऱलो बेऱलो प्रार्थना लेःऱखाडन्डुजे॥ मोडोऱहाजिडेऱ बेऱलो सजाय चुप्डन्डुजे॥”

राडमिमाडेऱ पिःबऱआ भेटि

(लुका २१:१-४)

^{४१} मोबा येसु मन्दिरबेऱ भेटि एन्हाम ठाउमि केक्पेऱ पेडनुड यात्रमिजिडेऱ भेटि एम्बऱआ खाडमेऱनिडसिडुए॥ मोबेऱ बेऱलो टाडायोडबाजि लेन्नुड बेऱलो बेऱलो भेटि एन्डुजि॥ ^{४२} मोबा मोबेऱ इक्को गरिब राडमिऱमासो

लेन्नुड ताबोमि निच्चि भेक भेति एन्डु ॥ ^{४३} मोबा येसुडेह खोम चोडसाजि केरनुड लुःसुजि, “केह हेनिड चैबानोह लुःनिम्ने, इगो गरिब राडमिहमाडेह हाइखाजिडेह चेहटिबहआबाड बेहलो भेति चेहटिटुए ॥ ^{४४} इन्ढोडहोड हाइखाजिडेह चाहि खोजिबेह टुबहआ बेहलोबाड एडेहवा भेति चेहटिसुजि तर इगो गरिब राडमिहमाडेह चाहि खोबेह टुबहआ चोप थोकनोह भेति ॥”

एकसाडहा याकमि चिडगा

(मति २४:१-२४; लुका २१:५-१६)

१३ ^१ येसु मन्दिरबाड पेआप्मेहनिडसिमाबेह खोमि इक्को चोडसाडेह लुःसु, “खाक्से गुरु, इन्डोक बेहहा बेहहा रुडगोहवा! इमा नुबा नुबा खिम!” ^२ मोबा येसुडेह मो चोडसा लुःसु, “खाक्से, इगोबेहहा नुबा नुबा खिम इहयाक इक्को रुडगोवासोक्पेह हाइको रुडगोहवासो मेयुडरेह चोप योबेन्डुजे ॥”

^३ मोबा येसु मन्दिरमि मेहयेरडलाम जैतुन टोक्टोक्माबेह पेम्मेहनिडसिडे ॥ मोडोक्पेह पत्रुस, याकुब, युहन्नानुड अन्द्रियास लेन्नुड येसु खुसिड सिप्सुजि ॥ ^४ “कानिड लुःमाना, इघा चोप खा इन्डोक्पेह लिहा? मोबा इघा हेनेह लुःबहआ खा पुरा लिसिह पोरुइटा लुःनुड इन्डोक्टे लेमे, चिडगा चाहि इमा खाडमुहा?” ^५ येसुडेह माहाजि लुःसुजि, “होसियार लेःटानिडे, हेनिड असेहसो मेरेम्जाहेमिरो! ^६ बेहलो याहमिजि केए निडबेह ‘मुक्ति पिःखुबा कानोह लेडे’ कासाड लेन्नुड याहमिजि रेम्जोन्डुजे ॥ ^७ हेनिडेह डेनुड डे लिमेहनिडसिबहआ हाल्ला खेम्इन्डानुमे मोडोक्पेह एकिसिसानिडे ॥ माहा चोपगो लिमानोह खेहा, तर मोडोह लिमाबेहनोह माक्खाम्डेम नासि लिघेहनिबा ॥ ^८ जाति जातिजिमि रुम्बेह खिमा पुहइहा, इक्को देसमि बिरोधबेह हाइको देस पुइये, ठाउ ठाउबेह रुहमि लेडइहा ॥ साकआडसा लेडइहा तर इघा खागो ओडेक टोक्मा याहलो साबुक्पहआडोह खेमि याक तरिक्पहआरेह लेये ॥”

६ “हेनिड टाडबा चाहि होसियार लेःटानिडे ॥ इन्ढोडहोड यात्रमिजिडे हेनिड न्याय लेःठामबे राःप्खेम्मे ॥ मोबा यहुदिजि सुम्हाम खिमराजि लाघेःनुड कोराडे मोइम्मे ॥ हाडबाजिनुड सासकजिमि पोम्बे येःप्नुड केए टुम्बे हेनिडे साक्खि पिमा खेये ॥

१० तर माक्खाम्डेमम नासि लिमा यात्रलो चोप यात्रमिजि सुसमाचार खेम्मेःसेःमानो खेये ॥ ११ यात्रमिजिडे हेनिड राःप्खेःमाबे हेनिडे इमाड लुःमे मिःनुड निवाबे सुर्ता यात्रलो नो एलेटानुमे ॥ खोजिमि पोम्बे येःप्माबे हेनिडमि निवाबे इमाड लेडइये मोनो लुःसानुमे ॥ इन्ढोडहोड मोडोक्पे हेनिडे हेनिडमि निवाडे इःसानुम्नि तर पबित्र होडनिवाडे नो हेनिडबाड यामुये ॥

१२ “मोडोक्पे यात्रमिजिडे टाडबामि वावानिसाजिनो सेःनेमामि लागि पिःन्दुजे ॥ पाबाडे पसाजि, पसाजिडे पाबा मामाजि बिरोध लेःःनुड सेःनेमेन्दुजे ॥ १३ मोबा केए निडमि लागि हेनिड चोबे हेला लेःम्मे ॥ तर एकसाडरोसो बिस्वासबे डेगिलो लिखुबा चाहि हिडइये ॥

किःसिमारोमा कस्टमि याकमि टुम्बे

(मत्ति २४:१५-२८; लुका २१:२०-२४)

१४ “मोबा हेनिडे चिक्चिक्मिःमारो खानुड नास लेःःखुबा मो पेम्मा मेम्फेने ठाउबे पेम्बःआ खाडइन्डानुमे नेःखुबे लेसुमिरो ॥ मोडोक्पे यहुदिया ठाउबे टुखुबा यात्रमिजि सुडलखालाम चिःःखेःमिरो ॥ १५ खिममि कौसिबे टुखुबा यात्रमिजि इमाड थोकमि लागि खिमहोडबे एउडमिरो ॥ १६ रोपा, सोवराराजि टुखुबा यात्रमिजि ओप्ताडनुड अथवा चेः लासिः खिमबे एआप्पिरो ॥ १७ मोडोक्पे उक्खाइसुम्मानुड ओडेकनुडहा पस्ताडमाजि भना बेःलो खे आडमा सिःइये ॥ १८ इडोक्हा खेमि याक चुडलुये बेलाबे मेसिःलो लुःनुड निवाहाडनुड प्रार्थना लेःटानुमे ॥ १९ मोडोक्मा खेमि याकगो निवाहाडडे माक्खाम्डेमम टोडबःआबाड आयुरो मेःलिडि फेरि एकसाडसो लिनिबा ॥ २० निवाहाडडे माहा खेमि याक

चुकलो मेलेःऱपऱआहोड गो असासो हिडमिने तर खोसेऱ सेम्बऱआ याऱमिजिमि लागि माहा याक चुकलो टोडबेटुए ॥

^{२१} मोबा मोडोकपेऱ याऱमिजिडेऱ हेनिड “खाकसानुमे, ख्रिस्ट इगोबेऱ तुये, खो मोबेऱ तुये लुःमिहोड माहाजिमि खाबेऱ बिस्वास एलेःटानुमे ॥ ^{२२} इन्ढोडहोड मेःऱनोऱहा ख्रिस्टजिनुड मेःऱनोऱहा अगमवक्ताजि लेडइम्मे ॥ माहाजिडेऱ बेऱहा बेऱहा चिडगानुड खरिहा योम्बोक लेःऱनुड निवाहाडडेऱ सेम्बऱआ याऱमिजिसो रेमइन्डुजे ॥ ^{२३} मोडोगेऱ हेनिड होसियार लेःटानिडे, इघा खा लिमा याऱलोनोऱ केऱ हेनिड लुःबेनिमने ॥”

येसु फेरिसो लेडइये

(मत्ति २३:२६-३१; लुका २१:२५-२८)

^{२४} “माहा खेमि याक रुक्खेऱयेम्बाड नामनुड लाडेऱ उज्यालो पिःनिबा ॥ ^{२५} साडगेजि नान्द्रुडमाबाड हेओइम्मे मोबा नान्द्रुडमाबेऱहा चोप सक्तिजि सोडइम्मे ॥ ^{२६} मोबा एकसाड याऱमिमि पसा सक्तिनुड महिमाबेऱ खिममिऱवाबेऱ उडमेऱनिडसिबऱआ याऱमिजिडेऱ खाडडोइन्डुजे ॥ ^{२७} मोबा खोसेऱ थाडसिरिदुतजि पाडइन्डुजेनुड निवाहाडडेऱ सेम्बऱआ याऱमिजि खोसेऱ नान्द्रुडमानुड माक्खम्डेममि चोपराजि सुमइन्डुजे ॥

वेऱलाभुमि डाडबाड सिक्छे

(मत्ति २४:३२-३५; लुका २१:२६-३३)

^{२८} “मोबा येसुडेऱ लुःसु, वेऱलाभुमि डाडबाड खा चिनानुमे ॥ इगोमि हागाबेऱ चोड डोःवा केप्पोक्येबाड बर्ख याम लिबऱआ खा लुःनुड लेये ॥ ^{२९} मोडोऱनोऱ केऱ हेनिड लुःडिडबऱआ खा लिबोक्येम्बाड खो लेडसिऱ पोरुइटे लुःनुड लेसानुमे ॥ ^{३०} चैबानोऱ हेनिड लुःनिमने इडोऱहा चोप खा पुरा मेलिसेऱलो इगो पुस्ताबेऱहा याऱमिजि सिघेऱमिनि ॥ ^{३१} नान्द्रुडमानुड माक्खम्डेम नासि लिघेये तर केऱ लुःबऱआ इघा खा इन्डोऱपेऱसो नासि लिनिहा ॥

चनाखो लिमे टुम्बे सिकछे

(मत्ति २४:३६-४४; लुका १२:३८, ४०)

^{३२} “तर मो याक इन्डोकपे लेडइये लुःमे खा निवाहाड पाबाबाड हाइखा असेरसो लेसुजिनिबा॥ पसानुड थाडसिरि दुत्जिडेसो लेसुजिनि॥
^{३३} मोडोगे होसियार लेःटानिडे, चाडखो पेनानिडेनुड प्रार्थना लेःटानुमे॥ इन्ढोडहोड मो याक इन्डोकपे लेडइये हेनिडे लेसानुम्नि॥

^{३४} “इगो खागो खिमदाडबे खोमि सेउतेजि खिममि योम्बोक नुरो लेःटिकसानुमे, खिम हुडखुबेसो नुरो खिम हुडगिगानुमे लुःबआडोर्नो लेये॥
^{३५} मोडोगे हेनिड सानिडनो चनाखो लिनुड पेनानिडे, इन्ढोडहोड खिमदाडबागो युडा, सेन्डा, भाले ओःकमा याऱलो अथबा माक्मि इन्डोपे टेजाये हेनिडे लेसानुम्नि॥
^{३६} खो हाक्चोक्टो लेम्माबे हेनिड इम्डिघेऱपआ चुपहोड इमाड लेःन्डानिडे॥
^{३७} आयु के हेनिड लुःबआडोर्नो चोप याऱमिजि लुःटुडहाजि, होसियार लेःऱनुड पेनानिडे॥”

येसु सेऱनेमा योक्पआ

(मत्ति २६:१-५; लुका २२:१-२; युहन्ना ११:४५-५३)

१४

^१ मोबा खावाडोकमा खमिर मेम्बआ चरेपा चामे निस्तर चाड लेम्मा नियाक याऱलो एप्पा यडाडबाजिनुड यहुदि धार्मिक खा इःऱखुबाजिडे येसु खुस्रिडमु सेऱनेमे निहुरे योक्मेऱनिडसिडामि॥
^२ तर खोजिडे मिऱटुजि “इगो चाडमि बेलाबे इडो लेःऱहोड याऱमिजिमि रुम्बे हल दुडगा लिये॥”

बेथानियाबे येसु अभिसेक लेःऱपआ

(मत्ति २६:६-१३; युहन्ना १२:१-८)

^३ येसु बेथानिया ठाउमि सिमोनमि खिमबे खडा, खो याऱलो सुक्टुबाडे राःप्पआ लेटे॥ मोबे येसु चामा चामेऱनिडसिमाबे इक्को मेऱनाऱमि रुडगोऱवाबाड टोडबआ बतलबे जटमाडसि सेडसेडमा नाम्जानुये केवा

याडमानुड मोबेऱ लेस्सा ॥ मो बतलनुड केवा निऱचिनोऱ बेऱलो याड सिऱटे ॥ मोसेऱ मो बतल पोक्नुड येसु आदर पिःसाड निन्डावाबेऱ चोप केवा एम्बेऱटु ॥ ^४ तर मोबेऱ कोहि कोहिजि चेजेवेऱ खोजिटाडबा इडोऱ कासामि, “आक्टोऱ बेऱलो याड सिडये केवा इन्ढोड इगो मेऱनाऱमिडेऱ खेरो एडइडुए? ^५ इघा इन्जानुड गरिबजि हाबेऱमाहाजिडि ॥ इन्जामाबेऱ सुम्जि सये सिसेड भेक्बाडसो बेऱलो सिऱटे ॥” मोबा माहाजिडेऱ मो मेऱनाऱमि वोबुजि ॥

^६ तर येसुडेऱ माहाजि लुःसुजि, “योडमेऱटानुमे, इन्ढोड हेनिडेऱ आक्को मेऱनाऱमि वोप्डन्डानुमे? इगोसेऱ काडमि लागि इक्को नुबा योम्बोक लेःएटुए ॥ ^७ इन्ढोडहोड गरिबजिगो सानिडनोऱ हेनिडनुडनोऱ पेडइम्मे, हेनिडेऱ इन्डोऱपेऱहोडसो खोजिमि लागि नबा योम्बोक लेःऱहेन्डानुम ॥ तर कागो सानिडनोऱ हेनिडनुड टुडानि ॥ ^८ इगो मेऱनाऱमिडेऱ इमाड लेःऱहेसुए मोनोऱ लेःएटुए ॥ इगोसेऱ का येऱमाबेऱ युडमा याऱलोनोऱ नामजानुये केवा सिःऱनुड पोराइटे ॥ ^९ चैबानोऱ हेनिड लुःनिमने, माक्खाम्डेमबेऱ हाम्बे हामबेऱ इगो सुसमाचार खेम्मेये, मोबेऱ मोबेऱ इगो मेऱनाऱमिडेऱ लेःऱपऱआ खासो मिऱइन्डुजे ॥”

यहुदा इस्करियोत येसु राःप्मेऱमि पोरोकपऱआ

(मत्ति २६:१४-१६; लुका २२:३-६)

^{१०} मोबा येसुमि बारो जना एप्पा चोडसाजिबेऱ यहुदा इस्करियोत लुःमे चाहि एप्पा यडाडबाजिबेऱ खेऱनुड येसु माहाजिबाड राःमेऱमामि मोत्ता लेःऱसिऱ खडा ॥ ^{११} मोबा यहुदा इस्करियोतमि इडोऱमा खा खेम्नुड एप्पा याडाडबाजि साप्थाडमानुड खोसेऱ इडोऱमा योम्बोक लेःऱपऱआमि साटो याड पिःमामि खा टोक्सुजि ॥ मो याकबाडनोऱ यहुदा इस्करियोतडेऱ येसु राःप्मेऱमामि दाउ खाडबोगु ॥

येसुडेऱ चोडसाजिनुड एक्साडए भत्तेर चाबऱआ
 (मत्ति २६:१७-३०; लुका २२:७-२३; युहन्ना १३:२१-३०;
 १ कोरिन्थि ११:२३-२५)

१२ सोडाडोऱमा खमिर मेएम्बऱआ चरेपा चामे चाडमि याऱलोए याक, खोजिडेऱ छुटकारा चाडमि लागि पाठाडेऱ भोग पिःसुजे॥ येसुमि चोडसाजिडेऱ खो सिप्सुजि, “प्रभु, कानिडेऱ हेनेए लागि छुटकारा चाड हाम्बेम्बेऱटे पोरोकमे?”

१३ मोबा येसुडेऱ खोमि निप्पाड चोडसाजि इडोऱ लुःनुड पाडहाक्सुजि, “हागो हेन्जिड सहरबेऱ खडाजे, मोबेऱ पस्नाबेऱ योडा खिःनुड खेऱटसडबऱआ इक्को याऱमिडेऱ हेन्जिड चुण्डये॥ मोमि एडगुवा एडगुवा खडाजे, १४ मो याऱमि हाम्बे खिमबेऱ पेखेये, मो खिममि मालिक लुःसाजे, ‘कानिडमि गुरडेऱ इडोऱ लुःमे लुःटे, केऱ काडमि चोडसाजिनुड निस्तार चाड चामे कोठा हाम्बेऱटे टुये?’ १५ मोबा खोसेऱ हेनिड सोडबिए तलाबेऱ नुरोऱ चाक्युडबऱआ इक्को बेऱएम्मा कोठा खाडमेऱये॥ मोबेऱनोऱ कानिड चोपमि लागि छुटकारा चाडमि भत्तेर पोरोगानुमे॥” १६ मोबा माहा चोडसाजि सहर खेऱमाबेऱ चैबानोऱ येसुडेऱ लुःडिडोऱनोऱ चोप खा चुण्टुजि मोबा माहाजिडेऱ मोबेऱनोऱ छुटकारा चाडमि भत्तेर पोरोगुजि॥ १७ युडा येसु खोमि बारो जना चोडसाजिनुड सोरि लेस्सा॥ १८ खोजि पेन्नुड भत्तेर चामेऱनिडसिमाबेऱ येसुडेऱ इडोऱ लुःसु, “केऱ चैबानोऱ हेनिड लुःनिम्ने, हेनिडजिबेऱ कानुड सोरि पेडनुड चाघुबा इक्कोसेऱ का धोका पिःये॥ १९ येसुमि इडोऱमा खा खेम्नुड चोडसाजि दुःखि लिसामि, मोबा खोजिटाडबा चोपमि निड लासाड धोका पिःघुबा “असाडे, कानोऱटे लुःनुड?” पालै पालो येसु सिम्बोगुजि॥ २० येसुडेऱ माहाजि लुःसुजि, “हेनिड बारो जनाजिबेऱ इक्कोसेऱ का धोका पिःये॥ खो आइ कानुडनोऱ थालाबेऱ चरेपा सोक्नुड चामेऱनिडसिये॥ २१ इन्ढोडहोड याऱमिमि पसागो खोमि टुम्बेऱ साप्पऱआडोक्नोऱ लिमानोऱ खेये॥ तर इनामा याऱमिमि पसा धोका पिःखुबा॥ मो याऱमिगो इगो माक्खाम्डेमबेऱ मेन्टोक्पऱआहोडसो नुडे॥

२२ मोबा खोजि चामा चामेऱनिसिडामि मोबा एक्साड येसुडेऱ चरेपा याडनुड निवाहाड ओहाक पिःसु, मोबा चरेपा एऱनुड चोडसाजि पिःसाड लुःसुजि, “इगो केए हिडा मिऱनुड चासानुमे ॥” २३ मोबा एक्साड येसुडेऱ अडगुरमि मद्यनुडमा खोरिया याडनुड निवाहाड ओहाक पिःसु, मोबा चोप चोडसाजिडेऱ मो खोरियाबाड उक्सुजि ॥ २४ मोबा येसुडेऱ फेरि लुःसुजि, “इगो केए हरिमि हेन्जुड लेये, इगो बेऱलो याऱमिजिमि लागि यिःइटुडे ॥ २५ चैबानोऱ हेनिड लुःनिमने, निवाहाडमि राज्यबेऱ चोड लिनुडरेऱ केऱ फेरि अडगुरमि खेवा उडइनुडे ॥” २६ मोबा खोजिडेऱ इक्को भजन सेम्लुनुड जैतुन् टोक्टोक्मालाम एनामि ॥

येसुडेऱ पत्रुस नुरोऱ लुःबऱआ

(मत्ति २६:३१-३५; लुका २२:३१-३४; युहन्ना १३:३६-३८)

२७ मोडोक्पेऱ येसुडेऱ खोम चोडसाजि लुःसुजि, “का खेबेऱ सिऱमाबेऱ हेनिड चोबेऱ का याःऱयान्डानिडे, धर्ममि साऱचिराबेऱ इडोऱ सप्पऱआ लेये- ‘केऱ गोठला सेऱनेनुडे मोबा सामुजि किरुयु मिऱयु हुधेम्मे’ ॥”

२८ “तर सिबऱआबाड हिडबोक्येम्बाड हेनिडबाड याऱलो का गालिल खेएडे ॥ २९ मोडोऱपेऱनोऱ पत्रुसडेऱ येसु लुःसु, “चोबेऱ हेड याःऱयामिहोडऱसो का चाहि हेड याःऱयाडानि ॥” ३० मोबा येसुडेऱ खो लुःसु, “चैबानोऱ हेड केऱ लुःन्ने, आइसेन्डा निखेऱ भाले ओक्मा याऱलो हेनेऱ का सुमखेऱ लेडानि लुःये ॥” ३१ तर पत्रुसडेऱ हाक्सो बेऱलो लुःसु, “हेडनुड सोरि सिमा सिऱसोड केऱ हेड लेडानि लुःडानि ॥” मोबा हाइखा चोप चोडसाजिडेऱसो मोडोऱनोऱ लुःसुजि ॥

गेतसमनिबेऱ येसुडेऱ प्रार्थना लेऱपऱआ

^{३२} मोबा एक्साड येसु खोमि चोडसाजि गेतसमनि लुःमे बगैचाबेऱ खडा ॥ मोबेऱ खोसेऱ चोडसाजि लुःसुजि, “केऱ प्रार्थना लेऱऱटिलो हेनिड इगोबेऱनोऱ पेन्डिक्सानिडे ॥” ^{३३} मोबा येसुडेऱ पत्रुस, याकुबनुड युहन्ना खो सोरि चिक्खेऱटु ॥ मोबेऱ खो कस्ट मिम्बुगानुड निवा बेऱलो टुकपुकमेऱटु ॥ ^{३४} मोबा येसुडेऱ खोम चोडसाजि इडोऱ लुःसुजि, “खेप्सानुमे, केऱ निवा सिघेऱलो टुइटे ॥ हेनिड इगोबेऱ मेऱमेऱ पेनानिडे ॥” ^{३५} मोबा खो चाहि एडेऱ मेऱयोड उःक्युनुड निवाहाडनुड इडोऱ लुःसाड प्रार्थना लेऱऱपोगु, “इगो काबेऱ लेन्सिऱ पोरोइटे कस्ट सेम्मा नुउहोड काबाड सेम्बेऱमा ॥ ^{३६} खोसेऱ इडोऱ लुःसु, “पाबा, हेनेऱको चोप खा लेऱऱहेन्डुए, इगो कस्टमि खोरिया काबाड सेम्बेबेऱमा ॥ तरसो केऱ मिऱपऱआको नेऱनि, हेनेऱ मिऱपऱआडोऱनो लिरो ॥” ^{३७} येसु खोम चोडसाजि टुढामबेऱ टेजामाबेऱको खोजि इम्डिखेऱपऱआ चुप्टुजि ॥ येसुडेऱ पत्रुस लुःसु, “सिमोन, इमा हेड इम्डिघेऱपेऱटे? इमा इच्छोऱसो मेऱमेऱ पेडहेनिबा? ^{३८} हेनिड लेडसिऱपोरोक्पऱआ कस्टबेऱ मेसिऱलो लुःनुड जागा लिनुड प्रार्थना लेऱऱटानिडे ॥ हेनिडमि निवागो कानुड खेऱमा पोरोइटे, तर हिडा चाहि पाडसुये ॥”

^{३९} फेरिसो येसु मो ठाउबेऱनोऱ खेऱनुड याऱलोएनोऱ प्रार्थना लेऱऱटु ॥ ^{४०} येसु प्रार्थना लेऱऱनुड टेजामाबेऱ माहा चोडसाजि फेरिसो इम्डिखेऱपऱआ चुप्टुजि ॥ खोजि इम्मेऱ टुम्मिक टुम्मिक लेऱऱमि, मोडोगेऱ माहाजिडेऱ येसु इमाडसो मेऱलुःहेसुजि ॥ ^{४१} इडोऱ येसु सुम्खेऱनोऱ चोडसाजिबेऱ टेजामाबेऱ इम्डिखेऱपऱआ चुप्टुजि ॥ मोबा येसुडेऱ लुःसुजि, “इमा हेनिड हागोसो आनेन्दै निडसिन्डानिडे? हागो बेला लिबेऱटे ॥ याऱमिमि पसा राःप्नुड पापि याऱमिजिमि हुकपेऱ पिःमे बेला लिसा ॥ ^{४२} हागो पुकडानिडे, खडानिडे! खाक्सानुमे, याऱमिमि पसा धोका पिःघुबा याऱमि केक्पेऱ लेम्बेऱटे ॥”

येसु यात्रमिजिडेऱ राःप्पऱआ

(मत्ति २६:४७-५६; लुका २२:४७-५३; युहन्ना १८:३-१२)

^{४३} येसु यामुडिडमाबेऱ बारो चोडसाजिबेऱए यहुदा इस्करियोत निडमा चोडसा मोबेऱ लेस्सा ॥ खोनुड तरवारनुड टोडइरा याडघुबाजिमि इक्को हुलनोऱ टुसामि ॥ माहाजि एप्पा याडाडबाजि, यहुदि धार्मिक खा इःखुबाजिनुड सरकारि बेऱहाजिडेऱ पाडबऱआ लेःटामे ॥ ^{४४} राऱम्मेऱखुबा यहुदा इस्करियोतडेऱ मो यात्रमि इडोक् लुःबऱआ लेटा, “असा केऱ मोइ चानुडे, मोनोऱ येसु लेये हेनिडेऱ राऱपुनुड जोगबा लेऱसाड चिक्खेऱमे ॥” ^{४५} मोबा यहुदा इस्करियोत खेऱमोसोरोऱ, “सेवा मुसुडयो गुरु!” मोइ चोसु ॥ ^{४६} मोडोऱपेऱनोऱ येरिडजिडेऱ येसु राःबुजि ॥ ^{४७} तर खोमि केऱपेऱ येःप्खुबा इक्को यात्रमिडेऱ तरवार रिक्नुड चोप्पाड एप्पा याडाडबामि सेउतेमि नेएक पेक्पेबेऱटु ॥ ^{४८} येसुडेऱ माहाजि लुःसुजि, “इमा का खुसुबाडडे मिऱटानिडेऱ हेनिड तरवारनुड टोडइरा खिमानुड लेडइटानिडे ॥ ^{४९} का सानिडनोऱ मन्दिरबेऱ सिक्छे पिःमाबेऱ हेनिडनुडनोऱ सोरि टुसिडा मोडोक्पेऱ हेनिडेऱ मेऱाःबानिडे ॥ तर धार्मिक साऱच्चिराबेऱ साऱप्पऱआ खा पुरा लिरो ^{५०} मोडोक्पेऱनोऱ खोमि चोप चोडसाजि येसु याःऱयानुड चिपेसामि ॥

^{५१} मोडोक्पेऱ इक्को वेन्जा पसा, सुतिमि चेऱरेऱ यिप्खुबा यात्रमिडेऱ येसुमि एडगुवा एडगुवा टिडमेऱनिडसिडा ॥ मोबा खोसो येसु राःप्खुबाजिडेऱ राःबुजि ॥ ^{५२} तर खोसेऱ खोमि चेऱनोऱ याःऱयानुड उक्कुडरेक चिःऱखुडा ॥

यहुदिजिमि बेऱहाजि सुम्ढाम ठाउ पोम्बेऱ येसु

(मत्ति २६:५७-६८; लुका २२:५४-५५, ६३-७१; युहन्ना १८:१३-१४, १६-२४)

^{५३} मोबा माहाजिडेऱ येसु राःप्नुड चोप्पाड एप्पा याडाडबामि खिमबेऱ चिक्खेऱटुजि ॥ मोबेऱ एप्पा याडाडबाजि, यहुदि धार्मिक खा इःखुबाजिनुड अगुवाजि सुम्बऱआ लेःटामि ॥ ^{५४} पत्रुस चाहि येसु ओबाडनोऱ टिडसाड चोप्पाड एप्पा याडाडबामि खिम सोऱलुडबेऱ पेऱना ॥ मोबेऱ मन्दिर हुडघुबाजि पेन्नुड मि हुडबोगा ॥

५५ मोबा एप्पा याडाडबानुड माहा सुम्खुबा चोबेऱ येसु सेऱनेमामि खोमि बिरोधबेऱहा दोस योक्पोगुजि तर माहाजिडेऱ इक्कोसो दोस मेन्चुप्टुजि ॥
 ५६ येसुमि बिरोधबेऱ बेऱलो याऱमिजिडेऱ नेऱनिहा खामि सक्छि पिःसुजि, तर माहाजिमि खानोऱ मेन्टोक्सा ॥ ५७ मोबा एक्साडसो इन्डोऱ जना येःपोक्नुड येसुमि बिरोधबेऱ इडोऱमा दोस टिसुजि ॥ ५८ “याऱमिडेऱ टोडबऱआ इगो मन्दिर योबेनुड याऱमिमि हुक मेऱनिडनोऱ केऱ सुमयाकपेऱ टोडइनुडे लुःबऱआ कानिडेऱ खेम्ड्टुडमे ॥” ५९ मोडोक्सो खोजिडेऱ येसु टिबऱआ दोस इक्कोसो मेन्डोक्सा ॥

६० मोबा एक्साड चोप्पाड एप्पा याडाडबाडेऱ चोपमि पोम्बेऱ येःप्नुड येसु सिप्सु, “इमा हेनेऱ हागोसो इमा लुःसुने? इघाजिडेऱ हेड टिबऱआ दोसमि टुम्बेऱ लुःमाहा इमाडसो काप्टुनिहा?” ६१ तर येसु योड उक्नुड पेना ॥ फेरिसो चोप्पाड एप्पा याडाडबाडेऱ इडोऱ लुःनुड सिप्सु, “इमाड हेड चैबानोऱ परमधन्यमि पसा ख्रिस्टनोऱ लेये?” ६२ येसुडेऱ जवाफ पिःसु, “इहिऱ कानोऱ लेडे, मोबा इऱयाक हेनिडेऱ याऱमिमि पसा चोपबाड बेऱएम्मा निवाहाडमि चुप्थिडलाम पेमबऱआनुड नान्द्रुडमाबेऱहा खिममिऱवानुड उडमेऱनिडसिबऱआ खाडडोइन्डानुमे ॥” ६३ मोबा चोप्पाड एप्पा याडाडबाडेऱ खोमि चेऱ नाःक्साड लुःसु, “लो साप्तु, हागो कानिड इगोबाड हाइखा प्रमान इमाडसो पाप्निबा ॥ ६४ इगोसेऱ निवाहाडमि बेजेत लेऱऱपऱआ खा हेनिडेऱ खेमबेसानुम ॥ हेनिडमि इमाड लुःमा टुहा?” मोबा माहाजि चोबेऱ इगोगो सेऱनेमारोमा अपराधि लेये लुःसुजि ॥ ६५ मोबा कोहि याऱमिजिडेऱ येसु चेऱपोगुजि मोबा खोमि मिक चेऱटेऱ टेक्नुड मोक्पोगुजि मोबा लुःसुजि, “लो लुघाए, हेड अगमबक्ता असेऱ हेड मोगे?” मन्दिर हुडघुबाजिडेऱसो येसु मोगुजि ॥

पत्रुसडेऱ येसु लेडानि लुःबऱआ

(मत्ति २६:६६-७५; लुका २२:५६-६२; युहन्ना १८:१५-१८, २५-२७)

६६ पत्रुस सोऱलुडबेऱमु पेम्मेऱनिडसिडा ॥ मोडोकपेऱ चोप्पाडर एप्पा याडाडबामि इक्को सेउतेनिडेऱ पत्रुस मि हुडमेऱनिडसिबऱआ खाडडोक्टु ॥
६७ मोबा मोसेऱ पत्रुस नुरोऱ खाडसाड लुःसु, “हेडसो येसुनुडनोऱ तुसे नेऱनेन्डे?”

६८ तर पत्रुसडेऱ मो इडोऱ लुःसु, “नेऱनि, हेनेऱ इमाड खा इःन्दुए, केऱको इमाडसो मेलेसुड ॥” मोबा पत्रुस येपोक्नुड रामडेमलाम खडा मोडोकपेऱनोऱ भाले ओगा ॥

६९ मोनोऱ सेउतेनिडेऱ फेरिसो पत्रुस खाडडोक्टु मोबा मोबेऱ येःप्किडबऱआ याऱमिजिनुड इडोऱ लुःसु, “इगो याऱमिगो माहाजिबेऱए इक्को लेये ॥”

७० तर पत्रुसडेऱ फेरिसो कागो नेऱनि लुःसु ॥ इच्छोऱ एक्साड मोबेऱहाजिबाड इक्को याऱमिडेऱ पत्रुस लुःसुजि, “हेडसो माहाजिबेऱ इक्को लेये ॥ इन्ढोडहोड हेडसो गालिलिनोऱ लेये ॥”

७१ तर पत्रुसडेऱ किरिया हेक्साड लुःसुजि, “हेनिडेऱ असामि टुम्बेऱ इगो खा इःमेऱनिडसिन्डानुमे मो याऱमि केऱ लेसुडनि ॥”

७२ मोडोकपेऱनोऱ हाइको खेऱ भाले ओगा, मोबा याऱलो येसुडेऱ इडोऱ लुःबऱआ खा पत्रुसडेऱ मिऱटोक्टु, “निघेऱ भाले ओःक्मा याऱलो हेनेऱ का सुमखेऱ लेडानि लुःये ॥” मोबा पत्रुस बेऱलो हेक्हेक मिन्साड हाबा ॥

येसु पिलातसमि पोम्बेऱ

(मत्ति २७:१-२, ११-२६; लुका २३:१-५, १३-२५; युहन्ना १८:२८-१९:१६)

१५ ^१माक्मिऱ सेम्लाम एप्पा याडाडबाजि, यहुदि धार्मिक खा इःऱखुबाजि, अगुवाजिनुड एप्पा यहुदिजि सुमढाम खिमबेऱहा याऱमिजि सल्लहा इःनुड येसु हिःगुजि मोबा पिलातसमि पोम्बेऱ चिक्खेऱटुजि ॥ ^२पिलातसडेऱ येसु सिप्सु, “इमा हेड यहुदिजिमि हाडबाडे?”

येसुडेऱ लुःसु, “हेनेऱनोऱ आक्टोऱ लुःमेऱनिडसिन्डुए॥” ^३ एप्पा यडाडबाजिडेऱ येसुमि टुम्बेऱ बेऱलो दोस टिसुजि॥ ^४ मोडोगेऱ पिलातासडेऱ येसु फेरि सिप्सु, “इमा हेडबेऱ इघाजिडेऱ टिबऱआ दोस चैबानोऱ लेये, इन्डोड या कानिबा? खाक्से हेड खोजिडेऱ इन्डोऱ बेऱलो दोस टिमेऱनिडसिम्मे॥” ^५ तरसो येसुडेऱ इमाडसो मेऱलुःसु॥ इडोऱ येसु योड उक्पऱआ खाडनुड पिलातससो खरि मिना॥

^६ तर छुटकारा लुःमे छुटकारामि चाडमि याक्पेऱ पिलातसडेऱ सानिडनोऱ याऱमिजिडेऱ लुःबऱआ इक्को कैदि लेऱमे चलन टुसे॥ ^७ मोबा मोडोक्पेऱ तिरोडगा खिमबेऱ इक्को बारब्बा निड लेऱऱखुबा सेक्युडबऱआ लेटे॥ मोसेऱ हाइखा याऱमिजिनुड टोडनुड हुलदाडगा लिमाबेऱ याऱमिसो सेऱपऱआ लेटा॥ ^८ मोबा बेऱलो याऱमिजि लेन्नुड पिलतास इडोऱ लुःसुजि, सानिडडोऱनोऱ कानिडमि इक्को याऱमि कैदि लेप्पिऱमा खेये लुःनुड बिन्ति लेऱटुजि॥ ^९ मोबा पिलातसडेऱ माहा याऱमिजि सिप्सुजि, “मोडोऱहोड हेनिडमि लागि यहुदिजिमि हाडबा लेप्पेबेऱमेन्डे?” ^{१०} इन्डोडहोड एप्पा याडाडबाजिडेऱ चेजेवेऱनोऱ येसु राःपूनुड खोबेऱ चिक्चेऱपऱआ लुःनुड पिलतासडेऱ लेबेबऱआ लेटे॥ ^{११} तर एप्पा याडाडबाजिडेऱ मोबेऱहा याऱमिजि चोम्नुड ‘येसु नेऱनि, बारब्बा चाहि लेप्पिऱमा’ लुःमेऱटुजि॥ ^{१२} पिलातसडेऱ फेरि माहाजि सिप्सुजि, “मोडोक्होड हेनिडेऱ लुःबऱआ यहुदिजिमि हाडबा चाहि केऱ इमाडडे लेऱऱमे?” ^{१३} खोजिडेऱ वोसाड लुःसुजि, “आक्को चाहि काप्सिडबेऱ किडनेसे॥” ^{१४} पिलातसडेऱ माहाजि सिप्सुजि, “येसुडेऱ इमाड आक्टोक्मा अपराध लेऱटुहोड सेऱनेमे?” तर माहाजि भना बेऱलो वोसाड इडोऱ कासामि, “आक्को येसु काप्सिडबेऱ किडनेसे॥” ^{१५} मोबा पिलातसडेऱ माहा याऱमिजि साप्थाडमेऱममि लागि बारब्बा लेप्पेबेऱटुजि॥ येसु कोराडेऱ मोःकूनुड काप्सिडबेऱ किडनेमामि खोजिनोऱ जिम्मा पिःसुजि॥

येरिडजिडेऱ येसु सिःक्चाबऱआ

(मत्ति २७:२७-३१; युहन्ना १९:२-३)

^{१६} येरिडजिडेऱ येसु रोमिजिडेऱ न्याय लेऱठामबेऱ चिक्खेऱटुजि मोबेऱ हाइखासो बेऱलो येरिडजि सुप्सामि ॥ ^{१७} माहा येरिडजिडेऱ सिःक्चामामि येसु बैजनि रडमा चेऱ चाडएम्बेऱटुजि मोबा खोमि निन्डावाबेऱ चिजिडमि मुकुट टोडनुड ओम्डिबेऱटुजि ॥ ^{१८} मोबा माहा येरिडजिडेऱ येसु इडोऱ लुःसुजि, “यहुदिजिमि हाडबामि ओहाड” लुःसाड सेवा लेऱटुजि ॥ ^{१९} मोबा माहाजिडेऱ येसुमि निन्डावाबेऱ इडभुडेऱ मोक्नुड चेडुजि मोबा टुमरुकू ठोक्साड येसु सेवा मुसुजि ॥ ^{२०} मोबा इडोऱ येसु बेऱलो सिःक्चासेऱनुड मो बैजनि रडमा चेऱ हेम्बेनुड याऱलो खोसेऱ चाडबऱआ चेऱनोऱ चाडडिबेऱ बोमा काप्सिडबेऱ किडनेमामि चिक्खेऱटुजि ॥

येसु काप्सिडबेऱ किडनेसिऱ किक्खेऱपऱआ

(मत्ति २७:३२-४४; लुका २३:२६-४३; युहन्ना १९:१७-२७)

^{२१} मोबा कुरेनि देसबेऱ पेडखुबा अलेक्जेन्डरनुड रुफसमि पाबा लुःमे याऱमि खिमडेमबाड आप्टिडबऱआ खोजिडेऱ चुप्टुजि ॥ माहा येरिडजिडेऱ येसुडेऱ खिःबऱआ काप्सिड मो सियोन येऱयेऱ खिमेऱटुजि ॥ ^{२२} मोबा एक्साड माहाजिडेऱ येसु गलगथामि लुःमे टोक्टोक्माबेऱ चिक्खेऱटुजि ॥ गलगथा लुःबऱआ चाहि ‘खप्पर’ ॥ ^{२३} मोबेऱ रुक्नुड खोजिडेऱ येसु मुरा लुःमे खिइये टुबऱआ अडगुरमि खेडा उडमेऱटुजि तर येसुडेऱ माहा मेऱउक्सु ॥ ^{२४} माहा येरिडजिडेऱ येसु काप्सिडबेऱ किडडिसुजि ॥ मोबा माहा येरिडजिडेऱ येसुमि चेऱ असा असामि भागबेऱ सिऱइये लुःनुड खोजिडेऱ चिट्टा एन्डुजि ॥

^{२५} माहाजिडेऱ येसु काप्सिडबेऱ किडडिमाबेऱ माक्मिए नौ बोड काबऱआ लेऱटे ॥ ^{२६} येसु दोस टिबऱआ पत्रबेऱ “यहुदिजिमि हाडबा” लुःनुड साप्पऱआ लेऱटे ॥ ^{२७} येरिडजिडेऱ येसुनुड निप्पाड खुसुबाडजिसो इक्को खोमि चुपथिडलाम हाइको एडसिडलाम किडडिसुजि ॥ ^{२८} [इडोऱ धार्मिक

साप्चिराबे साप्परा खा पुरा लिसा ॥ येसु अपराधि खुसुबाडजिडोनो खाडमुसा ॥]

^{२६} मो रामनो लिसाड खेरखुबा यात्रमिजिडे खोजिमि निन्डावा हिरलिह हिरलिह हिरनुड इडो लुःसाड सिःक्चोसुजि, “लो खाक्सानुमे! मन्दिर योःनुड फेरि सुमयाकपेनो टोडहेखुबा! ^{३०} लो हेड आमदाडबा आक्को काप्सिडबाड मिम्मु उडसे?” ^{३१} मोडोनो एप्पा याडाबाजिनुड यहुदि धार्मिक खा इःखुजिडेसो येसु इडो लुःसाड सिःक्चोसुजि, “इगोसे हाइखाजिगो हिडमेःटुजि तर खोमदाडबा मेहिडजाहेसु ॥ ^{३२} इगो इस्राएलमि हाडबा ख्रिस्ट लेयेहोड आक्को काप्सिडबाड मिम्मु उडसे, मो खाडइन्डुडमे मोबा बिस्वास लेन्डुडमे ॥” येसुनुड सोरि काप्सिडबे किडएम्बरा खुसुबाडजिडेसो खो सिःक्चोसुजि ॥

येसु सिबरा

(मत्ति २७:४५-५६; लुका २३:४४-४६; युहन्ना १९:२८-३०)

^{३३} लेन्डा बारो बोडबाड सुमबोडबाडडो मो देस चोप सेन्जिगुप् लिसा ॥ ^{३४} सुमबोडराजि येसु बेए सेम्लाडे वोसाड इडो कासा, “इलोइ, इलोइ, लामा सबखथनि?” इगो लुःबरा चाहि, “हे केए निवाहाड, हे केए निवाहाड हेने का इन्ढोड मिन्डेटिडे^b?” ^{३५} मोबे किःर्यु मिःर्यु येप्खुबा यात्रमिजिडे येसु इडो काबरा खेम्नुड लुःसुजि, “खेप्सानुमे, आक्कोसे एलिया केःमेःनिडन्डुए ॥” ^{३६} मोबा इक्को यात्रमि पिडघेःनुड ढिकिमि चोम्मारा सिडबुडोःमा, सिडुवा खेवाबे वडाप्नुड येसुमि याबुकपे टिबेःसाड इडो लुःसु, “इरछो योडमेःमा एलिया लेन्नुड इगो काप्सिडबाड रिओक्इन्डुएन्डे, खाडखाडमा!” ^{३७} तर मोडोक्पेनो येसु बेए सेम्ले वोनुड खोमि सोःक्मा खडा ॥

^b १५:३४ भजनसङ्ग्रह २२: १

^{३८} मोडोक्पेनोः यरुसलेमबिःए मन्दिरबेः टिबःआ पर्दा मिन्दुराम मिम्मूठोक् नाःक्खेःनुड निफेड लिसा ॥ ^{३९} मोबा काप्सिडमि केक्पेः येःपूखुबा येरिडमि एप्पाडेः येसुमि सोःक्मा खेःपःआ खाडनुड लुःसु, “चैबानोः इगो याःमिगो निवाहाडमि पसानोः लेःटे ले ॥” ^{४०} माहा चोप खा ओबाड कोहि मेःनःमिजिडेःसो खाडमेःनिडसिडुजे ॥ माहाजिबेः मरियम मग्दलिनि, एडेःमा याकुबनुड योसेफमि मामा मरियमनुड सलोमि टुसा ॥ ^{४१} मोबा हाइखासो बेःलो मेःनःमिजि येसुनुड सोरि यरुसलेमबेः लेम्बःआ लेःटामि ॥ माहाजिडेः येसु गालिलबेः टुमाबेः खो एडगुवा एडगुवा टिक्सुजेनुड सेवा लेःटुजे ॥

येसुमि सिजिक् येःःमा येडबःआ

(मत्ति २७:५७-६१; लुका २३:५०-५६; युहन्ना १९:३८-४२)

^{४२} मो याक चाहि यहुदिमि नजामे याकमि याःलोए याक लेःटे ॥ मोमि लागि यहुदिजि पोरोकमेःनिडसिडामे, नामसो किःखेःसि पोरोकपःआ लेःटे ॥ ^{४३} बेःहा यहुदिजि सुमढाम खिममि इक्को एप्पा याःमि अरिमाथिया ठाउबेःए योसेफ मेडकिस्सिरेः पिलातसमि पोम्बेः खेःनुड येसुमि सिजिक् डागु ॥ खोसेः याःलोएबाडनोः निवाहाडमि राज्य इन्डोःपेः लेडइये लुःनुड हुडमेःनिडसिडुये ॥

^{४४} येसु सिघेःपेबःआ खा खेम्नुड पिलातस खरि मिना ॥ मोबा खोसेः रोमि येरिडमि एप्पा केःनुड येसु चैबानोः सिघेःटे लुःनुड सिप्सु ॥ ^{४५} येसु चैबानोः सिघेःपःआ खा येरिडमि एप्पाबाड लेडोक्नुड पिलातसडेः येसुमि सिजिक् योसेफ लाघेःमेःटु ॥ ^{४६} मोबा योसेफडेः सुतिमि चेः इन्जेडु मोबा येसुमि सिजिक् काप्सिडबाड रिओक्नुड मो चेःटे यिप्नुड पहराबेः युनुड टोडबःआ येःःमाबेः युडनुड इक्को बेःएम्मा चप्लेटि रुडगोःवाडेः येःःमामि रामडेम सेक्टिसु ॥ ^{४७} मरियम मग्दलिनिनुड योसेफमि मामा मरियमडेः एक्साड योक्माबेः लेडोक्रो लुःनुड येसु येःःमाबेः युडबःआ खा निवाबेः नुरोः युडसाड खाडमेःनिडसिडुजे ॥

येसु सिघेऱपऱआबाड हिडबोक्पऱआ

(मत्ति २८:१-८; लुका २४:१-१२; युहन्ना २०:१-१०)

१६ ^१ [नाजामे याक रुक्खेऱनुड ँकसाड मो युडा मरियम मग्दलिनि, याकुबमि मामा मरियमनुड सलोमिडेऱ येसुमि सिगुयाकपेऱ सिऱमामि नामजानुए केवा इनुजि ॥ ^२ वगियाराम सातामि याऱलोए याक माक्मिऱसेल्लाम नाम केऱमेऱनिडसिडा माहा मेऱनाऱमिजि येसु युडबऱआ येऱमाबेऱ खडामि ॥ ^३ मोबा खोजि रामबेऱ खेऱमेऱनिडसिमाबेऱ मो 'येऱमा टेक्पऱआ बेऱए रुडगोऱवा चाहि कानिड असेऱ सेम्बेऱये?' लुऱनुड खा इऱसाड खेऱमेऱनिडसिडामि ॥ ^४ तर मोबेऱ रुक्नुड खाडमाबेऱको येऱमाबेऱए मोढेऱलोमा बेऱएम्मा रुडगोवा सेम्बेऱआ खाडडोक्टुजि ॥ ^५ मोबा येऱमा होडसिऱयु पेऱनुड खाडमाबेऱको उथिऱमा चेऱ चाडखुबा इक्को वेऱजा याऱमिडोऱ चुप्थिडलाम पेन्डिडबऱआ खाडडोक्टुजि मोबा माहाजि खरि मिनामि ॥ ^६ तर मोसेऱ खोजि इडोऱ लुऱसुजि, "खरि एमिनानिडे, काप्सिडबेऱ सिघेऱपऱआ नासरतबिऱए येसु हेनिडेऱ योक्मेऱनिडसिन्डानुमे ॥ तर खोगो हिडबोक्नुड खेऱपेटे ॥ खो इगोबेऱ एऱयोगानुमे, खाक्सानुमे खो इगोबेऱनोऱ युडबऱआ लेऱटे ॥ ^७ खडानिडे खोमि चोडसा पऱसनुड हाइखा चोडसाजिसो इगो खा लुऱबेऱटानुमे ॥ येसु हेनिडमि पोम्बेऱ पोम्बेऱ गालिल खेऱमेऱनिडसिये ॥ याऱलो खोसेऱ लुऱडिडोऱ मोबेऱनोऱ हेनिडेऱ खो चुप्मिन्डानुमे ॥" ^८ मोबाड खोजि येऱमाबाड किस्सिसाडनुड खरि मिडसाड पाखेऱयु पिऱडखडामि ॥ खोजिडेऱ असासो इमाडसो मेऱलुऱहेसुजि ॥ इन्ढोडहोड माहाजि बेऱलो किस्सिबऱआ लेऱटामे ॥

येसु मरियम मग्दलिनिमि पोम्बेऱ खाडमुबऱआ

(मत्ति २८:९-२०; लुका २४:१३-५३; युहन्ना २०:११-२३; प्रेरित १:४-११)

^९ [सातामि याऱलोए याक आइताबारमि माक्मिऱ खो हिडबोक्नुड चोपपाड याऱलो मरियम मग्दलिनि लुऱमे मेऱनामिमि पोम्बेऱ खाडमुसा ॥

याहलो मो मेहनामिबाडनोह एच्छि गोटा मडेहमा चाप येसुडेह यिक्पहआ लेटे ॥ ^{१०} मो मरियम खोमि चोडसाजि इगो खा लुःसिह खेहमाबेह खोजि बिलौना लेःहसाड हाप्मेहनिडसिडामि ॥ ^{११} तर येसु हिडबोक्नुड मरियमबेह खाडमुसा लुःनुड खोजि लुःबेहमाबेह मो खा बिस्वास मेलेःटुजि ॥

येसु खोमि निप्पाड चोडसाबेह खाडमुबहआ

लुका २४:१३-३५

^{१२} मोबा एकसाड निप्पाड चोडसाजि यरुसलेमबाड खिमडेमलाम खेहमेहनिडसिमाबेह येसुमि हाइको नारिडबेह खाडमुसा ॥ ^{१३} मोबा मोजि टेघेहनुड मोबेह लिबहआ चोप खा हाइखा चोडसाजि लुःबेहटुजि ॥ तर मोजिडेह लुःबहआ खासो माहाजिडेह बिस्वास मेलेःहटुजि ॥

येसु खोम एघार एप्पा चोडसाजिबेह खाडमुबहआ

मत्ति २८:१६-२०, लुका २४:३६-४६, युहुन्ना २०:१६-२३, प्रेरित १:६-८

^{१४} मोबा एकसाड एघारो जना चोडसाजि चामा चासिहपोरोक्पहआ बेलाबेह येसु खोजिमि रुम्बेह खाडमुसा ॥ माहाजिमि निवा छक्पहआ मोबा येसु सिघेहपहआबाड हिडबोक्पहआ खाडखुबाजिडेह लुःबहआ खाबेह बिस्वास मेलेःहपहआसेह माहाजि मारे वोबुजि ॥ ^{१५} मोबा खोसेह माहाजि लुःसुजि, “माक्खमडेमबेहहा चोप याहमिजि सुसमाचार प्रचार लेःटानुमे ॥ ^{१६} बिस्वास लेःहनुड बप्तिस्मा लाघुबाजिडेह मुक्ति चुप्डनुजे, तर बिस्वास मेलेःहखुबाजि न्यायबेह सिइम्मे ॥ ^{१७} बिस्वास लेःहखुबाजिनुड इडोहहा चिडगा खाडमुये ॥ खोजिडेह केए निडबेह माडेहा चापजि यिइनुजे मोबा चोड खाप्लाबेह यामुम्मे ॥ [^{१८} खोजिडेह पुसेहचि हुगेह राःबुजिहोडसो, सिक्चानोह उक्सुजिहोडसो मोसेह खोजि इमाडसो पिरखेहनिबा ॥ माहाजिडेह टुक्खुबाजि सोक्पेह हुक युडमाबेह नुबोइम्मे ॥

येसु थाडसिरिट्टु खेऱपऱआ

१६ इडोऱ खोमि चोडसाजिनुड खा इःसेऱनुड प्रभु येसु थाडसिरिट्टु
 ठेऱपोखेऱनुड निवाहाडमि चुप्थिडलाम पेना ॥ २० मोबा माहा चोडसाजि
 खेऱनुड चोप ठाउबेऱ प्रचार लेःटुजि ॥ प्रभुडेऱ खोजिमि जिबनबाड योम्बोक
 लेःटु ॥ माहाजिडेऱ प्रचार लेःऱपऱआ बचन खरिहा चिडगाबाड चैबामा लेःये
 लुःनुड प्रमान लेःऱपेऱट्टु ॥]]